

लूका

लिख्यो सुब-समिचार

लिखवा वाळो: लूका

लिखवा की वजा: ईसु
मनख को बेटो

लिखवा को बखत: करीब ६०
ईस्वी सन्।

यो सुब-समिचार लूका का मुजब दो बातहुंण के परगटे। एक तो या के ईसु परमेसर की परतिज्ञा का मुजब इसराइलहुंण को उध्दार करवा वाळो अने दूसरी या के ईसु मसीह आखा जग का लोगहुंण को उध्दार करवा वाळो हे। लूका ने लिख्यो के परमेसर का आतमा ने "गरीब-गुरबाहुंण के सुब-समिचार को परचार करवा सरु ईसु के जग माय मोकल्यो थो" यो सुब-समिचार लोगहुंण की हर तरा की जरुवत के पूरण करी सके हे। म्हान आनन्द का बारामें लूका, खास करिके पेलां पाठ माय ईसु का आवा की घोसणा करिके आखी बारता को सार दे हे, खास करिके ईसु का सरग जावा का बारामें पक्का परमाण दई के अने घणो खुली के बात लिखे हे, ताके मसीह लोगहुंण को बिसास बडे के ईसु सरग पे उठई ल्यो हे। याज बात उने परेरितहुंण का काम माय बी लिखी हे।

रूप-रेखा:-

१. भूमिका १.१-४
२. ईसु को जनम, नानपणो, अने योहन बपतिसमा
देवा वाळो १.५-२.५२
३. योहन बपतिसमा देवा वाळा की सेवकई ३.१-२०
४. ईसु को बपतिसमो अने अजमाइस ३.२१-४.१३
५. गलील से ईसु की सेवकई ४.१४-९.५०
६. गलील से यरुसलेम ९.५१-१९.२७
७. ईसु को यरुसलेम का ऐरे-मेरे को एक हफ्तो १९.२८-२३.५६
८. जीवतो होणो, नगे आणो, अने परमेसर कने जाणो २४.१-५३

लूका ने यो सुब-समिचार थियुफिलुस के लिख्यो

आदरणी थियुफिलुस,

१ नरा लोगहुंण ने उण बातहुंण का बारामें लिखवा को काम अपणा हात माय ल्यो जो हमारा माय घटी। २ ठीक वीज बातहुंण जो हमारे उण लोगहुंण से मिळी, जिणने इनी बातहुंण के सुरु सेज देखी थी अने जो परमेसर का बचन का सेवक था। ३ इकासरु सुरु सेज इनी सगळी बातहुंण के होसियारी से अने सई-सई परखवा का बाद, तमारा सरु लिखणों म्हारे सई लाग्यो। ४ जेकासे के तू उण बातहुंण की सच्चई के जाणी ले जिणकी थारे सीख दइगी हे।

योहन का जनम की भविसबाणी

५ यहूदिया का राजा हेरोदेस का राजकाल माय जकरियाह नामको एक पुरोहित^१ थो जो पुरोहित अबियाह का दळ को थो। अने उकी बइरा को नाम इलीसिबा थो जो हारुन^२ का कुळ की थी। ६ वी दोइज परमेसर की नगे माय धरमी था अने उणका चरित्तर परभु का सगळा हुकम अने नेम-बिधान का मुजब निरदोस था। ७ वी बे-ओलाद था, क्योँके इलीसिबा बांझ थी अने दोइज डोकरा-डोकरी हुई गया था।

८ असो होयो के जदे जकरियाह अपणा दळ की सारी आवा पे परमेसर का सामे पुरोहित को काम करी र्यो थो ९ तो पुरोहितहुंण की रीति मुजब

चिट्ठी लाखी के उके छांटी ल्यो के परभु का मन्दर माय जई के धूप-बती जळाया। १० अने धूप-बती जळावा का बखत सगळा मनखहुंण बायरे पराथना करी र्या था। ११ अने उके धुप-देवा की बेदी का सुदा हाताड़ी परभु को एक सरगदूत उबो नगे आयो। १२ अने उके देखी के जकरियोह घबरायो अने डर का मारे उबो को उबोज र्यो। १३ पण सरगदूत ने उकासे क्यो, "हे जकरियाह डरे मती, क्योँके परमेसर ने थारी पराथना सुणी ली हे; थारी बइरा इलीसिबा से थारा सरु एक बेटो पेदा होयगा अने तू उको नाम योहन राखजे।" १४ थारे आनन्द अने खुसी रेगा, अने उका जनम से नरा लोग आनन्द मनायेगा। १५ क्योँके परभु की नगे माय उ म्हान रेगा। उ दाखरस अने दारु नी प्येगा, उ अपणी मेतारी की कोख सेज पवित्तर आतमा से भर्यो होयो रेगा। १६ उ इसराइल जात का कुळ माय से नरा के उणका परभु परमेसर आड़ी फेरी लायगा। १७ अने उ परभु का अगड़े-अगड़े एलियाह नबी की आतमा अने सामरत माय हुई के चलेगा, के पूरखाहुंण का हिरदा बाळ-बच्चाहुंण आड़ी फेरी दे अने हुकम नी मानवा वाळाहुंण के असी समज देगा के धरमिहुंण का जसा बिचार राखे जेकासे के उ परभु सरु एक लायक परजा तय्यार करे।"

^१ १.५ हारुन; मूसा नबी को भई अने पेलो पुरोहित।

^२ १.५: इ तयास २४.७-२४

^३ १.१५: गिणती ६.३

^४ १.१७: मलाकी ४.५-६

१८ जकरियाह ने सरगदूत से पुछ्यो, "हूँ इके पक्की तरा से कसे जाणी सकूं? क्योंकि हूँ तो डोकरो हुई ग्यो हूँ अने म्हारी घराळी बी डोकरी हुई गी।"

१९[†] सरगदूत ने जुवाब द्यो, हूँ जिबराइल हूँ जो परमेसर का सामे उबो रूँ हूँ। म्हारे इकासरु मोकल्यो के थार से बातहुण करूँ, अने थारे यो सुब-समिचार सुणउं। २० देख, जेना दन तक ई बातहुण पूरण नी हुई जाय तू गुंगो रेगा अने बोली नी सकेगा, क्योंकि तने म्हारी बातहुण पे जो ठीक बखत पे पूरण होयगा बिसास नी कर्यो।"

२१ उना बखत लोग जकरियाह पुरोहित की बाट देखी र्या था, अने उणके अचरज हुई र्यो थो के उके मन्दर माय इतरी देर कायसरु लागी री हे? २२ पण जदे उ बायरे आयो तो उणका से बोली नी सक्यो, अने वी जाणी गया के उके मन्दर माय कई को दरसन मिळ्यो हे, क्योंकि उ इसारो करतो र्यो अने गुंगो बण्यो र्यो।

२३ अने असो होयो के जदे उका पुरोहितपणा की सेवा का दन पूरण होया तो उ अपणा घरे अई ग्यो। २४ इना दनहुण का बाद उकी घराळी इलीसिबा भारीपग से हुई अने उने या कई के खुद के पांच मइना तक छिपाडी राखी। २५ उने क्यो, "इना दनहुण माय परभु ने म्हार पे किरपा भरी नगे करिके, मनखहुण माय म्हारो लांछण मिटावा सरुज, उने म्हारी बिणती सुणी।"

ईसु का जनम की भविसबाणी

२६ इलीसिबा का छटवां मइना माय परमेसर आडी से जिबराइल सरगदूत गलील का नासरत नगर माय २७[†] एक कुंवारी कने मोकल्यो, जेकी सगई यूसफ नामका एक मनख से हुई थी जो दाऊद का बंस को थो, अने उनी कुंवारी को नाम मरियम थो। २८ अने भित्तरे अई के सरगदूत ने मरियम से क्यो, "हे परभु की किरपा-पावा वाळी, परणाम! परभु थारा गेले हे।" २९ या बात सुणी के मरियम घणी डरी गी अने वा सौंच-बिचार माय पड़ी गी के यो कसतरा को परणाम हे। ३० पण सरगदूत ने उकासे क्यो, "हे मरियम, डरे मती! क्योंकि थार पे परमेसर की किरपा हुई हे। ३१[†] देख, तू गरभ धारेगा अने एक बेटो जणेगा, अने तू उको नाम ईसु राखजे ३२[†] उ म्हान रेगा, अने परमपरधान को बेटो केवायगा। परभु परमेसर उका पुरखा दाऊद को राज ईसु के देगा। ३३ अने उ याकूब का घराणा पे हमेस्या तक राज करेगा, अने उको राज कदी नी मिटेगा।"

३४ मरियम ने सरगदूत से क्यो, "यो कसे हुई सके, क्योंकि हूँ तो कुंवारीज^b हूँ?"

३५ सरगदूत ने उकासे क्यो, "पवितर आतमा थार पे उतरेगा अने परमपरधान की सामरत को छायाळो थार पे रेगा। इकासरु उ पवितर बाळक जो जनमेगा, परमेसर को बेटो केवायगा। ३६ देख, थारी

^b १.३४ कुंवारीज; बिना ब्याव करी, कइंका मनख के नी जाणूं।

[†] १.१९: दानियल ८.१६, ९.२१ [†] १.२७: मती १.१८ [†] १.३१: मती १.२१

[†] १.३२-३३: २ सेमुएल ७.१२, १३, १६; यसायाह ९.७

नातेदारनी इलीसिबा के बी इना बुडापा माय एक बेटो होवा वाळो हे अने जो बांझ केवाड़ी जाती थी यो उको छटवों मइनो हे। ^{३७} क्योँके परमेसर सरु कइंज अबगो हयनी।"

^{३८} मरियम ने क्यो "देख, हूं तो परभु की दासी हूं। थारा बचन मुजबीज म्हारा गेले होय।" अने सरगदूत उका कने से चल्थो ग्यो।

मरियम अपनी नातेदारनी इलीसिबा कने

^{३९} तो उणाज दनहुंण माय मरियम उठी ने झट बब्डा आळा परदेस माय यहूदा का एक नगर आड़ी गी, ^{४०} अने जकरियाह का घरे जई ने उने इलीसिबा के परणाम कर्यो। ^{४१} असो होयो के जसोज इलीसिबा ने मरियम को परणाम सुण्यो असोज बाळक उकी कोख माय जोर से उछळी पड़्यो अने इलीसिबा पवित्तर आतमा से पूरण हुई। ^{४२} अने उने उंची अवाज से हेला पाड़ी ने क्यो, "तू सगळी नारीहुंण माय धन्य हे, अने थारी कोख को फळ बी धन्य हे! ^{४३} म्हार पे या किरपा कसे हुई के म्हारा परभु की मेतारी म्हारा कने अई? ^{४४} देख, जसाज थारा परणाम का सबद् म्हारा कान माय पड़्या, बाळक म्हारी कोख माय खुसी से उछळी पड़्यो। ^{४५} धन्य हे वा नारी जेने बिसास कर्यो के जो कई परभु ने उकासे क्यो, उ पूरण होयगा।"

मरियम ने परमेसर की म्हेमा को गीत गायो

^{४६} तो मरियम ने क्यो,

"म्हारी हिरदो परभु की बड़ई करे,

^{४७} अने म्हारो आतमा म्हारा उध्दार करवा वाळा परमेसर माय खुस हूं,

^{४८} क्योँके उने अपनी दासी की दीन-हीन दसा पे किरपा करी हे।

इकासरु देखो, अबी से लई के सगळा जुग की पीड़िहुंण म्हारे धन्य केगा।

^{४९} क्योँके सगळा से सामरतवान ने म्हारा सरु म्हान काम कर्या हे,

अने उको नाम पवित्तर हे।

^{५०} अने उकी दया पीड़ी दर पीड़ी तक

उणका पे बणी रे हे जो उका से डरे हे।

^{५१} उने अपनी भुजाबळ से सामरत का काम कर्या हे

अने उणके खक्कळ-बक्कळ करी लाख्या जो अपना हिरदा की भावनाहुंण माय घमण्डी था।

^{५२} उने राजाहुंण के सिंगासण से पटकी लाख्या

अने गरीब-गुरबाहुंण के म्हान करी लाख्या।

† १.३७: उत्पत्ती १८.१४

† १.४६-५५: १ सेमुएल २.१-१०

† १.४८: १ सेमुएल १.११

† १.५२: अय्यूब ५.११, १२.१९

५३ भूकाहुंण के तो उने अच्छी-भली चीजहुंण से तिरप करी लाख्या अने धणिहुंण के रिता हात हेडी लाख्या।

५४ जसा के उने हमारा पूरखाहुंण से वायदो कर्यो अने अई के अपणा सेवक इसराइल की मदद करी।

५५ असोज उने रियाद करी ने अपणी दया इबराइम अने उका बंस से हमेस्या तक करे हे।"

५६ गीत खतम करवा का बाद, मरियम इलीसिबा का गेले तीन मइना तक रई के अपणा घरे नासरत पाछी अई।

जकरियाह बड़ई को गीत गावा लाग्यो

५७ जदे इलीसिबा के बाळक जणवा का दन पूरण होया तो उने एक बाळक जण्यो। ५८ उका पड़ोसी अने नातेदारहुंण ने जदे यो सुण्यो के परभु ने उका पे घणी किरपा करी हे तो उणने उका गेले खुसी मनई।

५९ असो होयो के वी मनख आठवां दन बाळक को खतणो करावा आया अने उका पिता का नाम पेज उको नाम जकरियाह राखवा लाग्या। ६० पण उकी मेतारी ने क्यो, "नी! उको नाम योहन राख्यो जायगा।"

६१ तो उणने उकासे क्यो, "तमारा नातेदारहुंण माय से कइंका कोज यो

नाम हयनी!" ६२ उणने उका पिताजी से इसारो करी ने पुछ्यो के "तू उको कंई नाम राखणो चावे?"

६३ जकरियाह ने लिखवा की पट्टी मंगाडी अने उका पे लिख्यो, "उको नाम योहन हे।" अने सगळा के अचरज होयो।

६४ झट उकी जीब की गठाण खुली गी अने जीब से परमेसर की इसतुती, करतो होयो बोलवा लाग्यो। ६५ इका पे अड़ोसी-पड़ोसिहुंण डरवा लाग्या अने यहूदिया का आखा बळडा परदेस माय इनी सगळी बातहुंण की चरचा होवा लागी। ६६ जिणने इनी सगळी बातहुंण के सुणी उण सगळा ने अपणा-अपणा मन माय बिचारी ने क्यो "यो बाळक कसो रेगा?" क्योँके जरूरीज परभु को हात उका पे थो।

जकरियाह की भविसबाणी

६७ अने उको पिताजी जकरियाह पवितर आतमा से भर्यो होयो, यो कई के भविसबाणी करवा लाग्यो;

६८ इसराइल को परभु परमेसर धन्य होय!

उने हमारी सुद्ध लई अने अपणा लोगहुंण के छुड़ावा को काम पूरण कर्यो हे।

६९ अने हमारा सरु अपणा दास दाऊद राजा का कुळ माय

उध्दार को एक सींग हेइयो हे,

७० पुराणा काल से अपणो वायदो

पवितर नबिहुंण का मुन्डा से केवाइयो थो।

८ १.६९ दाऊद राजा; इसराइलहुंण को पूराणो राजो अने ईसु को पुरखो।

† १.५५: उत्पत्ती १७.७ † १.५९: लेव्यव्यवस्था १२.३

७१ हमारा दुसमनहुंण से
अने हमार से बेर राखवा वाळाहुंण
से उने हमारो छुटकारो कर्यो
हे।

७२ हमारा पूरखाहुंण पे दया करे
अने अपणा पवित्तर करार के
रियाद करे,

७३ याने उ वायदो जो उने हमारा पिता
इबराइम से कर्यो थो, ७४ के
हमारे यो केवा दे के,
हम अपणा दुसमनहुंण का
हातहुंण से छुटी के डर्या
बिना,

७५ अपणा जीवन भर पवित्तरता
अने धरम से उकी सेवा करा।

७६ † "अने तू हे बाळक परमपरधान
को नबी केवायगा क्योंकि
तू परभु का अगड़े-अगड़े चली के,
उको मारग तय्यार करे हे।

७७ अने उका लोगहुंण के
उणका पापहुंण की मांफी की
वजासे उण्दार को ज्ञान देगा।

७८ हमारा परमेसर की घणी दया से
हमारा अदरे से सूरज,
याने मसीह को उजाळो चळकेगा,

७९ † याने उणका पे जो इन्दारा अने
मोत का छायाळा माय बेठ्या हे,
के हमारा पगहुंण की अगवाणी
सांती का रस्ता पे करे।"

८० अने उ बाळक बड़तो अने आतमा
माय बळवन्त होतो अने इसराइल पे

परगटवा का दन तक सुनसान जगा पे
र्यो।

ईसु को जनम

(मती १.१८-२५)

उणाज दनहुंण माय असो होयो
२ के औगुस्तुस केसर रोम का राजा
आडी से यो हुकम आयो के आखा जगत
का लोगहुंण के गिण्या जाय। २या पेली
जणगणना जदे हुई जदे क्विरिनियुस
सीरिया देस को राजपाल थो। ३सगळा
लोगहुंण नाम लिखाइने सरु अपणा-
अपणा नगर के जावा लाग्या।



बेतलहम गांम (LUK २.४)

४तो यूसफ बी इकासरु के उ दाऊद
का घराणा को थो, गलील का नासरत
नगर से यहूदिया माय दाऊद का नगर
बेतलहम गयो, ५के अपणी होवा वाळी
घराळी मरियम का गेले जो भारीपग से
थी नाम लिखाडे। ६उणके बेतलहम रेता
होया मरियम के बाळक जणवा का दन
पूरण होया। ७अने उने अपणो पेलाखोळ
को बेटो जन्म्यो, उने उके लतरा माय
लपेटिने टोपला^d माय धर्यो क्योंकि

^d २.७ टोपला; जेका माय घांस या बेलहुंण के सरु खावा की चीजहुंण राखे हे।

[†] १.७६: मलाकी ३.१ [†] १.७९: यसायाह ९.२

उणका सरु धरम साळा माय जगा नी थी।



ग्वाळाहुंण तापिर्या (Luk २.८)

ग्वाळाहुंण के सरगदूतहुंण को सुब-समिचार

८अने उना देस माय कितरा ग्वाळा था जो रात का बखत मांळ माय रई के अपणी गाडरहुंण का खाडु को नेपो करी र्या था। ९अने असमान से परभु को एक सरगदूत उणका सामे अई उबो, परभु को उजाळो उणका ऐरे-मेरे चमक्यो अने वी घणा डरी गया। १०तो सरगदूत ने उणकासे क्यो, "घबराव मती, क्योके देखो, हूं तमारे बडो आनन्द को सुब-समिचार सुणउं हूं जो सगळा मनखहुंण सरु रेगा।" ११क्योके आज राजा दाऊद का नगर माय तमारा सरु एक उध्दार करवा वाळो जन्म्यो हे। अने योज मसीह परभु हे। १२अने तमारा सरु उको यो

सेलाणी हे, के तमारे एक बाळक लतरा माय लपेट्यो अने टोपला माय लेट्यो मिळेगा।"

१३तो एक दम से उना सरगदूत का गेले सरगदूतहुंण को दळ परमेसर की इसतुती करता होया अने यो केता नगे आया।

१४के "असमान माय परमेसर की म्हेमा अने

धरती पे मनखहुंण माय सांती रे जिणकासे उ खुस हे।"

१५अने असो होयो के जदे सरगदूत उणका कने से सरग चल्या गया तो ग्वाळाहुंण माय-माय केवा लाग्या, "आव चलां! हम सुदा बेतलहम जई ने इनी बात के जो हुई अने जेके परभु ने हमारे बतई, चली के देखां।"

१६वी झट जई ने मरियम अने यूसफ कने पौंच्या अने उणने टोपला माय उना बाळक के लेट्यो होयो देख्यो। १७यो देखी के ग्वाळाहुंण ने वा बात बतई, जो उना बाळक का बारामें उणकासे सरगदूत ने कई थी।

१८अने सगळा मनख वी बात सुणी के जो ग्वाळाहुंण ने उणकासे कई, अचरज क्यो। १९पण मरियम इनी सगळी बातहुंण के अपणा हिरदा माय राखी ने उणका पे बिचार करती री। २०ग्वाळाहुंण, जसो उणकासे क्यो थो सगळो कई वसोज सुण्यो अने देखी के परमेसर की म्हेमा करता होया पाछा चल्या गया।

८ २.११ मसीह; परमेसर आडी से अभिसेक क्यो होयो, इसराइल जात अने सगळी मनख जात को उध्दार करवा वाळो।

ईसु को नाम राखणो

२१[†] आठ दन पूरण होवा पे जदे बाळक को खतणा को बखत आयो तो उको नाम ईसु राख्यो, याने उ नाम जो उकी कोख माय आवा से पेलां सरगदूत ने क्यो थो।

ईसु के मन्दर माय अरपण कर्यो जाणो

२२[†] मूसा का नेम-बिधान[†] मुजब जदे उणका सुद्ध होवा का दन पूरण होया तो वी बाळक के यरुसलेम नगर ल्याया के ईसु के परभु परमेसर के सामे अरपण करे। २३[†] जसा के परमेसर से द्या गया नेम-बिधान माय लिख्यो: "हरेक पेलांपेल को बेटो परभु सरु पवित्तर केवायगा।" २४[†] अने परमेसर से द्या गया नेम-बिधान का मुजब, "एक जोड़ो पंडुक या कबुतर का दो बच्चा लई के बली चड़ाया।"

२५[†] अने देखो, यरुसलेम माय सिमियोन नामको एक मनख थो जो धरमी अने भगत थो। उ इसराइल का सुक-चेन की बाट जोई र्यो थो अने पवित्तर आतमा उका पे थो। २६[†] अने पवित्तर आतमा ने उका पे यो परगट्यो थो के जदत्तक तू परभु का मसीह के देखी नी लेगा तदत्तक मरेगा हयनी। २७[†] उ पवित्तर आतमा का केणा से मन्दर माय आयो, अने जदे ईसु का मां-बाप परमेसर से द्यो नेम-बिधान पूरण करवा सरु बाळक ईसु के मन्दर माय लाया, २८[†] तो सिमियोन ने

बाळक के खोळा माय लई ने परमेसर की इसतुती करतो होयो केवा लाग्यो,

२९[†] "हे मालेख, अबे तू अपणा बचन

का मुजब

अपणा सेवक के सांती से बिदा होवा दे,

३०[†] क्योके म्हारी आंखहुंण ने थारो उध्दार देखी ल्यो हे।

३१[†] जेके तने सगळी जातहुंण का लोगहुंण का सामे तय्यार कर्यो हे;

३२[†] के उ गेर यहूदिहुंण सरु परकास देवा वाळो उजाळो

अने थारी नीजी परजा इसराइल सरु म्हेमा होय।"

३३[†] ईसु का बारामें की जावा वाळी बातहुंण से उका मां-बाप के अचरज होयो। ३४[†] सिमियोन ने उणके आसीस दई के ईसु की मेतारी मरियम से क्यो, "देख, तो यो बाळक इसराइल माय नरा के गिरवा अने जी उठवा को कारण बणेगा, अने असी सेलाणी होवा सरु ठेराइयो हे, जेको बिरोद कर्यो जायगा - ३५[†] जेकासे के नरा का हिरदा का बिचार परगट हुई जाय। अने तरवार थाराज पराण के बेदेगा।"

३६[†] हन्ना नाम की एक भविसबाणी करवा वाळी नबिया थी जो असेर-गोत, फनूएल की बेटी थी। वा घणी डोकरी हुई गी थी। अने ब्याव करवा का बाद सात बरस तक अपणा धणी का गेले

[†] २.२२ मूसा का नेम-बिधान; नरा बखत पेलां मूसा नबी आडी से परमेसर ने अपने नेम माय पेलांपेल का बाळक का बारामें बताडी द्यो थो।

[†] २.२१: लेव्यव्यवस्था १२.३; लूका १.३१

[†] २.२२-२४: लेव्यव्यवस्था १२.६-८

[†] २.२३: लेव्यव्यवस्था १२.६-८; निरगमन १३.२

[†] २.३२: यसायाह ४२.६, ४९.६, ५२.१०

री थी, ^{३७}तो वा चोरासी बरस की उमर तक रांडी री।^{३८}अने वा मन्दर के कदी नी छोड़ती थी, पण रात दन बरत अने बिणती करिके सेवा माय लागी रैती थी।^{३८}उनीज घड़ी वा वां अई के परमेसर के धन्यबाद देवा लागी, अने उना सगळा से बाळक का बारामें बात करवा लागी जो यरुसलेम का छुटकारा की बाट जोई र्या था।

पाछो नासरत आणो

^{३९} जदे वी परमेसर से द्यो नेम-बिधान का मुजब सगळो कई पूरण करी चुक्या, तो अपणा नगर गलील का नासरत गांम माय पाछा अई गया।^{४०}अने बाळक बड़तो, बळवन्त होतो अने ज्ञान से पूरण होतो अने परमेसर की किरपा उका पे थी।

बाळक ईसु मन्दर माय

^{४१} ईसु का मां-बाप हर बरस फसह का परब^{४२} पे यरुसलेम नगर जाया करता था।^{४२}जदे ईसु बारा बरस को होयो तो वी परब की परथा मुजब यरुसलेम गया।^{४३}उना दनहुंण के पूरण करिके जदे वी पाछा अई र्या था। तो बाळक ईसु यरुसलेम मेंज रई गयो अने मां-बाप इनी बात से अणजाण्या था।^{४४}वी या समजी के के उ जातरिहुंण का दळ का गेले होयगा एक दन का पड़ाव तक निकळी गया अने उके अपणा नातेदारहुंण

अने मिळवा वाळाहुंण माय दुंडवा लाग्या।^{४५}अने उके नी पई के वी दुंडता होया यरुसलेम पाछा आया, ^{४६}अने असो होयो के तीन दन पाछे उणने उके मन्दर माय ज्ञानिहुंण का माय बेठ्यो, उणकी बातहुंण सुणतो अने उणकासे सवाल करतो पायो।^{४७}अने सगळा मनख जो उकी सुणी र्या था उकी समज अने उका जुवाबहुंण सुणी के दंग रई गया।^{४८}अने जदे उणने उके वां देख्यो तो चकित होया अने उकी मतारी ने उकासे क्यो, "बेटा, तने हमारा साते असो बरताव कायसर कर्यो? देख, थारा पिताजी अने हूं बेचेन हुई के थारे दुंडता र्या था।

^{४९}ईसु ने उणकासे क्यो, "तम म्हारे कायसर दुंडी र्या था? कई तम नी जाणता था के म्हारे म्हारा परमेसर पिता का घर माय होणो जरूरी हे?" ^{५०}पण उने जो बात उणकासे कई वी उके समजी नी सक्या।

^{५१}जदे उ उणका गेले नासरत गांम चलयो आयो अने उणका बस माय र्यो पण उकी मतारी ने ई सगळी बातहुंण अपणा मन माय राखी।^{५२} ईसु बुद्धि डील-डोल अने परमेसर अने मनखहुंण की किरपा माय बड़तो गयो।

योहन बपतिसमा देवा वाळा को संदेसो

(मती ३.१-१२; मरकुस १.१-८; योहन १.१९-२८)

३ रोम का तिबिरियुस केसर राजा का राजकाल का पन्दरवां बरस माय,

^{३७} २.३६-३७ वा चोरासी बरस की उमर तक रांडी री; या वा ८४ से रांडी हुई चुकी थी।

^{४२} २.४१ फसह का परब; सबद् भण्डार माय देखो। ^{४३} २.४९ घर माय; या बातहुंण माय।

^{४४} २.३९: मती २.२३ ^{४५} २.४१: निरगमन १२.१-२७; नेम-बिधान १६.१-८

^{४६} २.५२: १ सेमुएल २.२६; नीतिबचन ३.४

जदे पुन्तियुस पिलातुस यहूदिया इलाका को राजपाल थो। अने देस का चार हिस्सा का सासकहुंण माय से हेरोदेस गलील को सासक थो, अने उको भई फिलिप्पुस इतूरेया अने त्रखोनीतिस को सासक थो, अने लिसानियास अबिलेने देस को सासक थो।^२ अने जदे यरुसलेम माय हन्ना अने काइफा म्हापुरोहित का पद पे था, तो परमेसर को बचन मांळ माय जकरियाह पुरोहित का बेटा योहन कने पौंच्यो।^३ योहन यरदन नदी का ऐरे-मेरे का सगळा इलाकाहुंण माय जई के पापहुंण की मांफी सरु मन बदळवा का बपतिसमा को परचार करवा लाग्यो।

४† वसोज परचार क्यो जसा की यसायाह नबी का बचनहुंण की पोथी माय पेलांसेज लिख्यो हे:

"मांळ माय एक हेला पाइवा वाळा की बाणी के हे,

'परभु को मारग तय्यार करो,
अने उकी सड़कहुंण सुदी करो।

५† हरेक घाटी पाटी जायगी,

अने हर बब्बा अने बब्डी बराबर
कर्या जायगा,

अने बांका-चुका रस्ता सुदा

अने उब्बट-खाबड़ बराबर कर्या
जायगा।

६† जदे सगळा जीव परमेसर का
उध्दार के देखेगा।" "

७† इकासरु उनी भीड़ से जो उका कने बपतिसमो लेवा चली अइरी थी, केवा लाग्यो, "हे सरप का कणाहुंण!

परमेसर आडी से आवा वाळा परकोप से भागवा सरु, केने तमारे चेताइयो?^८† मन बदळवा सरीका फळ लाव। अने अपणा मन माय यो मती बिचारो के, 'क्योंके इबराइम हमारो पिता हे।' पण हूं तमार से कूं के परमेसर इना भाटाहुंण से इबराइम सरु ओलाद पेदा करी सके हे।^९† तम असा हो जसा के कुराडो झाड़काहुंण की जड़ पे धर्यो होयो हे, इकासरु हरेक झाड़ जो अच्छो फळ नी लावे, काट्यो अने लाय माय झाँक्यो जाय हे।

१०† जदे भीड़ ने उकासे पुछ्यो, "तो हम कंई करां?"

११† योहन ने उणके जुवाब द्यो, "जेका कने दो कमीज रे, उ उणका गेले बांटी ले जिणका कने कइंज हयनी, अने जेका कने जिमवा को रे उ बी असोज करे।"

१२† थोडाक रोमी राज का कर वसुळवा वाळा बी बपतिसमो लेवा आया, अने उणने उकासे पुछ्यो, "हे गरु, हम कंई करां?"

१३† अने उने उणकासे क्यो, "जितरो लेवा को हुकम तमारे द्यो हे उकासे बती मती लीजो।"

१४† अने थोडाक सिपईहुंण ने उकासे सवाल क्यो, "अने हमारो कंई, हम कंई करां?"

उने उणकासे क्यो, "कइंका के डरई-धमकई ने पइसा मती लो अने नीज कइंका पे झुंठो दोष लगाव, पण अपणी पगार मायज पूरो पाडो।"

† ३.४-६: यसायाह ४०.३-५

† ३.६: यसायाह ४०.३-५

† ३.७: मती १२.३४, २३.३३

† ३.८: योहन ८.३३

† ३.९: मती ७.१९

† ३.१२: लूका ७.२९

१५ जदेक लोग आस लगाइया होया था, अने वी योहन का बारामें अपणा-अपणा मन माय तरक-बितरक करी र्या था के कई यो तो मसीह हयनी, १६ तो योहन ने उना सगळा से क्यो, "हूं तो तमारे पाणी से बपतिसमो दउं, पण उ जो म्हार से घणो सामरती हे, अई र्यो हे। अने हूं तो इका लायक बी नी के उकी पन्नी उठई सकूं। उज तमारे पवितर आतमा अने लाय से बपतिसमो करेगा। १७ अने तम असा हो जसा गंड अने सुक्लो क्योके उको सुपडो उका हात माय हे के उ अपणा खळा के सोरे अने गंड के अपणा कोठा माय भेळा करे, पण उ सुक्ला के नी बुजवा वाळी लाय माय बाळेगा।"

१८ अने नरी दूसरी बातहुंण के समजावा का मिसे उ उणके सुब-समिचार सुणातो र्यो। १९ पण जदे उने देस का चोथा हिस्सा का सासक हेरोदेस के उका भई फिलिप्पुस की बइरा हेरोदियास अने उना सगळा कुकरम का बारामें जो उने कर्या था फटकार्यो, २० तो उने उना सगळा कुकरम का गेले यो कुकरम बी जोड़ी ल्यो के योहन के जेळखाना माय लाखी द्यो।

ईसु को बपतिसमो

(मती ३.१३-१७; मरकुस १.९-११)

२१ असो होयो के जदे सगळा मनखहुंण ने बपतिसमो ल्यो तो ईसु ने बी बपतिसमो ल्यो। जदे ईसु पराथना करी र्यो थो तो असमान खुल्यो। २२ तो

पवितर आतमा कबुतर की कायारूप माय उका पे उतर्यो अने या अकासबाणी हुई, "तू म्हारो परमिलो बेटो हे, हूं थार से घणो खुस हूं।"

ईसु की बंसाबली

(मती १.१-१७)

२३ जदे ईसु ने अपणी सेवा सुरु करी तो उ करीब तीस बरस को थो अने असो समज्यो जातो थो उ यूसफ को बेटो थो, जो एली को, २४ जो मत्तात को, जो लेवी को, जो मलकी को, जो यन्ना को, जो यूसफ को २५ जो मत्तित्याह को, जो आमोस को, जो नहूम को, जो असल्याह को, जो नोगह को २६ जो मात को, जो मत्तित्याह को जो सिमी को, जो योसेख को, जो योदाह को २७ जो योअनन को, जो रेसा को, जो जरुब्बाबिल को, जो सालतिएल को जो नेरी को २८ जो मलकी को, जो अद्दी को, जो कोसाम को, जो इलमोदाम को, जो एर को, २९ जो येसु को जो एलीयाजर को, जो योरीम को, जो मत्तात को, जो लेवी को, ३० जो समोन को, जो यहूदा को, जो यूसफ को, जो योनान को, जो एलियाकीम को, ३१ जो मलेआह को, जो मिन्नाह को, जो मत्तात को, जो नातान को, जो दाऊद को, ३२ जो यिसे को, जो ओबेद को, जो बोअज को, जो सलमोन को जो नहसोन को, ३३ जो अम्मीनादाब को, जो अदमीन को, जो अरनी को, हिस्मोन को, जो फिरिस को, जो यहूदा को ३४ जो याकूब जो इसाक

* ३.१९-२०: मती १४.३-४; मरकुस ६.१७-१८

* ३.२२: उत्पत्ती २२.२; भजन संहिता २.७; यसायाह ४२.१; मती ३.१७; मरकुस १.११; लूका ९.३५

को, जो इबराइम को, जो तिरह को, जो नाहोर को, ^{३५}जो सरूग को, जो रऊ को, जो फिलिग को, जो एबिर को, जो सेलाह को ^{३६}जो केनान को, जो अरफक्षद को, जो सेम को, जो नूह को, जो लिमिक को ^{३७}जो मथूसिलह को, जो हनोक को, जो यिरिद को, जो महललेल को, जो केनान को, ^{३८}जो एनोस को, जो सेत को, जो आदम को अने जो परमेसर को बेटो थो।

ईसु की अजमाइस

(मती ४.१-११; मरकुस १.१२-१३)

४ ईसु पवित्तर आतमा से भर्यो होयो यरदन नदी से आयो अने आतमा उके मांळ माय अई-वई लई जातो र्यो। ^२वां चाळीस दन तक सेतान उके अजमातो र्यो, उना दनहुंण माय उने कइंज नी खायो जदे ई दन बित्या तो उके भूक लागी।

^३तो सेतान ने उकासे क्यो, "अगर तू परमेसर को बेटो हे तो इना भाटा से कइदे के रोतो बणी जाय।"

^४ ईसु ने उके जुवाब द्यो, "परमेसर का नेम-बिधान माय यो लिख्यो हे, 'मनख सिरप रोटा सेज नी जिन्दो रेगा।' "

^५तो सेतान ने उके अदरे लइ-जई के पलक झपके इतराक मेंज जग को सगळो राज अने उकी म्हानता दिखाडी। ^६अने ईसु से क्यो, "यो सगळो हक अने इको वेभव हूं थारे दई दूवां, क्योके यो म्हारे द्यो हे, अने हूं जेके चउं उके दउं।"

^७इकासरु अगर तू म्हारे सास्टांग परणाम करे तो यो सगळो थारो हुई जायगा।"

^८ ईसु ने उके जुवाब द्यो, "परमेसर का बचन माय लिख्यो हे, 'तू परभु अपना परमेसर के सास्टांग परणाम कर अने सिरप उकीज उपासणा करजे।' "

^९जदे उने ईसु के यरुसलेम नगर लइ-जई के उके मन्दर की सगळा से उंची जगा पे उबो क्यो अने उकासे क्यो, "अगर तू परमेसर को बेटो हे तो खुदज यां से कुदी जा, ^{१०} क्योके परमेसर का बचन माय लिख्यो हे, 'परमेसर सरगदूतहुंण के थारा बारामें यो हुकम देगा के वी थारी रक्सा करे,' ^{११} अने, 'वी थारे झट अपना हातहुंण माय झेली लेगा, असो नी होय के थारा पग माय भाटा से ठेस लागे।' "

^{१२} ईसु ने उकासे क्यो, "परमेसर का बचन माय क्यो हे 'तू परभु अपना परमेसर के अजमाजे मती।' "

^{१३}जदे सेतान उकी सगळी अजमाइस करी चुक्यो तो थोड़ाक बखत सरु उका कने से चल्यो ग्यो।

ईसु ने गलील से काम सुरु क्यो

(मती ४.१२-१७; मरकुस १.१४-१५)

^{१४}तो ईसु आतमा की सामरत से भर्यो होयो गलील इलाका माय पाछो आयो तो आस-पड़ोस का इलाका माय उकी चरचा फेली गी। ^{१५}उ उणका पराथनाघर माय जई के परबचन देवा लाग्यो, अने सगळा मनख उकी बड़ई करता था।

* ४.४: नेम-बिधान ८.३ * ४.८: नेम-बिधान ६.१३ * ४.१०: भजन संहिता ९१.११

* ४.११: भजन संहिता ९१.१२ * ४.१२: नेम-बिधान ६.१६

ईसु के नासरत का लोगहुंण ने नकार्यो

(मती १३.५३-५८; मरकुस ६-९-६)

१६ फेर उ नासरत आयो जां उके पाळ्यो पोंस्यो थो अने अपणी रीति मुजब सबत् का दन^१ पराथनाघर माय जई के पोथी बांचवा सरु उबो होयो। १७ अने उके जूना नबी यसायाह भविसबाणी करवा वाळा की पोथी दई गी। उने पोथी खोली के वा जगा हेडी जां लिख्यो थो,

१८ "परभु को आतमो म्हार पे हे, क्योके उने गरीबहुंण के सुब-समिचार सुणावा सरु म्हारे छांट्यो हे।

उने म्हारे मोकल्यो के हूं बन्दिहुंण के छुड़ावा की

अने आंदाहुंण के आंख पावा को समिचार दउं

अने दब्या होया के उठउं,

१९ "अने परभु की किरपा का बखत की डुण्डी पिटूं,

जदे के परभु अपना लोगहुंण के बचाड़ेगा।"

२० जदे उने पोथी बन्द करी ने सेवक का हात माय दई दी अने बेठी गयो।^क पराथनाघर का सगळा मनखहुंण की नगे उका पे टिकी थी २१ तो उ उणकासे केवा लाग्यो, "आज यो लिख्यो तमारा सुणता होया पूरण होयो।"

२२ सगळा मनखहुंण ने उकी बड़ई करी अने उका मुन्डा से किरपा का जो बचन हिटी र्या था उणका पे अचरज कर्यो अने केवा लाग्या, "कई यो यूसफ को बेटो हयनी?"

२३ उने उणकासे क्यो, "बेसक तम म्हारा बारामें यो केवाडो कोगा: 'हे बेद, खुद केज नज कर! जो कई हमने सुण्यो के कफरनहूम नगर माय कर्यो, उ यां अपना नगर मायज कर।' " २४ उने क्यो, "हूं तमारे सांची कूं के कइंकोज भविसबाणी करवा वाळो अपना नगर माय मान नी पाय।

२५ "पण हूं तमार से खास बात कूं के जूना नबी एलियाह का दनहुंण माय जदे साड़ा तीन बरस सुको पड़्यो अने आखा देस माय घोर बिखो पड़्यो तो इसराइल देस माय नरी रांडिहुंण थी। २६ पण सेदा देस का सारपत नगर की रांडी बड़रा का अलावा एलियाह के कइंका हजु कने परमेसर ने नी मोकल्यो। २७ अने एलीसा नबी का दनहुंण माय इसराइल माय नरा कोइया था पण सीरिया देसवासी नामान का अलावा कई को हजु सुद नी कर्यो थो।"

२८ जदे पराथनाघर का मनखहुंण ने ई बातहुंण सुणी तो वी रीस माय अई गया, २९ अने उणने उठी के उके नगर का बायरे हेडी लाख्यो। जेनी बब्डी पे उणको नगर बस्यो थो, उकी चोंटी पे

^१ ४.१६ सबत् का दन; यहूदिहुंण को पवितर छुट्टी को दन सुक्करवार से थावर की सांज तक। इना दन माय कइंज नी करे सिरप पराथना घर माय जई के अराधना-उपासणा करे। ^क ४.२० बेठी गयो; लोग उबा हुई के धरम सासतर माय से बांचे हे पण लोगहुंण के सीखाइवा सरु ईसु बेठी गयो।

^१ ४.१८-१९: यसायाह ६१.१-२ ^१ ४.१९: यसायाह ६१.१-२ ^१ ४.२४: योहान ४.४४

^१ ४.२५: १ राजा १७.१ ^१ ४.२६: १ राजा १७.८-१६ ^१ ४.२७: २ राजा ५.१-१४

लई गया के वां से उके निच्चे धक्को दई दे। ^{३०}पण उ उणका माय से निकली के चल्थो ग्यो।

बायरबादा के हेइणो

(मरकुस १.२१-२८)

^{३१}अने उ गलील का निच्चे का एक कफरनहूम सेर-गांम माय आयो अने सबत् का दनहुंण माय लोगहुंण के परबचन देतो थो। ^{३२}लोग उकी सीख से अचरज करता था क्योंकि उ हक से परबचन देतो थो। ^{३३}पराथनाघर माय एक मनख थो जेका माय बायरबादा/ समई थी। उ घणी जोर से चिल्लाइयो, ^{३४}"हे नासरत का ईसु! हमारे थार से कंई काम? कंई तू हमारे नास करवा आयो? हूं जाणूं के तू कुंण हे - परमेसर आडी से आवा वाळो पवित्तर जणो!"

^{३५}ईसु ने या कई के उके डांट्यो, "छानो रे! उका माय से हिटी जा!" तो बायरबादा से भर्या मनख के अदाइ माय पटकी ने बिना नुकस्यान के बायरबादा उका माय से हिटी गी।

^{३६}इका पे सगळा मनख चकित होया अने माय-माय बातहुंण करी ने केवा लाग्या, "यो कसो बचन हे? क्योंकि उ हक अने सामरत से बायरबादाहुंण के हुकम दे हे, अने वी हिटी जाय हे।" ^{३७}अने आस-पड़ोस का इलाका माय हर जगा पे उकी चरचा फेलती गी।

ईसु ने नरा लोगहुंण के नज कर्या

(मती ८.१४-१७; मरकुस १.२९-३४)

^{३८}फेर उ उठ्यो अने पराथनाघर से हिटी के सिमोन का घरे ग्यो, वां सिमोन की सासु घणा बुखार माय पड़ी थी अने चेलाहुंण ने सासु सरु ईसु से बिणती करी। ^{३९}ईसु ने उका कने उबो हुई ने बुखार के डांट्यो अने बुखार उतरी ग्यो अने वा उनीज घड़ी उठी के सेवा-चाकरी माय लागी गी।

^{४०}जदे दन अथणवा लाग्यो^m तो वी सगळा जिणका यां नरी-तरा का रोग से रोगिहुंण बेमार था, उणके उका कने लाया अने उने हरेक पे हात धरी के नज करी लाख्या। ^{४१}बायरबादाहुंण बी नरा मनखहुंण माय से चिल्लाडी अने या केती हिटी गी, "तू परमेसर को बेटो हे!"

पण उ उणके डांटतो अने बोलवा नी देतो थो, क्योंकि वी जाणती थी के उ मसीह हे।

ईसु पराथनाघरहुंण माय

(मरकुस १.३५-३९)

^{४२}जदे दन हिट्यो तो उ निकली के सुणी जगा माय चल्थो ग्यो। पण मनख को झुंड उके ढुंडतो होयो उका कने पोंच्यो उणने यो चायो के उ उणका कने से नी जाय। ^{४३}पण उने उणकासे क्यो, "म्हारे दूसरा नगरहुंण

^l ४.३३ बायरबादा; बुरी आतमा। ^m ४.४० जदे दन अथणवा लाग्यो; सबत् का दन को आखरी बखत।

^f ४.३२: मती ७.२८-२९

माय बी परमेसर का राज" को सुब-समिचार सुणाणो जरूरी हे, क्योंकि हूं इनाज काम सरु परमेसर आड़ी से मोकल्यो हूं।"

४४ अने उ यहूदिहंण का इलाका का पराथनाघरहंण माय परचार करतो र्यो।

पेलांपेल चेलाहंण के तेइयो जाणो

(मती ४.१८-२२; मरकुस १.१६-२०)

† एक बखत, जदके भीड़ ईसु के चारी-मेर से घेरी के परमेसर को बचन सुणी री थी, उ गन्नेसरत का सरवर कराड़ा पे उब्यो होयो थो। ^२उके सरवर कराड़े लागी हुई दो नावहंण नगे अई, पण भोईहंण उणका माय से उतरी के अपणा-अपणा जाळ धोई र्या था। ^३उ उणका माय की एक नाव पे चडी गयो जो सिमोन की थी अने उने उकासे क्यो, "नाव के कराड़ा से रजिक दूरो सरकई ले।" अने उ नाव पे बेठिके भीड़ के परबचन देवा लाग्यो।

४ ईसु ने परबचन खतम करवा का बाद सिमोन से क्यो, "नाव के उन्डा पाणी माय लई चल अने मच्छी पकड़वा सरु अपणो जाळ लाखो।"

५† सिमोन ने उके जुवाब द्यो, "हे मालेख हमने आखी रात घणी म्हेनत करी, पण कइंज हात नी लाग्यो। फेर बी थारा केणा पे हूं जाळ लाखुंवां।"

६† जदे उने असो क्यो तो नरी

मच्छीहंण घेरी लाया अने उणका जाळ फाटवा लाग्या। ^७इका पे उणने अपणा सातिहंण के जो दूसरी नाव पे था इसारो क्यो के अई के हमारी मदद करो। अने उणने अई के दोइज नावहंण के यां तक भरी लाखी के वी डुबवा लागी। ^८पण जदे सिमोन पतरस ने यो देख्यो तो ईसु का पगहंण पे यो केतो होयो पड़ी गयो, "हे परभु, म्हारा कने से चल्यो जा क्योंकि म्हेने थारी बात पे बिसास नी क्यो इकासरु हूं पापी मनख हूं।"

९ क्योंकि इतरी मच्छीहंण घेरी लाणे से उके अने उका सातिहंण के अचरज



मच्छीहंण से भरी जाळ (LUK ५.७)

[॥] ४.४३ परमेसर का राज; ईसु की सीख की खास बात या थी के परमेसर एक राजा को जसो आखा जगत पे राज करे हे। जो उका नेम-बिधान के माने वी आसीस पाया। ईसु ने खुद अपना जीवन से एक अच्छी मिसाल दई परमेसर का राज का नेम-बिधान को हुकम मानी के, जेने परमेसर से म्हेमा बी पई।

† ५.१-३: मती १३.१-२; मरकुस ३.९-१०, ४.१

† ५.५: योहन २१.३

† ५.६: योहन २१.६

होयो। ^{१०}असोज जव्दी का बेटा याकूब अने योहन बी जो सिमोन का बांटेदार था अचरज होयो।

पण ईसु ने सिमोन से क्यो, "मती डर! अबे से तू मनखहुंण के परमेसर कने लायगा।" ^{११}जदे वी अपणी नावहुंण के कराड़ा पे लाया तो सगळो कंई वांज छोड़ी के उका पाछे चली पड़्या।

कोइया के सुद्ध कर्यो जाणो

(मती ८.१-४; मरकुस १.४०-४५)

^{१२}असो होयो के जदे उ कइंका नगर माय थो तो देखो, वां एक कोइयो मनख थो। जदे उने ईसु के देख्यो तो सास्टांग परणाम करिके बिणती करवा लाग्यो, "हे परभु, अगर तू चावे तो म्हारे सुद्ध करी सके।"

^{१३}ईसु ने अपणो हात अगड़े कर्यो अने उकासे चौंटेई के क्यो, "हूं चउं; जा, तू सुद्ध हुई जा।" अने झट उ कोइयो सुद्ध हुई ग्यो। ^{१४}उने उके हुकम द्यो, "कइंका से मती किजे, पण जई के अपणे खुद के पुरोहित के दिखाइ। अने अपणा सुद्ध होवा का बारामें जसो मूसा ने हुकम द्यो हे, चड़ावो चड़ा इका से पुरोहित अने लोगहुंण पे गवाई रेगा।"

^{१५}पण उकी चरचा दूर-दूर तक फेलती जई री थी, अने बड़ीमेक भीड़ उकी सुणवा अने अपणी बेमारिहुंण से नज होवा सरु भेळी हुइरी थी। ^{१६}पण

उ खुद अकसर सुनी जगा माय छाने-छाने जई के पराथना कर्या करतो थो।

'मनख का बेटा के' पाप मांफ अने नज करवा को हक

(मती ९.१-८; मरकुस २.१-१२)

^{१७}एक दन की बात हे के उ परबचन दई र्यो थो, अने थोडाक फरीसी अने नेम-बिधान का गरु^१ वां बेठ्या था जो गलील अने यहूदिया का हरेक गांम अने यरुसलेम नगर से आया था। अने नज करवा सरु परभु परमेसर की सामरत उका गेले थी। ^{१८}अने देखो, लकवा का मार्या एक मनख के खाट पे थोडाक मनख उठई के लई र्या था। वी उके भितरे लई के ईसु का सामे राखवा को जतन करी र्या था। ^{१९}भीड़ की वजासे उके भितरे लावा को जदे कई को उपाव नी सुज्यो तो उणने घर अदरे चड़िने खापराहुंण हेड़ी के खाट सुदा उके बीच माय ईसु का नरू सामे उतारी द्यो। ^{२०}उणको बिसास देखी ने उने क्यो, "दोस,^२ म्हने थारा पाप मांफ कर्या।"

^{२१}जदे सासतरी अने फरीसी तरक-बितरक करिके केवा लाग्या, "यो मनख कुंण हे जो परमेसर की बुरई करे? परमेसर के छोड़ी के हजु कुंण पापहुंण के मांफ करी सके?"

^{२२}पण ईसु ने उणका तरक-बितरक भांपी के जुवाब द्यो, "तम अपणा हिरदाहुंण माय कंई तरक-बितरक करी

^० ५.१२ म्हारे सुद्ध करी सके; इनी (कोइ) व्यादी से जो मनख हे उके सासतर का मुताबिक असुद्ध मान्यो जातो थो। ^१ ५.१७ नेम-बिधान का गरु; या सास्त्रीहुंण। ^२ ५.२० दोस; यूनानी माय, मनख।

^३ ५.१४: नेम-बिधान १४.१-३२

र्या हो? ^{२३}कई सबगो हे? यो केणो के 'थारा पाप मांफ होय' या यो के 'उठ्या अने चल्थो-फर'? ^{२४}पण इकासरु के तम जाणी जाव के हूं मनख का बेटा के धरती पे पाप मांफ करवा को हक हे।" उने लकवा का मार्या से क्यो, "हूं थार से कूं, उठ्या, अने अपणी खाट उठई ने घरे चल्थो जा।"

^{२५}उ उनीज बखत उणका सामे उबो होयो, अने जेनी खाट पे उ पड़्यो होयो थो उके उठई के परमेसर की बड़ई करतो होयो घरे चल्थो गयो। ^{२६}वी सगळा का सगळा अचरज माय पड़ी के परमेसर की बड़ई करवा अने घणा डरी के केवा लाग्या, "आज हमने अनोखी बातहुंण देखी हे।"

लेवी के तेइयो जाणो

(मती ९.९-१३; मरकुस २.१३-१७)

^{२७}इका बाद उ बायरे गयो अने लेवी नामको एक नाको वसुळवा वाळा के उने नाका पे बेठ्यो देख्यो अने उने उकासे क्यो, "म्हारा पाछे हुई जा।" ^{२८}इका पे उ सगळो कई छोड़ी के उठ्यो अने ईसु का पाछे चली पड़्यो।

^{२९}तो लेवी ने अपणा घरे उणका सरु एक बड़ो भोज कर्यो अने वां नाका वसुळवा वाळा अने दूसरा लोगहुंण के जो उका गेले जिमवा बेठ्या था, एक बड़ीमेक भीड़ थी। ^{३०} इका पे फरीसी अने उणका सासतरी ईसु का चेलाहुंण से यो कई के

कुड़वा लाग्या, "तम कर वसुळवा वाळा अने पापिहुंण का गेले कायसरु खाव-प्यो हो?"

^{३१}ईसु ने जुवाब द्यो, "अच्छा-माठाहुंण के बेद की जरुवत हयनी पण बेमारहुंण के हे।" ^{३२}हूं धरमिहुंण के नी पण पापिहुंण के मन बदळवा सरु तेइवा आयो हूं।"

ईसु की बरत का बारामें सीख

(मती ९.१४-१७; मरकुस २.१८-२२)

^{३३}लोगहुंण ने उकासे क्यो, "योहन का चेला अकसर बरत राखे अने पराथना कर्या करे, अने फरीसिहुंण का चेला बी असोज करे, पण थारा चेलाहुंण तो सदा खावे-पीवे हे।"

^{३४}ईसु ने उणकासे क्यो, "जदतक लाड़ो उणका गेले हे, कई तम उका बरात्याहुंण से बरत करवई सको हो? ^{३५}पण वी दन आयगा जदे लाड़ो उणकासे इकाड़ी कर्यो जायगा। तो उना दनहुंण वी बरत राखेगा।"

^{३६}उने उणका से मिसाल माय क्यो: "कइंको मनख नवा लतरा माय से बटको फाड़ी ने जूना लतरा माय थेगळो नी लगावे, नी तो नवो तो फाटेगाज पण जूना लतरा पे नवो बटको जंचेगाज नी।" ^{३७}अने कई को नवो दाखरस जूनी मसख माय नी भरे, नी तो नवो दाखरस मसखहुंण फाड़ी के बड़ जायगा अने मसखहुंण खतम हुई जायगा। ^{३८}पण नवो दाखरख

^१ ५.२४ हूं मनख का बेटा; इना कथन के ईसु ने खुद अपणा सरु काम माय ल्यो। इका तीन अरथ हिटे हे - १. ईसु अपणा खुद का बारामें कई र्यो हे। २. उ सांचा मनख का बारामें कई र्यो हे। ३. उ पिता परमेसर से सामरत अने हक के पई के हमेस्या-हमेस्या को सासन करेगा (दानियल ७.१४)।

^१ ५.३०: लूका १५.१-२

नवी मसकहुंण मेंज भरणो चावे। ^{३९}जूनो दाखरस पीके कई को नवा की चायना नी करे, क्योंकि उके जूनोज अच्छे लागे हे।"

ईसु सबत् को बी परभु हे

(मती १२.१-८; मरकुस २.२३-२८)

† कईका सबत् का दन असो होयो के
६ ईसु खेत माय से हिटी र्यो थो अने उका चेलाहुंण गंड की उम्बी तोड़ी-तोड़ी के अने हतेली से मसळी ने फूकी के फांकी र्या था। ^२तो थोडाक फरीसिहुंण ने क्यो, "तम असो काम कायसरु करो हो जो सबत् का दन करनो यहूदी नेम का मुजब ठीक हयनी?"

३† ईसु ने जुवाब द्यो, "कई तमने यो बी ने बांच्यो के जदे दाऊद अने उका सातिहुंण के भूक लागी तो उने कई कर्यो? ^४† उ परमेसर का मन्दर माय ग्यो अने चड़ावा का रोटा लई के खुद खाया जिणके नेम-बिधान का मुजब सिरप पुरोहितज खई सकता था कईका दूसरा नी। पण उने अपणा सातिहुंण के बी खवाइया।"

५अने उने यो बी क्यो, "क्योंके हूं मनख को बेटो सबत् को बी परभु हूं।"

सबत् का दन सुक्या हात वाळा के नज करनो

(मती १२.९-१४; मरकुस ३.१-६)

६कईका दूसरा सबत् का दन असो होयो के उ पराथनाघर माय जई ने

परबचन देवा लाग्यो। अने वां एक मनख थो, जेको जीवणो हात सुक्यो होयो थो। ^७सासतरी अने फरीसी इनी फिराक माय था के देखां उ सबत् का दन नज करे के नी, जेकासे के उणके उका पे दोष लगावा सरु मोको मिळी सके। ^८पण उ उणका बिचारहुंण के जाणतो थो उने सुक्या हात वाळा से क्यो, "उठी के सामे अई जा।" उ उठ्यो। ^९फेर ईसु ने उणकासे क्यो, "हूं तमार से पुछूं! कई सबत् का दन भलो करनो ठीक हे के बुरो करनो, जीव बचाणो के मारनो?" ^{१०}फेर उने सगळा आड़ी देखी ने उकासे क्यो, ^{११}† "अपणो हात अगड़े कर!" उने जसोज कर्यो, उको हात पूरण रुप से नज हुई ग्यो।

११इका पे फरीसी अने सासतरी आपा से बायरे हुई गया, माय-माय तरक-बितरक करिके केवा लाग्या के हम ईसु का गेले कई करां?

बारा परेरितहुंण

(मती १०.१-४; मरकुस ३.१३-१९)

१२उणाज दनहुंण माय उ परबत पे पराथना करवा हिट्यो अने आखी रात परमेसर से पराथना करवा माय बिताडी दी। ^{१३}जदे दन उग्यो तो उने अपणा चेलाहुंण के अपणा कने तेइया अने उणका माय से बारा चेला छांटी के उणका 'परेरित'† नाम राख्या, याने ^{१४}सिमोन जेको नाम उने पतरस बी राख्यो अने उको भई अन्द्रियास, याकूब अने योहन,

^{३९} ६.१० क्यो; थोडाक मूल माय करोध से क्यो। ^१ ६.१३ परेरित; खास काम सरु मोकल्यो जाणो, ईसु की सीख सरु मोकल्यो जाणो। ईसु की सीख को परचार करवा वाळा अने ईसु का हक से बायरबादा हेइवा वाळा (मरकुस ३.१४-१५)।

[†] ६.१: नेम-बिधान २३.२५

[†] ६.३-४: १ सेमुएल २१.१-६

[†] ६.४: लेव्यव्यवस्था २४.९

फिलिप्पुस, बरतुलमे, ^{१५}मत्ती, थोमा, हलफई को बेटो याकूब अने सिमोन जो जेलोतेस^{१६} केवाय, ^{१६}अने याकूब को बेटो यहूदा, अने यहूदा इस्करियोती जो दगाबाज हिट्यो जेने ईसु के पकड़ायो।

ईसु ने भीड़ माय से नरा के नज कर्या

(मत्ती ४.२३-२५)

^{१७}उका बाद उ चेलाहुंण का गेले निच्ये उतरी के बराबर जगा पे उबो होयो, अने उका चेलाहुंण की बड़ी भीड़ का गेले आखा यहूदिया, यरुसलेम अने सूर अने सेदा का समन्दर कराड़ा से घणा मनखहुंण वां हाजिर था। ^{१८}वी उको परबचन सुणवा अने बेमारी से नज होणे सरु आया था। अने वी जो बायरबादाहुंण का सताइया होया था नज कर्या जई र्या था। ^{१९}सगळा मनख उकासे चोंटवा की कोसिस करी र्या था, क्यौंके उका माय से सामरत हिटती अने उण सगळा के नज करी री थी।

आसीस अने सराप

(मत्ती ५.१-१२)

^{२०}तो उ अपणा चेलाहुंण आड़ी देखी के केवा लाग्यो,

"धन्य हो तम जो दीन हो,

क्यौंके परमेसर को राज तमारो हे।

^{२१}"धन्य हो तम जो अबी भूका हो

क्यौंके तिरप कर्या जावगा।

"धन्य हो तम जो अबी रोव हो,
क्यौंके तम हंसोगा।

^{२२}"धन्य हो तम जदे हूं मनख का बेटा की वजासे लोग तमार से घिरणा करे, तमारे छोड़ी लाखे, तमारी घणी बुरई करे अने बुरो समजी के तमारो नाम काटी लाखे। ^{२३}उना दन तम खुस हुई ने उच्छळजो, कूद जो, क्यौंके सरग माय तमारा सरु बड़ो फळ हे। हूं तमार से कूं क्यौंके उणका पूरखाहुंण बी भविसबाणी करवा वाळाहुंण का साते असोज कर्या करता था।

^{२४}"पण तमार पे हाय जो अबे धणी हो,
क्यौंके तम अपणा सुक को पूरो फळ पई र्या हो।

^{२५}"हाय तमार पे जो अबे तिरप हो,
क्यौंके तम भूका रोगा।

"हाय तमार पे जो अबे हंसी र्या हो,
क्यौंके तम दुःख मनावगा अने रोवगा।

^{२६}"हाय तमार पे जदे सगळा मनख तमारी बड़ई करे, क्यौंके उणका पूरखाहुंण ने बी झुंटा नबिहुंण^१ का गेले असोज बरताव कर्यो थो।

बेरिहुंण से परेम

(मत्ती ५.३८-४८; ७.१२अ)

^{२७}"पण हूं तम सुणवा वाळाहुंण से कूं, अपणा बेरिहुंण से परेम राखो; जो तमार से घिरणा करे, उणका गेले भलो

^१ ६.१५ जेलोतेस; यहूदी राष्ट्रवादी पालटी को सदस्य। ^२ ६.२६ झुंटा नबिहुंण; लोगहुंण ने झुंटा भविसबाणी करवा वाळाहुंण की बड़ई करी थी क्यौंके जो बात लोगहुंण के भाती थी वीज केता था पण परमेसर ने उणके सजा दई। असोज लोगहुंण ने सांचा भविसबाणी करवा वाळाहुंण के सताइयो थो, क्यौंके उणकी सीख नी भाती थी पण परमेसर ने इणके इनाम द्यो थो।

^३ ६.२२: १ पतरस ४.१४ ^४ ६.२३: २ इतयास ३६.१६; परेरितहुंण ७.५२

करो। ^{२८}जो तमारे कोसे उणके आसीस दो, जो तमारा गेले बुरो बरताव करे उणका सरु पराथना करो। ^{२९}जो कई को तमारा एक गाल पे झापट मारे उका आड़ी दूसरो बी करी लाखो। जो तमारो कोट तमार से छुड़ई ले उके कुड़तो लेवा से बी मती रोको। ^{३०}जो कई को तमार से मांगे उके दो, अने जो कई को तमारी चीज छुड़ई ले उकासे पाछो मती मांगो। ^{३१} जसा के तम चाव के मनख तमारा गेले करे, तम बी उणका गेले वसोज करो।

^{३२}"अगर तम अपणा परेम करवा वाळाहुंण सेज परेम राखो तो इका माय तमारी कई बड़ई? क्योंकि पापी बी तो अपणा परेम करवा वाळाहुंण से परेम करे हे। ^{३३}अगर तम अपणा गेले भलई करवा वाळा का गेलेज भलई करो तो इका माय तमारी कई बड़ई? क्योंकि पापी बी असोज करे हे। ^{३४}अगर तम उणकेज उदार दो जिणकासे लेवा की आस हे तो इका माय तमारी कई बड़ई? क्योंकि पापी, पापिहुंण के उदार दे हे के उतरोज पाछो लई ले। ^{३५}पण अपणा बेरिहुंण से परेम राखो अने भलई करो, उदार दई के लेवा की आस मती राखो। तो तमारा सरु बड़ो फळ रेगा अने तम परमपरधान की ओलाद केवावगा, क्योंकि उ खुदज नासुकरा, अने बुराहुंण पे किरपालु हे। ^{३६}जसो तमारो पिता दयालु हे वसाज तम बी दयालु बणो।

कइंका पे बी दोष नी लगाइनो

(मती ७.१-५)

^{३७}"कइंका को न्याव मती करो तो तमारो बी न्याव नी कर्यो जायगा। कइंका के दोषी मती ठेराव तो तम बी दोषी नी ठेराइया जावगा। मांफ करो तो तम बी मांफ कर्या जावगा। ^{३८}दूसरा लोगहुंण के दो, तो तमारे बी द्यो जायगा। वी तमारा खोळा माय पूरो-पूरो मांपी के दबई-दबई के हलई-हलई ने उबरातो होयो लाखेगा। क्योंकि जेना मांप से तम दूसरा सरु मांपो हो, उणाज मांप से तमारा सरु बी मांप्यो जायगा।


^{३९} उने उणके मिसाल माय क्यो: "कई एक आंदो दूसरा आंदा के बाट दिखाडी सके? कई वी दोइज खाड़ा माय नी पड़ेगा? ^{४०} चेलो, गरु से मोटो नी रे पण पूरण ज्ञान होवा पे हर चेलो गरु सरीको हुई जाय हे।

^{४१}"तू अपणा भई की आंख का तरकला के कायसरु देखे, कई थारे थारी आंख मायको भारो नी सुजे? ^{४२}जदे तू थारी आंख मायका भारा के नी देखी सके, तो अपणा भई से कसे कई सके, 'हे भई, म्हारे थारी आंख को तरकलो हेड़ लेवा दे'? हे ढोंगी, पेलं तू अपणी आंख मायको भारो तो हेड़ी ले! फेर तू अपणा भई की आंख का तरकला के हेड़वा सरु सई-सई देखी सकेगा।

[†] ६.३१: मती ७.१२

[†] ६.३९: मती १५.१४

[†] ६.४०: मती १०.२४-२५; योहन् १३.१६, १५.२०



अंगूर (LUK ६.४४)

जसो झाड़ वसो फळ

(मती ७.१६-२०; १२.३३-३५)

४३ "कइंकोज अच्छो झाड़ हयनी जेका पे खराब फळ लागता हो। अने नी कई को बुरो झाड़ हे जेका पे अच्छो फळ लागे। ४४† हर झाड़ अपना फळहुंण सेज पेचाण्या जाय हे। लोग कांटाळी झाड़िहुंण से अंजीर भेळा नी करे अने नी बोरजाळी से अंगूर। ४५† वसोज भलो मनख अपना हिरदा का भला खजाना से भली बातहुंणज हेड़े पण खोटो मनख अपना हिरदा का बुरा खजाना से खोटी बातहुंण हेड़े हे, क्योंकि जेनी बातहुंण से उको हिरदो भर्यो होय, उनीज बातहुंण के उ मुन्डा पे लाय हे।

दो घर की नीम

(मती ७.२४-२७)

४६ "जो हूं कूं जदे तम उके नी मानो तो म्हारे, 'हे परभु, हे परभु' कायसरु को हो? ४७ जो कई को म्हारा कने आवे अने म्हारी बातहुंण के सुणी के उणके माने, हूं बतउं के उ किका सरीको हे: ४८ उ उना मनख सरीको हे जेने घर बणावा सरु उन्डो खोदी के सिल्ला पे नीम राखी, अने जदे पूर अई पाणी की धारहुंण उना घर से टकरई तो उके हलई नी सकी क्योंकि उ घर पक्को बण्यो थो। ४९ पण उ जेने सुण्यो तो जरूर पण उका सरीको नी चल्यो, उना मनख सरीको जेने बिना नीम खोदी जमीन पेज घर बणायो! जदे पूर अई तो पाणी की धारहुंण उकासे टकरई तो उ घर जदेज पड़ी गयो अने पूरो खतम हुई गयो।"

रोमी हाकिम का सेवक के नज करनौ

(मती ८.५-१३)

जदे उ लोगहुंण के पूरो परबचन ७ सुणई चुक्यो तो कफरनहूम माय आयो। २ अने कइंका रोमी सुबेदार को खास सेवक थो जो बेमारी से मरवा पे थो। ३ जदे उने ईसु का बारामें सुण्यो तो थोड़ाक बुडा-हाड़ा यहूदिहुंण के उका कने या बिणती करवा मोकल्या के अई के म्हारा सेवक के बचइले। ४ जदे वी ईसु कने पौंच्या तो उणने उकासे यो केता होय बिणती करी के, "उ इतरो लायक हे के तू उका पे दया कर, ५ क्योंकि उ हमारी

† ६.४४: मती १२.३३

† ६.४५: मती १२.३४

जात से परेम राखे हे अने उनेज हमारा इना पराथनाघर के बणायो हे।"

६ईसु उणका गेले-गेले चलयो अने जदे घर से जादा दूर नी थो तो सुबेदार ने अपणा दोस के यो केवा मोकल्यो, "हे परभु, तू जादा परेसान मती हो, क्योके हूं इका लायक हयनी के तू म्हारा घरे आय। ७इनीज वजासे म्हने खुद के इका लायक नी समज्यो के थारा कने अउं। सिरप बचन बोली दे तो म्हारो सेवक नज दुई जायगा। ८हूं बी दरसल सासन का बस माय हूं, अने सिपईहुंण म्हारा बस माय रे। हूं एक से कूं 'जा' तो उ जावे हे, अने दूसरा से कूं 'आ' तो उ आवे हे, अने हूं अपणा सेवक से कूं 'यो कर' तो उ उके करे हे।"

९जदे ईसु ने यो सुण्यो तो उके अचरज होयो अने उने भीड़ आड़ी फरिके जो उका पछड़े चली अइरी थी क्यो: "हूं तमार से कूं के इसराइल जात माय बी म्हारे असो बड़ो बिसास नी मिळ्यो।"

१०अने जो लोग सुबेदार ने मोकल्या था उणने घरे आवा पे उना सेवक के भलो-चंगो पायो।

रांडी बड़रा का जुवान छोरा के मर्या माय से जिवाड़े

११इका झट बाद" उ नाईन नाम का नगर आड़ी गयो। उका चेलाहुंण बी उका गेले चली र्या था, अने उणका गेले घणी बडीमेक भीड़ बी चली री थी। १२जदे उ नगर का फाटक पे पौंच्यो तो, लोग एक मुरदा के बायरे लड़-जई र्या था। उ उकी

मेतारी को जो रांडी बड़रा थी एखलोज बेटो थो, अने नगर का नरा लोग उका गेले था। १३रांडी बड़रा के देखी के परभु के उका पे घणी दया अई अने उने क्यो, "रोवे मती।" १४फेर उने कने अई के अरथी के हात लगाइयो अने कन्दो देवा वाळा थमी गया। तो उने क्यो, "हे जुवान, हूं थार से कूं, उठ्या।" १५मुरदो उठी बेठ्यो अने बोलवा लाग्यो, ईसु ने उके उकी मेतारी के दई द्यो।

१६सगळा लोग डरी गया अने वी यो केता होया परमेसर की बड़ई करवा लाग्या: "हमारा अदाइ माय एक बड़ो नबी परगट्यो हे।" अने "परमेसर ने अपणा लोगहुंण पे किरपा करी हे।"

१७उका बारामें यो समिचार आखा यहूदिया देस माय अने ऐरे-मेरे का आखा इलाका माय फेली गयो।

योहन का चेलाहुंण के ईसु को ज्वाब

(मती ११.२-१९)

१८योहन का चेलाहुंण ने इनी सगळी बातहुंण को समिचार योहन के द्यो। १९तो योहन ने अपणा चेला माय से दो के बुलाडी के उणके परभु कने यो पुछवा मोकल्या, "कई उ आवा वाळो तूज हे के, हम फेर कइंका दूसरा की बाट जौंवा?"

२०जदे वी लोग उका कने आया तो उणने क्यो, "योहन बपतिसमा देवा वाळा ने हमारे थारा कने यो पुछवा मोकल्या हे, 'कई आवा वाळो तूज हे के, फेर हम कइंका दूसरा की बाट जौंवा?' "

२१ उनीज घड़ी ईसु ने नरा लोगहुंण के बेमारिहुंण, दुःखहुंण अने बायरबादाहुंण से छुड़ई के नज कर्या अने नरा लोगहुंण जो आंदा था, देखवा लाग्या। २२ तो उने उणकासे क्यो, "जो कई तमने देख्यो अने सुण्यो, जई के योहन के बताड़ो! आंदा देखे हे, पांगळा चले हे, कोइया सुद्ध कर्या जई र्या हे, बेर्याहुंण सुणे हे, मुरदा जिवाइया जाय हे, अने गरीब-गुरबाहुंण के सुब-समिचार सुणायो जाय हे। २३ अने धन्य वी हे जो म्हारा बारामें सक नी करे।

२४ जदे योहन का चेलाहुंण चल्या गया तो ईसु भीड़ से योहन का बारामें बात करवा लाग्यो, "तम मांळ माय कई देखवा गया था? बायरा से हलता होया बरु के? नी! २५ तो फेर कई देखवा गया था? असा मनख के जो नरम लतरा पेर्यो होयो थो? नी! देखो, वी जो चळकण्यां लतरा पेरे अने भोग-बिलास माय रे हे, राजम्हेल मेंज मिळे हे! २६ पण तम कई देखवा गया था? कई नबी के? हां, हूं तमार से कूं के नबी से बी मोटा के। २७ यो उज हे, जेका बारामें लिख्यो हे, 'देख हूं अपना दूत के थारा अगड़े मोकलुं। उ थारा अगड़े थारो मारग तय्यार करेगा।' २८ हूं तमार से कूं के नारीहुंण से जो जन्म्या हे उणका माय से कइंकोज योहन से मोटो हयनी। फेर बी उ जो परमेसर का राज माय नानो से नानो हे उ उकासे बड़ी के हे।

२९ पण आम-जनता अने कर वसुळवा वाळाहुंण ने बी योहन की सगळी बात

सुणी तो योहन से बपतिसमो लई के परमेसर की योजणा के मानी ली। ३० पण फरीसी अने परमेसर का नेम-बिधान का जाणकारहुंण ने योहन से बपतिसमो नी लई के अपना बारामें परमेसर की योजणा के नी मानी।

३१ "तो हूं इनी पीड़ी का लोगहुंण को मिलाण किकासे करूं? ई किका सरीका हे? ३२ ई उना बाळकहुंण सरीका, जो हाट माय बेठ्या रे अने एक दूसरा से हेला पाड़ी के के, 'हमने तमारा सरु बंसी बजई पण तम नाच्या हयनी; हमने रुदन कर्यो पण तम नी रोया।' ३३ क्योँके योहन बपतिसमा देवा वाळो नी तो रोटो खातो आयो अने नी दाखरस पीतो आयो, पण तम को हो 'उका माय बायरबादा हे!' ३४ हूं मनख को बेटो खातो-पितो आयो, अने तम को हो, 'देखो, पेटु अने दारुकुटो मनख, कर वसुळवा वाळा अने पापिहुंण को दोस!' ३५ परमेसर की बुद्धि से भरी हुई बातहुंण के जो कई को बी मानेगा, अने लोग उणका काम अने चरित्तर के देखेगा तो केगा, परमेसर की बुद्धि सांची हे।

ईसु पापण बइरा का पाप मांफ करे

३६ फेर कइंका एक फरीसी ने उकासे बिणती करी के उ उका गेले जिमें तो उ उना फरीसी का घरे जई के जिमवा सरु सायरे से बेठी ग्यो। ३७ अने देखो, उना नगर माय एक बइरा, जो पापण थी, अने जदे उके मालम पड़्यो के ईसु फरीसी का

* ७.२२ सुद्ध कर्या; देखो ५.१२।

* ७.२२: यसायाह ३५.५-६, ६१.१

* ७.२७: मलाकी ३.३

* ७.२९-३०: मती २१.३२; लूका ३.१२

* ७.३७-३८: मती २६.७; मरकुस १४.३; योहन १२.३

घरे जिमवा बेठ्यो हे तो संगमरमर का बरतन माय अतर लइ-यई। ^{३८}अने उका पगाड़ी कने पछड़े उबी हुई के रोई-रोई के आंसुहुंण से उका पगहुंण भिंजाळवा लागी। अने अपणा माथा का बालहुंण से उका पगहुंण पोंछवा अने चुमी के उणका पे अतर मळवा लागी। ^{३९}तो उना फरीसी ने जेने ईसु के नोत्त्यो थो यो सगळो देखी के अपणा मन माय क्यो, "अगर यो मनख नबी होतो तो ताड़ी जातो के वा बड़रा जो उके हात लगाड़ी री, कुंण हे, अने कसी हे। याने के वा तो पापण हे।"

^{४०}ईसु ने उकासे क्यो, "हे सिमोन, म्हारे थार से कंई केणो हे।"

उने जुवाब द्यो, "हे गरु, के।"

^{४१}"कइंका बाण्या का दो करजदार था। एक पे पांच सो चांदी का सिक्का^१ को करजो थो अने दूसरा पे पचास। ^{४२}जदे वी करजो चुकावा का लायक नी र्या तो उने दोई पे किरपा करिके उणके मांफ करी लाख्या। तो उना दोई माय से कुंण उके जादा परेम करेगा?"

^{४३}सिमोन ने जुवाब द्यो, "म्हारी समज माय उ जेको जादा मांफ कर्यो।"

उने उकासे क्यो, "तने ठीकज सौंची के फेसलो कर्यो।" ^{४४}फेर उनी बड़रा आड़ी फरिके उने सिमोन से क्यो, "कंई तू इनी नारी के देखी र्यो? हूं थारा घरे आयो पण तने म्हारा पगहुंण पखाळवा सरु पाणी तक नी द्यो, पण इने अपणा आंसुहुंण से म्हारा पगहुंण भिंजाळवा अने अपणा बालहुंण

से पोंछ्या हे। ^{४५}तने म्हारे चुम्यो हयनी, पण जदसे हूं आयो, इने म्हारा पगहुंण के चुमणो नी छोड़्यो। ^{४६}तने म्हारा माथा माय तेल नी मिळ्यो, पण इने म्हारा पगहुंण पे अतर मिळ्यो हे। ^{४७}इकासरु हूं थार से कूं इने घणो जादा परेम कर्यो क्योके इका पाप, जो नरा था, मांफ कर्या गया। पण उ जेका जरासा पाप मांफ कर्या उके थोड़ोक परेम रे हे।"

^{४८}अने उने नारी से क्यो, "थारा पाप मांफ कर्या गया हे।"

^{४९}तो वी मनख जो उका गेले जिमवा बेठ्या था अपणा अपणा मन माय केवा लाग्या, "यो मनख कुंण हे जो पापहुंण के बी मांफ करे हे?"

^{५०}पण ईसु ने उनी नारी से क्यो, "थारा बिसास ने थारो उध्दार कर्यो। कुसल से जा।"

ईसु की सेवा करवा वाळी नारीहुंण

इका झट बाद असो होयो के उ ^८परमेसर का राज का बारामें सुब-समिचार सुणातो होयो नगर-नगर अने गांम-गांम जावा लाग्यो अने वी बारा चेला बी उका गेले र्या। ^२अने थोड़िक नारीहुंण बी जो बायरबादाहुंण अने बेमारी से नज हुई गी ईसु का गेले थी, जिणका माय मरियम जो मगदलीनी केवाती थी अने जेका माय से सात बायरबादाहुंण हेड़ी थी। ^३अने हेरोदेस सासक का मुनीम खुजा की

^१ ७.४१ एक चांदी का सिक्का - एक दन की मजुरी।

^२ ८.२-३: मती २७.५५-५६; मरकुस १५.४०-४१; लूका २३.४९

घराळी योअन्ना, अने सूसन्नाह अने नरी दूसरी नारीहुंण थी। ई अपना खुद का धन से ईसु की सेवा करती थी।

बीज की मिसाल

(मती १३.१-९; मरकुस ४.१-९)

४जदे बड़ीमेक भीड़ भेळी हुई री थी, अने नरा नगरहुंण से लोग उका कने चल्या अई र्या था तो ईसु ने उणकासे मिसाल दई क्यो:

५"एक बोणे वाळो बीज बोवा हिट्यो। बोता बखत थोड़ाक बाट का मेरे पड्या अने पगहुंण से रौंदई गया अने असमान का पखेरुहुंण ने अई के चुगिल्या। ६थोड़ाक सिल्ला पे पड्या जेका पे थोड़ोक गारो थो, वी उगताज सुकी गया क्योके उका माय सीत नी थी। ७थोड़ा कांटाळी झांडी माय पड्या अने झांडिहुंण ने गेले-गेले बड़ी के उणके दबाडी लाख्या। ८दूसरा बीज अच्छी जमीन पे पड्या अने उगी के सो गुणा फळ्या।"

यो कई उने उंची अवाज माय क्यो, "जेका सुणवा का कान होय उ सुणी ले।"

मिसाल को मकसद

(मती १३.१०-१७; मरकुस ४.१०-१२)

९उका चेलाहुंण उकासे सवाल करवा लाग्या के इनी मिसाल को अरथ कंई हुई सके? १०+ उने क्यो: "परमेसर ने तमारे या समज दई के तम उका राज का भेद के जानो, पण दूसरा के मिसाल मायज

बताइयो जावे के वी देखता होया नी देखे अने सुणता होया नी सुणे।

मिसाल को अरथ

(मती १३.१८-२३; मरकुस ४.१३-२०)

११"मिसाल को अरथ यो, बीज परमेसर को बचन। १२बाट का मेरे वाळा वी जिणने बचन तो सुण्यो पण सेतान अई के उणका हिरदाहुंण माय से बचन उठई लई जावे, के वी बिसास नी करे अने उणको उध्दार नी होय। १३सिल्ला पे का वी जो बचन सुणवा पे उके बड़ा आनन्द से माने तो हे पण जइ उन्डी नी होवा से घडी भर तो बिसास करे, पण जदे अजमाया जावा को बखत आय तो भेकी जावे हे। १४जो बीज कांटाळी झांडिहुंण माय पड्या वी हे, जिणने बचन सुण्यो अने जसे वी अगड़े बड्या वी चिन्ताहुंण, धन, अने जीवन का सुख-बिलास माय फंसी जाय, अने उणको फळ कदी नी पाके। १५अच्छी जमीन का बीज वी जो बचन सुणी के अपना साफ अने अच्छा हिरदा माय उके अटोपी राखे अने वी बड़ा जिरना से फळ लाय।

बचन ध्यान दई सुणणो

(मर ४.२१-२५)

१६+ "दीयो बाळी के कइंकोज उके ठामड़ा से नी ढांके नीज खाट का निच्चे धरे, पण उके अदरे पेवला पे धरे जेकासे भितरे आवा-जावा वाळाहुंण के उजाळो मिळे।

१७+ "क्योंके जो कई छिप्यो हे उ परगट होयगा। अने जो कईकी गुपत बात हे वा जाणी जायगा अने परगट होयगा।

१८+ "इकासरु होसियार रो के तम कसतरा सुणो हो, क्योंके जेका कने हे उके हजु बी द्यो जायगा, अने जेका कने नी हे उकासे उ बी जेके उ अपणो जाणे लई ल्यो जायगा।"

ईसु की मेतारी अने भई-बेनहुंण

(मती १२.४६-५०; मरकुस ३.३१-३५)

१९ईसु की मेतारी अने उका भई बी उका कने आया, पण भीड़ की वजासे उकासे मिळी नी सक्या। २०अने कईका ने उके बताइयो, "थारी मेतारी अने भई-बेनहुंण बायरे उल्या हे। वी थार से मरनो चावे।"

२१पण उने जुवाब द्यो, "म्हारी मेतारी अने म्हारा भई तो ई हे जो परमेसर को बचन सुणी के उको पाळण करे।"

अन्दी-दंदवाळ के थामणो

(मती ८.२३-२७; मरकुस ४.३५-४१)

२२तो एक दन असो होयो के उ अने उका चेलाहुंण एक नाव पे चड़ी गया अने उने उणकासे क्यो, "आव, सरवर का पेलां पार^२ चलां।" अने चेलाहुंण एक नाव पे चड़ी गया अने उणने नाव छोड़ी लाखी। २३जदे वी खेता होया अगड़े बड़ता जई र्या था तो उ सोई ग्यो। अने सरवर माय घणो भयंकर अन्दी-दंदवाळ चल्यो,

नाव माय पाणी भरावा लाग्यो अने उणकी जान खतरा माय पड़ी गी। २४तो चेलाहुंण ने कने अई के उके जगाइयो अने क्यो, "मालेख, हे मालेख! हम डुबी र्या हे।"

उने उठी के अन्दी-दंदवाळ अने उठी हुई पाणी की लेरहुंण के डांट्यो अने वी थमी गी अने सांती हुई गी। २५उने उणकासे क्यो, "तमारो बिसास कय्यांडी हे?"

वी डरी गया अने अचरज माय हुई ने एक दूसरा से केवा लाग्या, "तो फेर यो कुंण हे जो अन्दी-दंदवाळ अने पाणी के बी हुकम दे अने वी उकी मानी ले?"

ईसु बायरबादा के बस माय करवा वाळो

(मती ८.२८-३४; मरकुस ५.१-२०)

२६तो वी गिरासेनियो^३ का इलाका माय पौंच्या जो गलील का सामेंज हे। २७जदे उ गलील का कराड़ा पे उतर्यो तो उके उना नगर को एक मनख मिळ्यो जेका माय बायरबादाहुंण थी। उ नरा दन से नी तो लतरा पेरतो थो ने नी घर माय रेतो थो। पण कबरहुंण मायज रेतो थो। २८-२९ईसु तो बायरबादाहुंण के हुकम दई र्यो थो के उना मनख माय से हिटी जाये, क्योंके नरी कावा उणने उना मनख के पकड़्यो थो, लोग उके सांकळ अने बेड़िहुंण से बान्दी के नेपा माय राखता था, फेर बी उ इना बन्दणहुंण

^२ ८.२२ सरवर का पेलां पार; जो यहूदिहुंण को इलाको नी थो।
माय असो हे गदारा (देखो मती ८.२८); दूसरा माय गरसिया।

^३ ८.१७: मती १०.२६; लूका १२.२ ^४ ८.१८: मती २५.२९; लूका १९.२६

^३ ८.२६ गरासेनियो; थोडाक मूळ

के तोड़ी लाखतो थो अने बायरबादाहुंण उके मांळ माय भगाइती-फरती थी। तो ईसु के देखी के उ चिल्लाडी उठ्यो अने उका सामे पड़ी के उंची अवाज माय उने क्यो, "हे सगळा से म्हान परमेसर का बेटा ईसु, म्हारे थार से कई काम? हूं थार से बिणती करूं के म्हारे सजा मती देजे।"

३० ईसु ने उकासे पुछ्यो "थारो कई नाम हे?"

उने क्यो, "पळटन" क्योके उका माय नरी बायरबादाहुंण भरई हुई थी। ३१ वी उकासे बिणती करिके कई री थी, "हमारे उन्डा कुण्ड^b माय जावा को हुकम मती दे।"

३२ वां सुंवल्डाहुंण को घणो बड़ो टोळो बळ्ळा पे चरी र्यो थो। तो बायरबादाहुंण ने उकासे घणी बिणती करी के उणके उना सुंवल्डाहुंण माय जावा दे। ईसु ने उणके जावा द्या। ३३ बायरबादाहुंण उना मनख माय से हिटी ने सुंवल्डाहुंण माय भरई गी अने आखो टोळो उंचा कराड़ा पे से निच्चे लपकी के सरवर माय कुदयो अने डुबी के मरी गयो।

३४ जदे चरावा वाळाहुंण ने जो कई होयो देख्यो, तो भागी के नगर माय अने गांमहुंण माय जई के बतई द्यो। ३५ तो लोग, जो कई होयो उके देखवा हित्या अने ईसु कने आया। वां उणने उना मनख के जेका माय से बायरबादाहुंण हेडी थी, ईसु का

पगहुंण कने बेठ्यो होयो देख्यो, उ लतरा पेर्यो होयो सांत सुभाव माय थो, इका पे वी डरी गया। ३६ देखवा वाळाहुंण ने उणके बताइयो के उ मनख जेका माय बायरबादा भराणी थी कसे नज होयो। ३७ तो गिरासेनियो अने ऐरे-मेरे का इलाका का सगळा लोगहुंण ने ईसु से बिणती करी के उ उणका कने से चल्यो जाय, क्योके वी घणा डरी गया था। अने उ नाव पे चड़िने पाछो चल्यो गयो। ३८ उ मनख जेका माय से बायरबादाहुंण हेडी थी उकासे बिणती करवा लाग्यो, "म्हारे बी थारा गेले चलवा दे।"

पण ईसु ने उके यो कई के फेरी द्यो: ३९ "अपणा घरे पाछो चल्यो जा अने लोगहुंण के बताड के परमेसर ने थारा सरु कसा काम कर्या हे।"

उ पाछो नगर माय अई के आखा नगर माय यो परचार करतो फर्यो, के ईसु ने म्हारा सरु कसा बड़ा म्हान काम कर्या हे।

एक मरी हुई नानी अने एक बेमार बइरा

(मती ९.१८-२६; मरकुस ५.२१-४३)

४० ज्योज ईसु पाछो जां से गयो थो आयो, तो भीड ने उको सुवागत कर्यो क्योके वी सगळा उकी बाट जोई र्या था। ४१ अने देखो, याईर नामको एक मनख आयो जो पराथनाघर को हाकिम थो। उ ईसु का पगहुंण पे अई के ने

^b ८.३१ उन्डा कुण्ड; या गेरो कुण्ड: असो बिचार थो के बायरबादाहुंण के बन्दी बणई के उन्डा कुण्ड माय लाखी दी हे के जदतक उणके आखरी सजा नी मिळी जाय वी वांज रेगा।

पड़ी गयीं उने उके अपणा घरे चलवा सरु मनाइवा लाग्यो। ४२क्योंके उकी एखली बेटी, जो बारा बरस का ऐरे-मेरे की थी अने जो मरवा पे थी।

जदे उ जावा सरु होयो तो भीड़ ईसु पे लदालद पड़ी री थी। ४३जदे एक बइरा जेके बारा बरस से लोई बिवा की बेमारी थी अने बेदहंण कने जई के अपणो आखो धन खतम करी लाखयो थो, जेके कइंकाज बेद नज नी करी सक्या था। ४४पछडे से अई के ईसु का चोळा का किनोर से चोंटी गी, तो झट उको लोई बिणो बन्द हुई गयो। ४५ईसु ने क्यो, "कुंण म्हार से चोंट्यो?"

जदे वी सगळा नटी र्या था तो पतरस ने क्यो, "हे मालेख, भीड़ भेळी हुई ने थार पे लदई री हे।"

४६पण ईसु ने क्यो, "कइंको म्हार से चोंट्यो। म्हारे मालम हुई गयो के म्हारा माय से सामरत हिटी हे।" ४७जदे उनी बइरा ने देख्यो के हूं छिपी नी सकती, तो डर का मारे धुजती हुई अई के ने उका पगे पड़ी गी। उने सगळा मनखहंण का सामे क्यो के वा कायसरु उकासे चोंटी अने कसे वा झट नज हुई गी। ४८उने उकासे क्यो, "बेटी, थारा बिसास ने थारे नज कर्यो। जा, चेन से चली जा।"

४९जदे उ यो कइज र्यो थो तो कइंका ने पराथनाघर का हाकिम का घर से अई के क्यो, "थारी नानी मरी गी। अबे गरु के परेसान मती कर।"

५०पण जदे ईसु ने सुण्यो तो उकासे क्यो, "नहू मती डर! सिरप बिसास राख तो वा बची जायगा।"

५१जदे उ उना घर माय पौंच्यो तो उने पतरस, योहन, याकूब अने उनी नानी का मां-बाप का अलावा दूसरा कइंका के अपणा गेले भितरे नी आवा द्या। ५२वी सगळा मनख उका सरु रुदन करिके रोई र्या था, पण उने क्यो "रोणो-धोणो, बन्द करो, क्योंके वा मरी हयनी, पण सोइर्यो री हे।"

५३इका पे लोग हंसवा लाग्या क्योंके वी जाणता था के वा मरी गी हे। ५४पण उने उको हात पकड़ी के यो कई के हेला पाइयो, "हे नानी, उठ्या।" ५५तो उकी आतमा उका माय अइगी अने वा झट उबी हुई गी, अने ईसु ने हुकम द्यो इके थोडोक-कई खावा सरु द्यो जाय। ५६उका मां-बाप के घणो अचरज होयो, पण उने उणके हुकम द्यो के जो कई होयो उके कइंका से किजो मती।



**ईसु ने जाईर की बेटी के
जिवाड़ी (Luk ८.५४)**

ईसु बारा परेरितहुंण के मोकले

(मती १०.५-१५; मरकुस ६.७-१३)

तो ईसु ने बारा परेरितहुंण के एक साते बुलाइया अने उणके सगळी बुरी आतमाहुंण पे अने बेमारिहुंण के नज करवा सरु सामरत अने हक द्यो।^१ उने उणके मोकल्या के वी परमेसर का राज को परचार करे अने बेमारहुंण के नज करे।^२ उने उणकासे क्यो, "अपणी जातरा सरु कंई मती लो, नी तो लाकडी, नी झोळो, नी रोटा अने नी रुप्या-पइसा, यां तक के दो दो कुडता बी मती लई जाव।^३ जेना कइंका घर माय जाव, वइंज रो अने वइंसेज बिदा होव।^४ अने जो तमारी आव-भगत नी करे, तो जदे तम उना नगर माय से हटो तो अपणा पगहुंण को धूळो झटकारी दो जेकासे उणका सरु गवई रे के उणको न्याव होय।"

६तो वी निकळी के गांम गांम सुब-समिचार सुणाता होया अने हर जगा लोगहुंण के नज करता फर्या।

सासक हेरोदेस जो ईसु के नी जाणतो थो

(मती १४.१-१२; मरकुस ६.१४-२९)

७^१ देस का चोथा हिस्सा का सासक हेरोदेस ने जदे इनी घटनाहुंण का बारामें सुण्यो तो उ समजी नी सक्यो, क्यौंके नरा लोगहुंण कई र्या था के योहन मर्या माय से जिन्दो हुई गयो हे,^२ कइंका कई र्या था के नबी एलियाह

पाछो परगट्यो हे। दूसरा लोगहुंण का मुजब जूना नबिहुंण माय से कई को एक जीवतो हुई गयो हे।^३ हेरोदेस ने क्यो, "म्हने खुदज तो योहन को माथो कटवाइयो थो, पण यो मनख कुंण हे जेका बारामें हूं असी बातहुंण सुणी र्यो हूं?" अने उ उके देखवा की कोसिस करतो र्यो।

ईसु पांच रोटा अने दो मच्छी से पांच हज्जार के खवाड़े

(मती १४.१३-२१; मरकुस

६.३०-४४; योहन ६.१-१४)

१०जदके परेरित जिणके मोकल्या था पाछा अई ग्या। तो जो कंई उणने कर्यो थो सगळो उके बताइयो। तो उ उणके गुप-चुप अपणा गेले लई के बेतसेदा नाम नगर आडी गयो।^१ पण भीड़ का लोगहुंण के पतो चली गयो तो वी उका पाछे चली पइया। उणकी आव-भगत करिके उ उणकासे परमेसर का राज की बातहुंण करवा लाग्यो, अने जिणके नज होवा की जरुवत थी उने उणके नज कर्या।

१२जदे दन अथणवा लाग्यो तो बारा चेलाहुंण ने उका कने अई के ने क्यो, "भीड़ के बिदा कर के वी ऐरे-मेरे का गांम अने बस्तिहुंण माय जई के अपणा सरु रेवा की जगा अने खावा सरु कंई ढुंडी सके, क्यौंके हम तो यां बिराण जगा माय हे।"

१३पण उने उणकासे क्यो, "तमीज इणके कंई खावा सरु दो।"

^१ ९.३-५: लूका १०.४-११; परेरितहुंण १३.५१

^२ ९.७-८: मती १६.१४; मरकुस ८.२८; लूका ९.१९

उणने क्यो, "हमारा कने पांच रोटा अने दो मच्छी का अलावा कंई हयनी। तू यो तो नी चाय के हम जावां अने इना सगळा सरु भोजन मोल लई आवां।" ^{१४}क्योंके वां करीब-करीब पांच हज्जार मनख था।

ईसु ने अपना चेलाहुंण से क्यो, "पचास पचास की पंगतहुंण माय इणके बेठई दो।"

^{१५}उणने वसेज उना सगळा के बेठई दिया। ^{१६}फेर उने पांच रोटा अने दो मच्छीहुंण लई अने सरग आड़ी देखी के उणका सरु धन्यवाद कर्यो। अने उणके तोड़ी-तोड़ी के चेलाहुंण के देतो ग्यो के वी लोगहुंण के परोसता जाय। ^{१७}जदे सगळा मनख खई के थापी गया तो उणने बाकी बच्या कोळ्या से भर्या होया बारा टोपलाहुंण उठाइया।

पतरस ने जदे ईसु के मसीह मान्यो

(मती १६.१३-१९; मरकुस ८.२७-२९)

^{१८}फेर जदे उ एखलो पराथना करी र्यो थो अने चेलाहुंण उका गेले था तो उने उणकासे पुछ्यो, "हूं कुंण हूं, इना बारामें लोग कंई के हे?"

^{१९}उणने जुवाब द्यो, "योहन बपतिसमा देवा वाळो, पण कइंका के हे एलियाह, अने दूसरा लोगहुंण का मुजब, जूना नबिहुंण माय से कंई को एक जी उठ्यो हे।"

^{२०}उने उणकासे क्यो, "पण तम म्हारे कंई को हो?"

पतरस ने जुवाब द्यो, "परमेसर को मसीह।"

ईसु ने क्यो, उ दुःख भोगेगा अने मार्यो जायगा

(मती १६.२०-२८; मरकुस ८.३०-९.१)

^{२१}पण उने उणके चेतई ने हुकम द्यो के या बात कइंका से मती किजो। ^{२२}फेर क्यो, "यो जरूरी हे के हूं मनख को बेटो घणो दुःख झेलुं, अने ठाम्या मनख, मुख-पुरोहितहुंण अने सासतरिहुंण से हूं नकार्यो जई के मारी लाख्यो जउं अने तीसरा दन जी उठ्यउं।"

^{२३}तो उने सगळा मनखहुंण से क्यो, "अगर कई को म्हारा पाछे आणो चावे तो उ खुदी के नकारे, अने हर दन अपणो कुरुस उठाय^d अने म्हारा सरीको करे। ^{२४}क्योंके जो कई को अपनी काया को जीव बचाइणो चावे उ अपना सरग का जीव के खोयगा, पण जो कई को अपनी काया को जीव म्हारा सरु खोय उ अपना सरग का जीव के बचाड़ेगा। ^{२५}अगर कई को मनख आखा जग के पई ले अने अपणो सरग को जीव खोई लाखे या उकासे अलग हुई जाय तो उके कंई फायदो रेगा? ^{२६}जो म्हार से अने म्हारा बचन से लजायगा उकासे हूं मनख को बेटो बी उना बखत लजउंवां जदे हूं अपनी, अने अपना पिता की, अने पवितर सरगदूतहुंण की महेमा माय अउंवां। ^{२७}पण हूं तमार से खास बात कूं के यां थोड़ा असा उब्या

^d १.२३ अपणो कुरुस उठाय; लक्कड का पाट्या के एक-दूसरा का अदरे आड़ो धरी के बणाणो जेका पे मुलजिमहुंण के सजा दे हे।

^f १.१९: मती १४.१-२; मरकुस ६.१४-१५; लूका ९.७-८ ^f १.२०: योहन ६.६८-६९

^f १.२३: मती १०.३८; लूका १४.२७ ^f १.२४: मती १०.३९; लूका १७.३३; योहन १२.२५

हे जो जदतक परमेसर को राज नी देखी ले तदतक मोत को सुवाद नी चाखेगा।"

ईसु म्हेमा माय

(मती १७.१-८; मरकुस ९.२-८)

२८† इनी बातहुंण का करीब-करीब आठ दन पाछे असो होयो के ईसु, पतरस, योहन अने याकूब के गेले लई के पराथना करवा सरु बब्बा पे चडी गयो। २९जदे उ पराथना करी र्यो थो तो उका मुन्डा को रुप बदली गयो अने उका लतरा धोळा हुई के चळकवा लाग्या। ३०देखो, दो मनख उकासे बातहुंण करी र्या था। वी मूसा अने एलियाह था। ३१ई म्हेमा माय परगट हुई के उका मरवा का बारामें बातहुंण करी र्या था, जेके उ यरुसलेम माय पूरो करवा पे थो। ३२पतरस अने उका सातिहुंण नीन्द माय उजग्र्या था। पण जदे वी पूरण रुप से जागी गया तो उणने उकी म्हेमा के, अने



ईसु को रुप बदळ्ना (LUK ९.३२)

उका गेले उण दोई मनखहुंण के उब्ब्या देख्या। ३३जदे वी दो उकासे बिदा होवा लाग्या तो पतरस ने ईसु से क्यो, "हे मालेख, यां रेणो हमारा सरु अच्छो हे, तो हम तीन डेरा बणावां, एक थारा सरु, एक मूसा सरु अने एक एलियाह सरु।" उ नी जाणतो थो के कई कई र्यो हे।

३४उ यो कइज र्यो थो के एक बदळो उठ्यो जो उणका पे छावा लाग्यो, अने जदे वी बादळा से घेरावा लाग्या तो डरी गया। ३५† तो बादळा माय से यो सबद् सुणई द्यो, "यो म्हारो बेटो, म्हारो छांट्यो होयो। इकी सुणो।"

३६जदे बाणी हुई चुकी तो ईसु एखलो रई गयो। चेलाहुंण छाना र्या अने जो कई देख्यो थो उका बारामें उणने उना दनहुंण माय कइंका केज कई नी बताइयो।

बायरबादा से भर्या मनख के नज करनौ

(मती १७.१४-१८; मरकुस ९.१४-२७)

३७दूसरा दन असो होयो के जदे वी उना परबत से निच्चे उतर्या तो एक घणी बडीमेक भीड़ उकासे मिळी। ३८अने देखो, भीड़ माय से एक मनख ने चिल्लाडी ने क्यो, "हे गरु, हूं थार से बिणती करूं के तू म्हारा बेटा पे किरपा-भरी नगे-राख, क्योके उ म्हारो एखलोज बेटो हे। ३९अने देख, एक बायरबादा उका माय समई गी हे अने उ एकदम से चिल्लाडी उठ्यो। वा उके असो मरोड़े के उका मुन्डा से झाग हटवा लागे। वा उके

† ९.२८-३५: २ पतरस १.१७-१८

† ९.३५: यसायाह ४२.१; मती ३.१७, १२.१८; मरकुस १.११; लूका ३.२२

झकझोड़ी के बड़ी मुसकिल से छोड़े हे।
 ४० म्हेने थारा चेलाहुंण से बिणती करी के
 उके हेड़े पण वी नी हेड़ी सक्या।"

४१ ईसु ने जुवाब द्यो, "हे अबिसासी
 अने भटक्या होया लोगहुंण! हूं तमारा
 गेले कदत्तक रूवा अने तमारी सेतो
 रूवा?" ईसु ने नाना का पिता से क्यो,
 "अपणा बेटा के यां ल्या।"

४२ उ अइज र्यो थो के बायरबादा ने
 उके जमीन पे पटकी के बुरी तरा से
 मरोइयो। पण ईसु ने उनी बायरबादा के
 डांट्यो अने नाना के नज करिके उका
 पिताजी के दई द्यो। ४३ तो परमेश्वर की
 महानता से सगळा मनख दंग रई गया।

ईसु अपणी मोत का बारामें पाछो बोल्यो

(मती १७.२२-२३; मरकुस ९.३०-३२)

उ जो कई करी र्यो थो उके देखी के
 सगळा मनख अचरज करी र्या था, तो
 उने अपणा चेलाहुंण से क्यो, ४४ "इनी
 बातहुंण पे कान धरो, क्योके कईका
 एक मनख से हूं मनख को बेटो बिरोदी
 लोगहुंण का हाते पकड़वायो जावा वाळो
 हूं।" ४५ पण वी इनी बात के नी समज्या,
 अने या बात उणकासे गुप्त री के वी
 उके नी जाणे, अने वी इका बारामें ईसु
 से पुछवा से डरता था।

मोटो कुंण?

(मती १८.१-५; मरकुस ९.३३-३७)

४६ तो चेलाहुंण का माय इनी बात
 पे बिवाद होवा लाग्यो के हमारा माय

कुंण सगळा से मोटो हे। ४७ तो ईसु ने
 या जाणी के के वी अपणा मन माय
 कई सौंची र्या हे, एक बाळक के लई के
 अपणा कने उबाइयो। ४८ अने उणकासे
 क्यो, "जो कईका इना बाळक के म्हारा
 नाम से माने उ म्हारे माने। अने जो
 म्हारे माने उ परमेश्वर के माने जेने म्हारे
 मोकल्यो, क्योके जो तमारा माय सगळा
 से छोटो उज सगळा से मोटो हे।"

**जो हमारा बिरोद माय हयनी उ हमारा
 आड़ी हे**

(मरकुस ९.३८-४०)

४९ तो योहन ने क्यो, "हे मालेख, हमने
 एक मनख के थारा नाम से बायरबादाहुंण
 के हेड़ता देख्यो अने उके रोकवा की
 कोसिस करी, क्योके उ हमारा गेले रई
 के थारा पाछे नी चले।"

५० पण ईसु ने उणकासे क्यो, "उके
 रोको मती, क्योके जो तमारा बिरोद माय
 हयनी उ तमारा आड़ी हे।"

सामरिहुंण ने ईसु के नकार्यो

५१ फेर असो होयो के जदे ईसु का
 सरग जावा का दन कने आवा लाग्या
 तो उने यरुसलेम जावा को पक्को-इरादो
 कर्यो। ५२ अने उने अपणा दूत मोकल्या।
 के वी सामरिहुंण का एक गांम भितरे
 जई के उका सरु तय्यारी करे। ५३ पण
 सामरिहुंण ने उकी मान-मनावर नी करी
 क्योके उ यरुसलेम आड़ीज चल्यो जई
 र्यो थो। ५४ जदे उका चेला माय से

† ९.४६: लूका २२.२४ † ९.४८: मती १०.४०; लूका १०.१६; योहन १३.२०

† ९.५४: २ राजा १.९-१६

याकूब अने योहन ने यो देख्यो तो क्यो, "हे परभु, कई तू चावे के हम यो हुकम दां के असमान से भस्ते पड़े अने उणके भसम करी लाखे?"^८

५५ पण ईसु ने मुडी के उणके डांट्यो। [अने क्यो, "कई तम नी जाणो के तम कसी आतमा का हो?" ५६ हूं मनख को बेटो मनखहुंण की आतमाहुंण के नास करवा नी बल्के उणको उध्दार करवा आयो हूं।"] अने वी दूसरा नगर आड़ी चल्या गया।

ईसु का पाछे चलवा को मोल

(मती ८.१९-२२)

५७ जदे वी बाट माय चल्या जई र्या था तो कईका ने उकासे क्यो, "तू जां जां जाय हूं थारा पछड़े चलुंवां।"

५८ ईसु ने उकासे क्यो, "व्यागसळी की मांद अने असमान का पखेरुहुंण का घोंसळा रे हे, पण हूं मनख का बेटा सरु माथो धरवा सरु बी कईकी जगा हयनी।"

५९ उने कईका दूसरा से क्यो, "म्हारा पाछे चल।"

पण उने क्यो, "म्हारे पेलां जावा दे के हूं म्हारा पिताजी का गेले जदत्तक उ मरे हयनी रूं।"

६० पण उने उकासे क्यो, "मुरदाहुंण के मुरदा गाड़वा दे! अने तू अई के परमेसर का राज को सगळी जगा परचार कर।"

६१[†] फेर कईका दूसरा ने बी क्यो, "हे परभु, हूं थारा पाछे चलुंवां, पण पेलां जावा दे के घर आळा से बिदई लइ-यउं।"

६२ पण ईसु ने उकासे क्यो, "कईको बी मनख जो अपणो हात हळ पे धरवा का बाद पाछे फरिके देखे, परमेसर का राज का लायक हयनी।"

ईसु ने सतर चेलाहुंण के मोकल्या

इका बाद परभु ने दूसरा बहतर^९ १० मनख के तेइया अने उने अपणा अगड़े-अगड़े दो-दो करिके हर नगर अने जगा आड़ी मोकल्या जां उ खुदी जावा वाळो थो।^२ उने उणकासे क्यो, "फसल तो नरी उबी, पण मजुर्याहुंण की कमकोती हे। तो खेत का मालेख से बिणती करो के उ अपणा खेत माय मजुर्याहुंण मोकले।^३ जाव! देखो हूं तमारे मेमणाहुंण जसा बरगड़ाहुंण का माय मोकली र्यो हूं।^४ अपणा गेले नी तो बटवो, नी झोळो अने नी पन्निहुंण राखो, अने रस्ता माय कईका के परणाम बी मती करो।^५ जेना घर भितरे जाव, पेलां कई दो, 'इना घर माय सांती बणी रे।' ६ अगर वां कई को सांती का लायक होय तो तमारी सांती उका पे बणी रेगा, नी तो तमारा कने वा सांती पाछी अई जायगा।^७

^८ ९.५४ थोडाक मूळ माय इके जोइयो हे असो एलियाह ने कर्यो थो। ^९ ९.६० मुरदाहुंण के मुरदा गाड़वा दे !; या "पिताजी का गेले रेवा से अच्छो हे के तू म्हारा गेले-गेल चल्थो-चल"।

^९ १०.१ 72; बहतर; थोडाक मूळ माय असो हे ७०।

[†] ९.६१: १ राजा १९.२० [†] १०.२: मती ९.३७-३८ [†] १०.३: मती १०.१६

[†] १०.४-११: मती १०.७-१४; मरकुस ६.८-११; लूका ९.३-५

[†] १०.७: १ कुरिन्थिहुंण ९.१४; १ तीमुथियुस ५.१८

उणाज घरे रो, अने जो कई वी तमारे दे उकेज खाव अने प्यो, क्योँके मजुर्या के मजुरी जरूर मिळनी चावे। घरे-घर मती फर्या करो, 'जेना नगर माय बी जाव, जदे वी तमारी आव-भगत करे तो जो कई तमारा सामे धर्यो-जाय उज खाव।' १० वां जो बेमार रे उणके नज करो, अने उणकासे को, के परमेसर को राज तमारा कने अई ग्यो। १० पण जेना नगर माय तम जाव अने लोग तमारी आव-भगत नी करे तो उणकी सेरी-गळिहुंण माय जई के को, ११ 'तमारा बिरोद माय हम नगर का उना धूळा के जो हमारा पग माय चोटी ग्यो हे, झटकारी र्या हे। फेर बी यो पक्को जाणी लो के परमेसर को राज कने अई ग्यो हे।' १२ हूं तमार से कूं के उना दन जदे परमेसर न्याव करेगा सदोम नगर की दसा उना नगर से कईज बड़ी के सेणे लायक रेगा।"

तीन नगर माय का लोगहुंण ने पसतावो नी कर्यो

(मती ११.२०-२४)

१३ "हे खुराजीन नगर, हे बेतसेदा नगर तमार पे हाय। जो अचरज भर्या काम तमारा माय कर्या गया सूर अने सेदा नगर माय कर्या जाता तो - टाट ओड़ी के अने राखोड़ा पे बेठिके^h कदका

मन बदळी लेता। १४ पण न्याव का दन सूर अने सेदा नगर की दसा तमार से कईज जादा सेणे लायक रेगा। १५ हे कफरनहूम नगर, तू कई सरग तक अदरे उठाइयो जायगा? तू तो नरक तक निच्चो कर्यो जायगा।

१६ तो उने चेलाहुंण से क्यो, "उ जो तमारी सुणे, उ म्हारी सुणे। अने जो तमारे ओछो जाणे उ म्हारे ओछो जाणे। अने जो म्हारे ओछो जाणे उ परमेसर के ओछो जाणे जेने म्हारे मोकल्यो।"

बहतर चेलाहुंण आनन्द करता होया पाछा आया

१७ वी बहतरⁱ हंसी-खुसी माय पाछा आया अने केवा लाग्या, "हे परभु यां तक के बायरबादाहुंण बी थारा नाम से हमारा बस माय हे।"

१८ तो ईसु ने उणकासे क्यो, "हूं सेतान के गाज सरीको असमान से धरती पे पड़तो देखी र्यो थो। १९ देखो, म्हने तमारे सरपहुंण अने बिच्छुहुंण के डोंचवा अने सेतान जसा दुसमन की सगळी सामरत पे हक द्यो हे। तो कई को तमारे नुकस्यान नी पौंचायगा। २० फेर बी इनी बात से खुस मती होव के बायरबादाहुंण तमारा बस माय हे, पण इनी बात से खुस रो के तमारा

^h १०.१३ टाट ओड़ी के अने राखोड़ा पे बेठिके; दुःख परगट करवा को एक तरीको। ⁱ १०.१७ बहतर; मूळ माय ७० (१ आयत देखो)।

[†] १०.१०-११: परेरितहुंण १३.५१ [†] १०.१२: उत्पत्ती १८.१६-१९.१-२१

[†] १०.१३: यसायाह २३.१-१८; यहजेकेल २६.१-२८.२६; योएल ३.४-८; आमोस १.९-१०; जकरियाह ९.२-४

[†] १०.१५: यसायाह १४.१३-१५ [†] १०.१६: मती १०.४०; मरकुस ९.३७; लूका ९.४८; योहान १३.२०

[†] १०.१९: भजन संहिता ९१.१३

नाम परमेसर ने सरग माय लिखया हे।"

ईसु को आनन्द

(मती ११.२५-२७; १३.१६-१७)

२१ उनीज घड़ी उ पवितर आतमा माय/ घणो खुस होयो, अने उने क्यो, "हे पिता, सरग अने धरती का परभु, हूं थारी इसतुती करूं के तने अकलमंदहुंण अने ज्ञानवानहुंण से इनी बातहुंण के छिपाड़ी राखी पण बाळकहुंण पे परगटी हे। हां, हे पिता, योज थारे भायो।"

२२[†] तो ईसु लोगहुंण से केवा लाग्यो, "म्हारो पिता ने म्हारो सगळो-कई दई द्यो हे। सिरप पिता का अलावा कई को नी जाणे के हूं बेटो कुंण हूं, अने सिरप हूं बेटा का अलावा कई को नी जाणे के पिता कुंण हे। अने सिरप उज जाणे जेका पे हूं खुद परगट करनीं चं।"

२३ तो चेलाहुंण आड़ी फरिके उने उणकासे छाने से क्यो, "धन्य हे वी आंखहुंण जो इनी बातहुंण के देखे, जिणके तम देखो हो, २४ क्योके हूं तमार से कूं के तम जेनी बातहुंण के देखो हो उणके नरा नबिहुंण अने राजाहुंण ने देखणो चायो पण नी देख्यो, अने उनी बातहुंण के सुणनो चायो जिणके तम सुणो हो पण नी सुण्यो।

म्हारो पड़ोसी कुंण?

२५[†] देखो, मूसा का नेम-बिधान को एक जाणकार उठ्यो अने यो कई के ईसु के परखवा लाग्यो, "हे गरु, हमेस्या का जीवन को हक पावा सरु हूं कई करूं?"

२६ ईसु ने उकासे क्यो, "मूसा का नेम-बिधान माय कई लिख्यो हे? तू कसे बांची के समजे?"

२७[†] उने जुवाब द्यो, "तू परभु अपना परमेसर से अपना सगळा हिरदा, सगळा पराण, सगळी सामरत, अने सगळी बुद्धि से परेम राख अने अपना पड़ोसी से अपना सरीको परेम राख।"

२८[†] तो उने उकासे क्यो, "तने अच्छो जुवाब द्यो। योज कर तो तू जीवतो रेगा।"

२९ पण उने खुद के सई ठेरावा सरु ईसु से पुछ्यो, "म्हारो पड़ोसी कुंण?"

३० ईसु ने जुवाब द्यो, "एक मनख यरुसलेम से यरीहो नगर आड़ी जई र्यो थो, के उ डकेतहुंण ने घेरिल्यो। उणने उके नांगो-पुंगो करी लाख्यो, मार्यो कुट्यो अने अधमर्यो करिके चल्या गया। ३१ संजोक से एक पुरोहित उनी बाट जई र्यो थो अने जदे उने उके देख्यो तो कतरई के चल्यो गयो। ३२ असीज तरा एक लेवी^k पंडित बी वय्यांडी से हित्यो अने मुन्डो फेरी के चल्यो गयो। ३३[†] पण

[†] १०.२१ पवितर आतमा माय; मूळ माय असो आतमा माय; दूसरी जगा उकी आतमा माय।

^k १०.३२ लेवी; याकूब का बारा बेटाहुंण माय से एक, यो परवार मन्दर माय पुरोहित की मदद करवा वाळो।

[†] १०.२२: योहन ३.३५, १०.१५ [†] १०.२५-२८: मती २२.३५-४०; मरकुस १२.२८-३४

[†] १०.२७: नेम-बिधान ६.५ लेव्यव्यवस्था १९.१८ [†] १०.२८: लेव्यव्यवस्था १८.५

[†] १०.३३-३४: २ इतयास २८.१५

एक सामरी^१ बी जो जातरा करी र्यो थो वां अई ग्यो। जदे उने उके देख्यो तो दया से भरी ग्यो। ^{३४}उने कने जई के उका घावहुंण पे तेल अने दाखरस रेडी के उणका पे पाटा बान्दया। अने उके अपणी सवारी पे चड़ई के सराय माय लड़-यायो जां उने उकी सेवा-चाकरी करी। ^{३५}दूसरा दन उने दो चांदी का सिक्का हेडी के सराय वाळा के दई ने क्यो, 'इकी सेवा-चाकरी करजो। इका से बत्ती जो खरचो आय, हूं पाछो आवा पे चुकई द्वां।' "

^{३६}तो ईसु ने नेम-बिधान का जाणकार से क्यो, "थारा बिचार से इना तीनीज माय से उना मनख को पड़ोसी कुंण परमाणित होयो जो डकेतहुंण का हते चडी ग्यो थो?"

^{३७}उने क्यो, "उज जेने उका पे दया करी।"

ईसु ने उकासे क्यो, "जा, तू बी असोज कर।"

ईसु, मारथा अने मरियम का घरे

^{३८} जदे ईसु अने उका चेलाहुंण चल्या जई र्या था तो उ एक गांम माय दाखल होयो, अने मारथा नामकी एक बड़रा ने उके अपणा घरे ठेराइयो। ^{३९}उकी एक बेन थी जेको नाम मरियम थो जो परभु का पग कने बेठिके उको बचन सुणी री थी। ^{४०}पण मारथा सेवा करी-करिके चिडी उठी अने उने उणका कने अई के क्यो, "हे परभु, कई थारे फिकर हयनी



मरियम अने मारथा (LUK १०.३९)

के म्हारी बेन ने सेवा-चाकरी सरु म्हारे एखली छोड़ी राखी हे? उकासे कइदे के वा म्हारी मदद करे?"

^{४१}पण परभु ने जुवाब द्यो, "मारथा, अरे मारथा! तू नरी बातहुंण सरु फिकर करे अने घबरई री हे। ^{४२}पण सांची माय एकज बात जरुरी हे, अने मरियम ने उना खास हिस्सा के छांटी ल्यो, जो उकासे छुड़ायो नी जायगा।"

परभु की पराथना

(मत्ती ६.९-१३; मरकुस ७.७-११)

फेर असो होयो के ईसु कइंकी **११** जगा पे पराथना करी र्यो थो। जदे उ पराथना करी चुक्यो तो उका चेलाहुंण माय से कइंका एक ने उकासे क्यो, "हे परभु, जसे योहन ने अपणा चेलाहुंण के पराथना सीखाडी, तू बी हमारे सीखाड़।"

^१ १०.३३ सामरी; यहूदी इणकासे नफरत करता था क्योंकि सामरी लोगहुंण निचची जात का था।

^१ १०.३८-३९: योहन ११.१

२उने उणकासे क्यो, "जदे तम पराथना करो तो को:

'हे पिता,

थारो नाम पवितर माने जावे,
थारो राज आय।

३हमारे दन-भर का रोटा^m हर दन
दया कर

४हमारा पापहुण के मांफ कर,
क्योंके हम बी अपना हर
कसुरवार के मांफ करां हे।
अने हमारे अजमाइस माय मती
लाख।' "

५ईसु ने उणकासे क्यो, "मानी लो
तमारा माय से कइंका एक को दोस रे,
अने उ आदी रात माय अई के, 'हे दोस,
म्हारे तीन रोटाहुण दई दे; ६क्योंके म्हारो
एक दोस जातरा करतो होयो म्हारा कने
आयो हे, अने उके खवाइवा सरु म्हारा
कने कइंज हयनी।' ७पण दोस भीतर से
जुवाब दई के, के 'म्हारे मती सताइ;
कमांड लागी चुक्यो अने म्हारा बाळकहुण
म्हारा गेले बिछावणा पे हे। हूं उठी के
थारे कइंज नी दई सकूं।' ८हूं थार से कूं,
हालाके दोस होवा की वजासे उ नी उठे
अने उके कइंज नी दे, फेर बी उकी घणी
याचना करवा पे उ उठी के जितरी उके
जरुवत हे दई देगा।

९"हूं तमार से कूं, मांगो तो तमारे
मिळेगा; ढुंडो तो तमारे लादेगा;
खटखटाइोगा तो तमारा सरु खोल्यो

जायगा। १०क्योंके जो कई को मांगे,
उके मिळे; अने जो ढुंडे, उ पाय; अने
जो खटखटाइे उका सरु खोल्यो जायगा।
११तमारा माय से कुंण असो बाप रेगा के
जदे उको बेटो मच्छी मांगे तो मच्छी
का बदळा माय सरप दे? १२या इण्डो
मांगे तो उके बिच्छु दे? १३तो जदे तम
बुरा हुई के अपना बाळकहुण के भली
चीजहुण देणो जाणो, तो तमारो सरग
पिता उणके जो उकासे मांगे हजु पवितर
आत्मा कायसरु नी देगा?"

बायरबादा के हेइवा वाळो ईसु

(मती १२.२२-३०; मरकुस ३.२०-२७)

१४फेर ईसु एक बायरबादा के हेइवा
लाग्यो जो गुंगी थी। अने असो होयो के
जदे बायरबादा हिटी गी तो गुंगो बोलवा
लाग्यो। अने भीड़ के घणो अचरज होयो।ⁿ
१५पण उणका माय से थोड़ाक ने क्यो,
"उ तो बायरबादाहुण के बालजबूल याने
बायरबादाहुण का परधान की मदद से
हेडे हे।"

१६दूसरा थोड़ाक लोगहुण ने उके
अजमाणे सरु उकासे असमान की
एक निसाणी मांगी। १७पण उ उणका
बिचारहुण के जाणतो थो! तो उणकासे
क्यो, "जेना राज माय एको नी रे उ
उजड़ी जाय, अने जेना घरे एको हयनी
उ नास हुई जाय। १८अगर सेतानीज
खुद अपणो बिरोदी हुई जाय तो उको

^m ११.३ दन-भर का रोटा; या हमारी जरुवत का मुजब भोजन या दूसरा दन सरु भोजन।

ⁿ ११.१४ घणो अचरज होयो; क्योंके लोगहुण मानता था के जो अचरज का काम करे उके बायरबादाहुण को नाम जाणे हे। पण यो गुंगो थो तो ईसु बायरबादा को नाम नी पुछी सकतो थो। फेर बी ईसु ने उना मनख माय से बायरबादा हेडी लाखी।

^f ११.१५: मती ९.३४, १०.२५ ^f ११.१६: मती १२.३८, १६.१; मरकुस ८.११

राज कसे ठेरी सके? क्योंकि तम गलत को हो के हूं बालजबूल की मदद से बायरबादाहुंण के हेडुं हूं। १९तो अगर हूं बालजबूल की मदद से बायरबादाहुंण के हेडुं तो तमारा चेलाहुंण केकी मदद से हेडे हे? इकासर वीज तमारा न्यावी रेगा के तम सई हो के गलत। २०पण हूं परमेसर की मदद से बायरबादाहुंण हेडुं, तो परमेसर को राज तमारा कने अई ग्यो हे।

२१"जदे एक ताकतवर मनख सगळा हतियार बान्दी के अपणा घर को नेपो करे तो उकी सम्पत्ती बची रे। २२पण जदे उकासेज ताकत वाळो कई को मनख उका पे चडई करिके उके हरई के, अने उका सगळा हतियार जिणका पे उके भरोसो थो छुडई ले, अने धन-सम्पत्ती लुटी के बांटी लाखे हे।

२३† "उ जो म्हारा गेले हयनी म्हारो बिरोदी हे, अने उ जो म्हारा गेले परमेसर सरु लोगहुंण के भेळा नी करे, उ परमेसर से दूरो करे हे।

बायरबादा को पाछो आणो

(मती १२.४३-४५)

२४"जदे बायरबादा मनख माय से हिटे हे तो अराम की तलास सरु सुनसान जगा से हुई ने निकले। जदे उके कइंकी जगा नी मिळे तो के हे, 'हूं जेना घर से हेडी गी थी उका मायज पाछी जउंवां।'

२५जदे वा वां पोंची तो उके झाड़यो-बुखार्यो अने सज्यो पायो। २६तो वा अपणा सेज बुरी सात हजु बायरबादाहुंण के अपणा गेले लइ-याय हे अने उका माय भरई के बसी जावे। अने उना मनख की पाछली दसा पेलां से बी बुरी हुई जावे!"

उ जो सांची माय खुस हे

२७असो होयो के जदे उ या बात कइंज र्यो थो तो भीड़ माय से एक बइरा ने जोर से हेलापाड़िने उकासे क्यो, "धन्य हे थारी वा मेतारी जेका गरभ माय तू र्यो अने जेको दूद तने धायो।"

२८पण उने क्यो, "इका बदले धन्य हे वी जो परमेसर का बचन सुणे अने उके पाळे हे।"

लोगहुंण के अचरज की सेलाणी की चायना

(मती १२.३८-४२)

२९† जसी-जसी भीड़ बइया जई री थी उ केवा लाग्यो, "या बुरी पीड़ी हे क्योंकि या अचरज की सेलाणी की हेर माय रे, फेर बी इके योना नबी का अलावा कइंकी दूसरी सेलाणी नी दई जायगा। ३०† जसो योना नीनवे म्हानगर का लोगहुंण सरु सेलाणी बण्यो० असोज हूं मनख को बेटो बी इनी पीड़ी का लोगहुंण सरु बणुंवां।

० ११.३० योना नीनवे म्हानगर का लोगहुंण सरु सेलाणी बण्यो; योना तीन दन तक मच्छी का पेट माय र्यो, अने उके बाद योना ने नीनवे जो म्हानगर थो परचार कर्यो (योना ३.४,५)। उकाज सरीको तीन दन तक कबर माय रई के ईसु जीवतो हुई जायगा; यो साबित करवा सरु के परमेसर की सामरत ईसु का साते हे जेने परचार कर्यो।

† ११.२३: मरकुस ९.४०

† ११.२९: मती १६.४; मरकुस ८.१२

† ११.३०: योना ३.४

३१† दक्खणव दिसा की राणी न्याव का दन इनी पीड़ी का लोगहुंण का गेले उबी हुई के उणका पे आरोप लगाड़ेगा, क्योंकि वा धरती का छोर से सुलेमान को ज्ञान सुणवा अई, पण देखो, यां उ हे जो सुलेमान से बी मोटो हे। ३२† न्याव का दन नीनवे का लोग इनी पीड़ी का लोगहुंण का गेले उबी के उणका पे आरोप लगाड़ेगा, क्योंकि उणने योना को परचार सुणी के मन बदळ्यो, अने देखो, यां उ हे जो योना से बी मोटो हे।

काया को उजाळो

(मती ५.१५; ६.२२-२३)

३३† "कइंको दीयो बाळी के तळघर माय नी धरे, नी टोपली का निच्चे राखे, पण उके दीवट पे राखे के आवा वाळा के उजाळो मिळे।^प ३४† थारी काया को दीयो थारी आंख हे। जदे थारी आंख सुद्ध हे तो थारी काया बी पूरण तरा उजळी रे, पण जदे वा बुरी हे तो थारी काया बी पूरण तरा इन्दारी हुई जावे हे। ३५† तो होसियार रो के उजाळो इन्दारो नी बणी जाये। ३६† इकासरु अगर थारी पूरण काया उजाळा से उजळी रे अने कइंकाज हिस्सा माय इन्दारो नी रे तो उ पूरो वसोज उजळो रेगा, जसतरा दीयो, जसो दीयो अपना उजाळा से थारे उजाळो दे हे।^१

ईसु ने छेः; कारण बताइया यहूदिहुंण का धारमिक नेताहुंण के सजा देवा का

(मती २३.१-३६; मरकुस १२.३८-४०)

३७† जदे ईसु ने बोलनो खतम करयो तो एक फरीसी ने उके अपना गेले जिमवा सरु नोट्यो। उ भितरे जई के जिमवा सरु बेठ्यो। ३८† ईसु रीति मुजब जिमवा से पेलां सांपड़्यो हयनी इकासरु फरीसी ने यो देख्यो तो उके अचरज होयो। ३९† पण परभु ने उकासे क्यो, "हे फरीसिहुंण, तम कटोरा अने परात के बायरे से तो मांजो हो, पण तमारा भितरे डाकूपणो अने बुरई भरी हे। ४०† हे मूरखहुंण, जेने बायरे को हिस्सो बणायो, तो कई उने भितरे को हिस्सो नी बणायो? ४१† पण जो भितरे को हे उके दान करी दो तो तमारा सरु सगळो कई सुद्ध हुई जायगा।^१

४२† "पण हे फरीसिहुंण, तमार पे हाय! क्योंकि तम पोदिनो अने सुदाब अने नरी-तरा का साग-पातहुंण को दसवों हिस्सो तो दो पण न्याव अने परमेसर का परेम के टाळी लाखो हो। होणो तो यो थो के इणके बी करता रेता अने उणके बी नी टाळता।

४३† "हे फरीसिहुंण, धिक्कार हे तमार पे! क्योंकि तमार पराथनाघरहुंण माय सामे की जगा माय बेठणो अने हाट-

^प ११.३३ उजाळो मिळे; यूनानी माय सच्चई मिळे।

^१ ११.३४-३६ उजाळा; ईसु को इना उजाळा का मिसाल से यो अरथ हे के, अगर मनख को बिसास ईसु का परबचन पे हे तो उकी आखी जिनगी माय उजाळो अने सच्चई रे हे। ^१ ११.४१ सगळो कई सुद्ध हुई जायगा; तमारा हिरदा माय गरीब-गुरबा सरु परेम से मदद करवा को भाव रे तो तमारी आखी काया साफ रेगा, अने परमेसर बी मानेगा।

[†] ११.३१: १ राजा १०.१-१०; २ इतयास ९.१-१२

[†] ११.३२: योना ३.५

[†] ११.३३: मती ५.१५; मरकुस ४.२१; लूका ८.१६

[†] ११.४२: लेव्यव्यवस्था २७.३०

बजार माय मान भर्यो परणाम भलो लागे हे। ४४ धिक्कार तमार पे! क्योँके तम उण नगे नी आवा वाळी कबर सरीका हो, जिणका पे मनख अण्जाण्या माय चल्या-फिरे।"

४५ तो नेम-बिधान का जाणकारहुंण माय से एक ने जुवाब द्यो, "हे गरु, असो कई के तू हमारोज मान पाड़े हे।"

४६ पण उने क्यो, "धिक्कार हे तम नेम-बिधान का जाणकारहुंण पे! क्योँके तम मनखहुंण के असा बजन से दबाव, जेके उठाइणो अबगो हे हालाके तम खुद उना बजणहुंण के अंगळी लगाणो नी चावो। ४७ धिक्कार तमार पे! क्योँके तम उण नबिहुंण की कबर बणाव जिणके तमाराज पूरखाहुंण ने मारी लाख्या था। ४८ इकासर तमीज गवा हो अने अपना पूरखाहुंण का काम से तम राजी हो। क्योँके उणने तो उणके मारी लाख्या था अने तमने उणकी कबरहुंण बणई। ४९ इनी वजासे परमेसर की बुद्धि ने क्यो, 'हूं उणका कने नबिहुंण अने परेरितहुंण के मोकलुंवां, उणका माय से थोड़ाक के मारी लाखेगा अने थोड़ाक के सताड़ेगा।' ५० जेकासे के जगत का सुरु सेज जितरा नबिहुंण को लोई बिवाइयो उको लेखो परमेसर इनी पीड़ी का मनखहुंण से लेगा। ५१ याने हाबिल का लोई से लई के तो जकरियाह का लोई तक को लेखो,

जेकी हत्या परमेसर का भवन अने बेदी का बीच माय करी गी थी। हां, हूं कूं के, इनी पीड़ी का मनखहुंण से लेखो ल्यो जायगा।

५२ "धिक्कार हे तम नेम-बिधान का जाणकारहुंण पे! क्योँके तमने परमेसर का ज्ञान की कुन्ची छुड़ई ली। तम खुद तो भित्तरे नी गया अने जो जावा की करी र्या था उणके बी रोख्या।"

५३ जदे उ वां से चल्थो ग्यो तो फरीसी अने सासतरी काठा बिरोद करता होया नरी बातहुंण का बारामें उकासे बारीकी से सवाल करवा लाग्या, ५४ अने उका सरु कुचक्कर रचवा लाग्या के उकाज मुन्डा की बात से उके फांसे।

ढोंगी मती बणो

(मती १०.२६-२७)

१२ † असा हाल माय जदे हज्जारों लोगहुंण की बड़ीमेक भीड़ भेळी हुई गी थी, यां तक के वी एक दूसरा का अदरे पड़ी र्या था तो सगळा से पेलां उने अपना चेलाहुंण से केणो सुरु कर्यो, "फरीसिहुंण का खमीर याने उणका कपट से होसियार री जो। २ † जो कइंज ढांक्यो होयो हे उ खोल्यो जायगा। अने जो कई छिप्यो हे उ जाण्यो जायगा। ३ इकासर जो कई तमने इन्दारा माय क्यो, उ उजाळा माय सुण्यो जायगा, अने जो कई

११.४४ नगे नी आवा वाळी कबर; अदरे से बरोबर, याने मनख बायरे से तो भलो पण भित्तरे खराब जसे के कबर। ११.४७ तमाराज पूरखाहुंण ने मारी लाख्या था; यहूदिहुंण नबिहुंण की कबर तो अच्छी बणाव अने उणको मान बी राखो, पण सांची माय उणका हुकम के जो परमेसर को हुकम हे, नी माने हे। तो यहूदिहुंण बी अपना पूरखाहुंण का गेले नबिहुंण के घात करवा माय सेमत हे।

† ११.५१: उत्पत्ती ४८-२ इतयास २४.२०-२१ † १२.१: मती १६.६; मरकुस ८.१५

† १२.२: मरकुस ४.२२; लूका ८.१७

तमने भितरे घर माय फुसफुसई के क्यो,
उ छत अदरे से परचार क्यो जायगा!

सिरप परमेसर से डरो

(मती १०.२८-३१)

४ "म्हारा दोस सुणो, हूं तमार से कूं,
उणकासे मती डरो जो तमारी काया के
नास करे पण इका पाछे हजु कइंनी करी
सके। ५ हूं तमारे चेतउं के किकासे डरणो
चाय: उकासे डरो जेके यो हक हे के
मारवा का बाद नरक माय लाखे। हां हूं
तमार से कूं के उकासेज डरो!

६ "कई दो पइसा माय पांच चिरकलिहंण
नी बिके? फेर बी परमेसर उणका माय
से कइंकी केज नी बिसारे। ७ पण सांची
माय तमारा माथा का सगळा बाल बी
गिण्या होया हे। घबराव मती! तम नरी
चिरकलिहंण से बड़ा मोलका हो।

ईसु की वजासे लजाओ मती

(मती १०.१९-२०, ३२-३३; १२.३२)

८ "हूं तमार से कूं जो मनखहुंण का
सामे म्हारे मानी लेगा, हूं मनख को बेटो
बी उके परमेसर का सरगदूतहुंण का सामे
मानी लुंवां। ९ पण जो मनखहुंण का सामे
म्हारे नी माने, उके हूं बी परमेसर का
सरगदूतहुंण का सामे नी जाणूवां।

१० "हूं मनख का बेटा का बिरोद माय
जो एक बी सबद् बोले, उको कसूर मांफ
क्यो जायगा। पण जो पवितर आतमा
की निंदा करे हे, उको कसूर मांफ नी
क्यो जायगा।

११ "जदे वी तमारे पराथनाघर,
सासकहुंण अने हाकिमहुंण का सामे लई
जाय तो इनी बात की फिकर मती करजो
के अपने बचने सरु तमारे कसो अने कई
जुवाब देणो चइये, या कई केणो चइये,
१२ क्योके पवितर आतमा तमारे उनीज
बखत सीखाड़ेगा के कई केणो चाव हो।"

धणी मूरख

१३ भीड़ माय से कइंका ने ईसु से क्यो,
"हे गरु, म्हारा भई से के, के म्हारा
पिताजी का धन के म्हारा गेले बांटी ले।"

१४ पण उने उकासे क्यो, "हे भई, केने
म्हारे तमारो न्यावी अने बांटो करावा
वाळो बणायो?" १५ तो फेर ईसु ने भीड़
से क्यो, "होसियार! हरतरा का लोभी से
होसियार रो। क्योके धन की बड़ती होवा
पे बी कइंका को जीवन उका धन का
भरोसे आनन्द से नी चले।

१६ तो उने उणके एक मिसाल दई के
क्यो, "धणी मनख की जमीन माय
अच्छी पादरी" अई। १७ उ अपना मन
माय यो बिचार करवा लाग्यो, 'हूं कई
करूं? म्हारा कने गल्लो राखवा सरु तो
जगा हयनी।' १८ उने क्यो, 'हूं असो करूंवां
के अपना भण्डार्याहुंण तोड़ी के मोटा
भण्डार्याहुंण बणउंवां अने उका मायज
अपणो सगळो गल्लो अने धन धरूंवां।
१९ जदे हूं अपना जीव से कुंवां, 'हे म्हारा
जीव, थारा कने नरा बरसहुंण सरु गंज
धन भर्यो हे। चेन कर, खा पी अने
खुसी मना।' २० पण परमेसर ने उकासे

^५ १२.१६ पादरी; फसल आणो।

^६ १२.१०: मती १२.३२; मरकुस ३.२९

^७ १२.११-१२: मती १०.१९-२०; मरकुस १३.११; लूका २१.१४-१५

क्यो, 'हे मूरख, आजज रात थारो जीव थार से लई ल्यो जाय, तो जो कई तने भेलो क्यो उ केको रेगा?' "

२१ईसु बोल्थो, "असोज उ मनख बी हे जो अपणा बले धन तो भेलो करे पण परमेसर की नगे माय धणी हयनी।"

परमेसर पे बिसास करो, सांसो मती करो

(मती ६.२५-३४)

२२फेर उने अपणा चेलाहुण से क्यो, "इनी वजासे हूं तमार से कूं, अपणा जीव सरु यो कई के सांसो मती करो के हम कई खावांगां; नी काया सरु करो के कई पेरांगां। २३क्योंके जीव भोजन से, अने काया लतरा से बडी के हे। २४कागलाहुण पे ध्यान धरो, क्योंके वी नी तो बोय, नी काटे, अने नी उणका कने भण्डारा अने नी गुदाम हे। फेर बी परमेसर उणके खवाड़े हे। तम तो पखेरुहुण से नरा मोल का हो! २५तमारा माय असो कुंण हे जो चिंता करिके अपणा जीव के एक घडी बी बड़ई सके हे? २६तो अगर तम नानो से नानो काम बी नी करी सको तो दूसरी बातहुण को सांसो कायसरु करो हो? २७सोसन का रोपाहुण पे ध्यान धरो के वी कसे बदे। वी नी तो म्हेनत करे, नी काटे। पण हूं तमार से कूं के सुलेमान राजो बी अपणा आखा वेभव माय इणका माय से कईका एक का जसा लतरा नी पेर्यो थो। २८तो अगर परमेसर चोगान का चारा के जो आज हे अने काल भाड

माय झोंक्यो जायगा असो पेराय, तो हे कमबिसासिहुण, उ तमारे हजु कायसरु नी पेरायगा।

२९"इनी बात की फिराक माय मती रो, के हम कई खावांगां अने कई पियांगा, इणका सांसा मेंज मती लाग्या रो। ३०क्योंके आखा जगत का अबिसासिहुण जो परमेसर के नी जाणे घणा जतन से इनी सगळी चीजहुण की तलास माय लाग्या रे। पण तमारो पिता जाणे के तमारे इनी चीजहुण की जरुवत हे। ३१तो पेलां उका राज के दुंडो, तो ई सगळी चीजहुण बी तमारे दई दी जायगा।

सरग माय धन

(मती ६.१९-२१)

३२"ऐ नाना झुंड, डरे मती! क्योंके तमारा पिता ने खुस हुई के तमारे राज देणो चायो। ३३अपणी धन-सम्पत्ती बेची के दान करी लाखो। अपणा सरु असा बटवा बणाव जो जूना नी होय, याने खतम नी होवा वाळो धन सरग माय भेलो करो, जां नी तो चोळो कने आय अने नी उके किडो लागे। ३४क्योंके जां तमारी धन-सम्पत्ती वांज तमारो हिरदो बी लाग्यो रेगा।

जागता रो मालेख आवा वाळो हे

३५"तमारी कमर कसी रे, अने तमारो दीयो बळतो रे। ३६उना दासहुण सरीका बणो जो अपणा मालेख के, जदे उ ब्याव माय जिमवा जई ने पाछो आवे तो

१ १२.२५ जीव के एक घडी बी बड़ई सके; या जीवन के लम्बो करी सके।

१ १२.२७: १ राजा १०.४-७; २ इतयास ९.३-६ १ १२.३५: मती २५.१-१३

१ १२.३६: मरकुस १३.३४-३६

बाट देखता रे के जदे अई के ने कमांड खटखटाड़े तो झट खोली दे। ^{३७}धन्य हे वी दास जिणके मालेख अई के सावधान पाय; हूं तमार से खास बात कूं के उ अपणी कमर कसी के उणकी सेवा करेगा अने उणके जिमवा बेठाड़ेगा अने खुद अई के परोसेगा। ^{३८}चाय उ आदी राते आय या परोड़े आवा पे उणके चोकन्ना पाय तो वी दास धन्य हे। ^{३९}"यो पक्को जाणो के अगर घर-मालेख जाणी जाय के चोब्डो कां का बखत आयगा तो उ अपणा घरे खाद नी लगावा देतो। ^{४०}तम बी तय्यार रो, क्योंकि हूं मनख को बेटो उनी घड़ी अई र्यो हूं जेका बारामें तम सौंचीज नी सको।"

बिसासी अने अबिसासी दास

(मती २४.४५-५१)

^{४१}तो पतरस ने क्यो, "हे परभु, कई तू या मिसाल सिरप हमार सेज कई र्यो हे या सगळा मनखहुंण से?"

^{४२}परभु बोल्थो, "असो बिसासी अने समज वाळो भण्डारी कुण? उ जेके उको मालेख अपणा दासहुंण पे हाकिम ठेराय के, उ उणके ठीक बखत पे सीदो दे। ^{४३}धन्य हे उ मुनीम जेके उको मालेख जदे उ आय तो असोज करतो पाय। ^{४४}हूं तमार से खास बात कूं के उ अपणी सगळी धन-सम्पत्ती पे उके हाकिम ठेरायगा। ^{४५}पण अगर उ मुनीम अपणा हिरदा माय यो के हे, 'म्हारो मालेख घणी देर से आयगा,' अने दासहुंण के मारवा-

कुटवा लागे अने खई-पीके नसा माय चूर पड़्यो रे, ^{४६}तो उना मुनीम को मालेख उना दन जदे उ बाट बी नी जोय, अने उनी घड़ी जेके उ नी जाणे, अई जायगा। अने काठी सजा दई के" उके हुकम नी मानवा वाळा कमबिसासिहुंण का गेले राखेगा^x

^{४७}"उ मुनीम, जो अपणा मालेख की मरजी जाणतो थो, पण जेने तय्यार हुई के उकी मरजी का मुजब काम नी कर्यो घणी चाबुक खायगा। ^{४८}पण जो सेवक अपणा मालेख की मरजी नी जाणतो थो, पण गलती तो करी, तो उके चनिक मार पड़ेगा। जेके घणो द्यो उकासे घणो मांग्यो जायगा। अने जेके नरो समळायो, उकासे नरो ल्यो जायगा।

ईसु की वजासे लोगहुंण माय बिरोद

(मती १०.३४-३६)

^{४९}"हूं धरती पे बिरोद की भस्ती लगावा आयो हूं अने म्हारी घणी मरजी हे के वा अबी से लागी जाय। ^{५०} पण म्हारे एक बपतिसमो लेणो हे याने दुःख उठाइणो हे। जदत्तक उ पूरण नी हुई जाय हूं कसी भेम माय पड़्यो हूं! ^{५१}तम कई सौंची र्या, के हूं धरती पे मेळ-मिळाप करावा आयो हूं? पण हूं तमार से कूं मेळ-मिळाप नी, पण मुण्डामुण्ड करवा आयो हूं। ^{५२}क्योंके अब से जेना घर माय पांच जणा रेगा उणका माय आपसी बिरोद रेगा, तीन, दो का अने दो तीन को बिरोद करेगा। ^{५३} वी एक दूसरा का

^w १२.४६ काठी सजा दई के; या बायरे फेंकी लाखेगा।
या कमबिसासिहुंण का सजा मिळेगा।

^x १२.४६ कमबिसासिहुंण का गेले राखेगा;

^f १२.३९-४०: मती २४.४३-४४

[†] १२.५०: मरकुस १०.३८

[†] १२.५३: मीका ७.६

बिरोदी रेगा। बाप बेटा को अने बेटो बाप को, मेतारी बेटा की अने बेटा मेतारी की, सासु बउ की अने बउ सासु की बिरोदी रेगा।"

बखत के अनमोल जाणो

(मती १६. २-३)

५४उने भीड़ से बी क्यो, "जदे तम आथपू आड़ी बादळा उठता देखो हो तो झट को हो 'बरसात होयगा' अने असोज होय हे। ५५जदे तम दक्खणवी बायरो चलतो देखो तो को हो 'घणो तपेगा' अने असोज होय। ५६हे ढोंगीहुंण! तम धरती अने असमान का रुप माय भेद पाड़ी सको, पण जो काम म्हने कर्या उणका बारामें कायसरु भेद करनो नी जाणो?

बेरी से मिळाव

(मती ५. २५-२६)

५७"अबे तम अच्छो फेसलो कायसरु नी करो हो? ५८जदे तू अपणा बेरी का गेले न्यावलय तक जाय, तो बाट मायज उका गेले समजोतो करवा की कोसिस कर। असो नी होय के उ थारे न्यावधीस का सामे घसीटी के लई जाय अने न्यावधीस थारे सिपई का हात माय दर्ई दे अने सिपई थारे जेळ माय लाखी दे। ५९हूं थार से कूं के समजोतो करी ले नितो जदत्तक तू पई-पई नी चुकई देगा, वां से छुटी नी सकेगा।"

अपणा पाप से फरो नी तो मरोगा

१३ उनीज बखत वां थोडासा लोगहुंण अई गया था, जिणने उके उना गलीलिहुंण का बारामें बताइयो जिणको

लोई पिलातुस ने उणकी बलिहुंण का गेलेज मिळई द्यो थो। २ईसु ने जुवाब देतो होयो क्यो, "कई तम समज्या हो के ई गलीली दूसरा सगळा गलीलिहुंण से जादा पापी था के उणको यो हाल होयो? ३हूं तमार से कूं असो नी हे! पण जदत्तक तम हिरदो नी बदळो तम सगळाज असाज खतम हुई जावगा। ४या, तम समजो हो के वी अठ्ठारा जणा जिणका पे सीलोह को गुमंच रइक्यो अने कुचई के मरी गया, कई वी यरुसलेम माय रेवा वाळाहुंण से जादा कसुरवार था? ५हूं कूं असो नी, पण जदत्तक तम हिरदो नी बदळो तम सगळाज असाज खतम हुई जावगा।"

अंजीर का झाड़ की मिसाल।

६ईसु या मिसाल देवा लाग्यो: "कइंका मनख ने अंगूर का बगीचा माय एक अंजीर को झाड़ बी लगाड़ी राख्यो थो। उ उका माय फळ दुंडवा आयो पण उके कइंनी मिळ्यो। ७तो उने मांळी से क्यो, 'देख तो, हूं तीन बरस से इना अंजीर का झाड़ माय फळ दुंडवा अउं हूं, पण कइंनी लादयो। इके काटी लाख! यो यूज जमीन के घेरी र्यो हे।' ८पण मांळी ने उके जुवाब द्यो, 'मालेख, इना बरस बी इके रेवा दे। हूं इका चारी-मेर खोदी के खाद लाखुंवां। ९अगल्या बरस अगर यो फळ दे तो ठीक, नितो इके काटी लाखजे।' "

कुबड़ी बइरा के सुदी करनो

१०ईसु सबत् का दन एक पराथनाघर माय परबचन दर्ई र्यो थो। ११देखो, वां एक बइरा जेके अठ्ठारा बरस से एक

बायरबादा ने बेमार करी राखी थी; उकी कमर नमी गी थी। अने वा कसी तरा बी सुदी नी हुई सकती थी। ^{१२}जदे ईसु ने उके देख्यो तो अपणा कने बुलाड़ी के उकासे क्यो, "हे नारी, तू अपणी बेमारी से नज हुई गी।" ^{१३}जदे उने उका पे हात धर्यो; वा जदेज सुदी हुई गी अने परमेसर की बड़ई करवा लागी।

^{१४} तो अराधनालय को हाकिम इनी बात से रीस माय अई के, के ईसु ने सबत् का दन बेमार के नज कर्यो, भीड़ से केवा लाग्यो, "छे: दन हे जिणका माय काम करनाँ चइये, तो उणाज दनहुंण माय नज होणे आव, पण सबत् का दन मती आव।"

^{१५} पण परभु ने जुवाब द्यो, "हे ढोंगीहुंण, कंई तमारा माय से हर मनख सबत् का दन अपणा बेल अने गदड़ा के खुंटा से छोड़ी के पाणी पिवाइवा नी लई जाय? ^{१६} या नारी तो इबराइम की बेटी, जेके सेतान ने अठारा बरस का लम्बा बखत से बान्दी राखी थी। इके इना बन्दण से छुड़ाणो कंई सबत् का दन जरूरी हयनी?" ^{१७} जदे उने यो क्यो तो उका सगळा बिरोदी सरमिन्दा होया, अने आखी भीड़ अचरज का म्हान काम जो उकासे होता जई र्या था, खुस होया।

रई का दाणा की मिसाल

(मती १३.३१-३२; मरकुस ४.३०-३२)

^{१८} तो उने क्यो, "परमेसर को राज केका सरीको हे? अने हूं उको मिलाण किकासे करूं? ^{१९} उ बळडा का बीज

सरीको, जेके एक मनख ने अपणा बगीचा माय बोयो। उ बड़ी के झाड़ बणी ग्यो। अने असमान का पखेरुहुंण ने उकी डगाळ पे बसेरो कर्यो।"

खमीर की मिसाल

(मती १३.३३)

^{२०} फेर उने क्यो, "हूं परमेसर का राज को मिलाण किकासे करूं? ^{२१} उ उना खमीर सरीको हे जेके एक बड़रा ने लई के तीन पसेरी आंटा माय मिळई लाख्यो, अने आखो आंटोज खमीर हुई ग्यो।

सांकड़ा रस्ता से परमेसर का राज माय जाणो

(मती ७.१३-१४, २१-२३)

^{२२} उ नगर-नगर अने गांम-गांम हुई के परबचन देतो होयो यरुसलेम जई र्यो थो। ^{२३} तो कइंका ने उकासे क्यो, "हे परभु, कंई उध्दार पावा वाळा थोड़ाज हे?"

ईसु ने उणकासे क्यो, ^{२४} "सांकड़ा कमाड़ से भितरे जावा की कोसिस करो, क्योँके हूं तमार से कूं के नरा हे जो जावा की कोसिस तो करेगा पण सफल नी रेगा। ^{२५} एक कावा जदे घर मालेख उठी के बारनों बन्द करी लाखे। अने तम बायरे उबा हुई बारनों खटखटाड़ी के को, 'हे मालेख, हमारा सरु खोली दे।' तो उ तमार से केगा, 'हूं नी जाणूं के तम कां से आया हो।' ^{२६} जदे तम केवा लागोगा 'हमने थारा सामे खायो-प्यो अने तने हमारी सेरीहुंण माय परबचन

द्यों।' २७+ तो उ केगा, 'हूं कूं के हूं नी जाणूं के तम कंय्यांडी से अई र्या हो। हे सगळा बुरा करम करवा वाळाहुंण, म्हार से परे हुई जाव।' २८++ जदे तम इबराइम, इसाक, याकूब अने सगळा नबिहुंण के तो परमेसर का राज माय बेठ्या होया, पण अपने खुद के बायरे निकाळ्या होया देखोगा, जां रोणो अने दांत पिसणो रेगा। २९ उणणूं अने आथणूं धरउ, दक्खणव से परमेसर का राज का भोज माय बिसासी लोग भेळा होयगा। ३०+ अने देखो, अबे जितरा पछात्या हे वी अगात्या रेगा, अने अबे जितरा अगात्या हे वी पछात्या रेगा।"


ईसु अने सासक हेरोदेस

(मती २३.३७-३९)

३१ ठीक उणाज बखत थोड़ाक फरीसिहुंण अई के उकासे केवा लाग्या, "यां से हिटी जा, क्योंकि हेरोदेस थारे मारी लाखणो चावे।"

३२ ईसु ने उणकासे क्यो, "उना व्यागसळी सरीका चालाक अने निरदयी मनख से जई के को के हूं आज अने काल बायरबादाहुंण के हेडूं अने बेमारहुंण के नज करूं, अने तीसरा दन म्हारो काम पूरण हुई जायगा। ३३ फेर बी म्हारे आज, काल अने परसु जातरा करनो जरूरी हे। क्योंकि यो हुई नी सके के कई को नबी यरुसलेम का बायरे मार्यो जाय।

३४ "हे यरुसलेम, हे यरुसलेम, वा नगरी जो नबिहुंण के मारी लाखे, अने जिणके



मुरगी का पांख माय चुजाहुंण (LUK १३.३४)

परमेसर ने थारा कने मोकल्या था उणके भाटा मार्या करे! कितरी कावा म्हने चायो के जसे मुरगी अपणा बच्चाहुंण के अपणा पांखड़ा तळे भेळा करे, असाज थारा बाळकहुंण के भेळा करूं, पण तने यो चायो हयनी! ३५+ देखो, तमारा मन्दर अने तमारा नगर उजाड़्या जाय! अने हूं तमार से कूं जदत्तक तम कोगा हयनी के 'धन्य हे उ जो परभु परमेसर का नाम से आय हे!' तदत्तक तम म्हारे फेर कदी नी देखोगा!"

ईसु एक मनख के सबत् का दन माय नज करे

१४ फेर असो होयो के सबत् का दन, जदे ईसु फरीसिहुंण का कइंका हाकिम का घरे जिमवा ग्यो, तो वी उकी फिराक माय था। २ वड्ज उका सामे एक मनख थो जो जळोदर का रोग से परेसान थो। ३ ईसु ने नेम-बिधान का जाणकारहुंण अने फरीसिहुंण से क्यो, "सबत् को दन बेमारी से नज करनो ठीक हे के नी?"

* १३.२७: भजन संहिता ६.८ * १३.२८: मती २२.१३, २५.३० * १३.२८-२९: मती ८.११-१२

* १३.३०: मती १९.३०, २०.१६; मरकुस १०.३१ * १३.३५: भजन संहिता ११८.२६; यरमियाह २२.५

४पण वी छाना र्या। तो ईसु ने उको हात पकडी के नज कर्यो अने जावा द्यो। ५+ उने क्यो, "तमारो बेटो या बले कुवां माय पडी जाय तो तमारा माय असो कुण हे के उके सबत् का दन झट बायरे नी हेडी ले?"

६वी इना सवाल को कई जुवाब नी दर्ई सक्या।

जो नरम हे परमेसर उको मान करे

७जदे उने देख्यो के पांमणाहुंण कसतरा अपणा सरु खास खास जगा छांटी र्या हे, तो उ उनके मिसाल दर्ई केवा लाग्यो: ८+ "जदे कई को थारे ब्याव का भोज माय जिमवा सरु तेडे तो खास जगा पे मती बेठजे, कदी असो नी होय के उने थार से जादा मान-सम्मान वाळा पांमणा के नोत्यो होय, ९अने उ जेने तमारे दोई के नोत्यो, अई के थार से के, 'उके बेठवा दीजे।' तो थारो मान घटी जायगा, अने थारे सगळा का पछड़े बेठणो पड़ेगा। १०पण जदे थारे नोत्यो जाय तो जई के निच्ची जगा पे बेठजे जेकासे जेने थारे नोत्यो हे, अई के थार से के, 'दोस, अगड़े अई के बेठ।' तो सगळा की नगे माय जो थारा गेले बेठ्या थारो मान बड़ेगा। ११+ क्योके हरेक जो अपने खुद के उंचो करे हे, उ निच्यो कर्यो जायगा, अने उ जो अपने खुद के नरम करे उको मान राख्यो जायगा।"

१२तो जेने ईसु के नोत्यो थो, उकासे क्यो, "जदे तू कइंका के दन या रात माय भोज माय जिमवा सरु बुलाड़े तो

अपणा दोस या भई-बन्द, नातेदार या धणी पडोसिहुंण के मती बुलाइजे। कई असो नी होय के वी बी थारे सारी-सारी से बुलाड़े, अने थारो बदळो चुकी जाय। १३पण जदे तू भोज करे तो गरीब-गुरबा, टुन्डाहुंण, पांगळाहुंण अने आंदा के नोत्या कर। १४तो थारे आसीस मिळेगा, उणका कने कई को असो साधन हयनी के थारी सारी फेरी दे, पण धरमिहुंण का जी उठवा पे थारे इको फळ मिळेगा।"

महा-भोज की मिसाल

(मती २२.१-१०)

१५तो उका गेले जिमवा वाळा माय से एक ने यो सुणी के उकासे क्यो, "धन्य हे उ जो परमेसर का राज माय रोटा खायगा।"

१६पण उने उकासे क्यो, "कइंका मनख ने एक बड़ो भोज कर्यो अने उने नरा लोगहुंण के नोत्या। १७भोज तय्यार होवा पे उने अपणा सेवक के उना लोगहुंण कने तेडवा मोकल्या, जिणके नोत्या था, 'आव, सगळो कई तय्यार हुई ग्यो हे।' १८पण वी सगळा का सगळा मांफी मांगवा लाग्या। पेलां ने उकासे क्यो, 'म्हने एक खेत मोल ल्यो, तो जई के उके देखणो जरूरी हे। तो किरपा करिके म्हारे तो मांफ करी दे।' १९दूसरा ने क्यो, 'म्हने पांच जोड़ी बेल मोल ल्या हे। म्हारे उणके परखवा जाणो हे। किरपा करिके म्हारे मांफ करी दे।' २०फेर एक हजु ने क्यो, 'म्हने ब्याव कर्यो तो हूं नी जई सकतो।'

* १४.५: मती १२.११

* १४.८-१०: नीतिबचन २५.६-७

* १४.११: मती २३.१२; लूका १८.१४

२१"सेवक ने अई के अपना मालेख के ई बातहुंण बतई। तो घर मालेख ने रीस माय अई के ने दास से क्यो, 'नगर की सेरी-गळिहुंण माय जई के झट गरीब-गुरबा, टुन्डाहुंण आंदा अने पांगळाहुंण के यां ल्यावा।' २२तो सेवक ने फेर-पाछो क्यो, 'मालेख, थारा हुकम मुजब कर्यो, पण जगा अबी बी बाकी हे।' २३तो मालेख ने क्यो, 'राज मारगहुंण अने बाड़ा आडी जई के लोगहुंण के आवा सरु बेबस करी लाखो के म्हारो घर भरई जाय। २४क्योंके हूं तमार से कूं के जो नोत्या गया था उणका माय से कइंका म्हारा भोज के नी चाखेगा!' "

चेला बणवा को मोल

(मती १०.३७-३८)

२५जदके बडीमेक भीड़ उका गेले जई री थी उने पाछे फरिके लोगहुंण से क्यो, २६+ "अगर कई को म्हारा कने आय अने अपना मां-बाप, घराळी, बाळकहुंण अने भई-बेनहुंण के यां तक के अपना पराण से बी बती म्हार से परेम करे। तोज उ म्हारो चेलो हुई सकतो। २७+ जो म्हारो चेलो हुई जावे, उ अपणो कुरुस उठई के म्हारा पाछे चले^१ हे।

२८"तमारा माय से कुंण असो जो गढ बणाणो चावे पण पेलां बेठिके हिसाब नी लगाडी ले के म्हारा कने पूरण करवा सरु पूरो पड़ेगा के नी?" २९नी तो जदे उ नीम लाखी ले अने उके पूरण नी करी सके

तो वी जो उके देखी र्या हे उकी मजाक उड़ायगा। ३०अने केगा, 'उना मनख ने बणणो तो सुरु कर्यो पण पूरो नी करी सक्यो!'

३१"या कुंण असो राजो होयगा जो दूसरा राजा से लड़वा जाय, पण पेलां बेठिके सला नी ले, के 'बीस हज्जार सेनिकहुंण के लई के जो राजो म्हार पे चडई करवा अई र्यो हे, उको सामो हूं दस हज्जार सेनिकहुंण से करी सकूं के नी?' ३२नितो उकासे दूर रीकेज उ दूतहुंण के मोकली के समजोता की सरतहुंण का बारामें पुछेगा। ३३असतरा तमारा माय से कई को म्हारो चेलो नी हुई सकतो, जदतक के उ अपनी सगळी धन-सम्पत्ती के त्यागे हयनी।

चेला अने लूण

(मती ५.१३; मरकुस ९.५०)

३४"लूण तो ठीक हे, पण अगर लूण को सुवाद अळुणो हुई जाय तो उ कां की चीज से सुवादयो कर्यो जायगा? ३५नी तो उ जमीन अने नी खाद का काम आवे, पण लोग उके बायरे फेंकी लाखे। जिणका सुणवा का कान होय वी सुणी ले।"

खोई गाडर की मिसाल

(मती १८.१२-१४)

१५+ सगळा कर-वसुळवा वाळा अने पापी ईसु कने अई र्या था के

^१ १४.२७ अपणो कुरुस उठई के म्हारा पाछे चले; ईसु को चेलो बणवा सरु मनख अपणो हिरदो बदळे अने अपनी काया के परमेसर का काम सरु मरवा तक तय्यार राखे।

⁺ १४.२६: मती १०.३७ [†] १४.२७: मती १०.३८, १६.२४; मरकुस ८.३४; लूका ९.२३

[†] १५.१-२: लूका ५.२९-३०



खोई हुई गाडर (LUK १५.४)

उकी सुणे। ^२तो फरीसी अने सासतरी बड़बड़ के केवा लाग्या, "यो मनख पापिहुंण का गेले मिळे-जुळे अने उणका गेलेज खावे बी हे।" ^३तो ईसु ने उणकासे या मिसाल दर्ई क्यो:

४ "तमारा माय से असो कुंण मनख जेका कने सो गाडर होय अने उणका माय से एक खोवई जाय, तो निन्याणु के खुली चरणोई माय छोडी के, उनी खोवई हुई के तदत्तक दुंडतो नी रे जदत्तक वा मिळी नी जाय? ^५जदे वा उके पई जाय तो घणी खुसी से कांधा पे उठाडी ले। ^६घरे पोंचवा पे उ अपणा दोसहुंण अने पड़ोसिहुंण के भेळा करिके, के हे 'म्हारा गेले मिळी के खुसी मनाव, क्योँके म्हारे म्हारी खोवई हुई गाडर मिळी गी।' ^७हूं तमार से कूं के असतरा निन्याणु धरमिहुंण, जिणके मन बदळवा की जरुवत हयनी उणका बजाय सरग माय जादा खुसी एक पापी का बारामें रेगा जो मन बदळे हे।

खोयो सिक्को

८ "या कुंण असी बड़रा रेगा जेका कने चांदी का दस सिक्का रे अने एक खोवई

जाय, तो वा दीयो बाळी के अने घर के संजवारो-बारो काडी के तदत्तक ध्यान से दुंडती नी रे जदत्तक के उ मिळी नी जाय? ^९जदे उ लादी जाय तो अपणी सखिहुंण अने पड़ोसिहुंण के भेळा करी ने के, 'म्हारा गेले खुसी मनाव, क्योँके म्हने उना खोया होया सिक्का के पई ल्यो हे।' ^{१०}"हूं तमार से कूं के असोज एक मन बदळवा वाळा पापी सरु बी परमेसर का सरगदूत का गेले खुसी मनई जाय हे।"

खोयो बेटो अने पिताजी को तरस

^{११}फेर उने क्यो, "कइंका मनख का दो बेटा था। ^{१२}उणका माय जो नानो थो, उने पिताजी से क्यो, 'पिताजी, धन-सम्पत्ती को उ हिस्सो जो म्हारा बांटा माय आवे म्हारे अबे दर्ई दो। अने पिता ने अपणी धन-सम्पत्ती उणका माय बांटी लाखी। ^{१३}नरा दन नी बित्या था के नानो सगळो कंई भेळो करिके दूर देस चली पड़्यो, जां उने अपणो धन बुरा करम माय उजाडी लाख्यो। ^{१४}जदे उ सगळो धन उजाडी चुक्यो तो उना देस माय बिखो पड़्यो अने उ कंगाळ हुई ग्यो। ^{१५}अने उ जई के उना देस का एक जणा का यां काम पे लागी ग्यो। उने उके खेत माय सुंवर चरावा मोकल्यो। ^{१६}अने उ चातो थो के उण फळीहुंण से जेके सुंवर खाय उकासे अपणो पेट भरे; अने उके कई को कइंनी देतो थो। ^{१७}जदे उको होंस ठिकाणे लाग्यो तो उने क्यो, 'म्हारा पिताजी का कितराज मजुर्याहुंण के पेट भरिके रोटा-पाणी मिळे पण हूं यां भूके मारी र्यो हूं। ^{१८}हूं उठी के अपणा पिताजी कने जंवां अने उकासे कुंवां, पिताजी, म्हने सरग का बिरोद अने



उजाड़यो बेटो (LUK १५.१७)

थारी नगे माय पाप कर्यो। ^{१९}हूं अबे थारो बेटो केवाणे लायक नी र्यो; म्हारे अपणो एक मजुर्यो समजी के राखी ले। ^{२०}तो उ उठी के अपणा पिता आडी चली पड़्यो।

"पण जदे अबी उ दूरोज थो उका पिताजी ने उके देख्यो अने उका पे तरस खायो। उने दोड़ी के उके बाद माय भरी ल्यो अने चुम्यो। ^{२१}बेटा ने उकासे क्यो, 'पिताजी, म्हने सरग का बिरोद अने थारी नगे माय पाप कर्यो हे। हूं थारो बेटो केवाणे लायक नी र्यो।' ^{२२}पण बाप ने अपणा दासहुंण से क्यो, 'बड़्या से बड़्या लतरा झट हेडी ल्याव अने उके पेराव! अने उकी अंगळी माय बिंटी अने पग माय पन्नी पेराव! ^{२३}अने एक जाड़्यो बचड़ो लई के काटो के हम खावां, अने खुसी मानावां। ^{२४}क्योंके म्हारो यो बेटो मरी ग्यो थो, अबे जिन्दो हुई ग्यो हे; यो खोवई ग्यो थो अबे लादी ग्यो।' अने वी खुसी मनाइवा लाग्या।

^{२५}"उको मोटो बेटो जो खेत पे थो, जदे घर का कने आयो तो उने गाणे-

बजाणे की अने नाचवा की अवाज सुणी। ^{२६}उने एक दास के हेला पाड़ी के पुछ्यो के यो सगळो कंई हुई र्यो हे? ^{२७}उने उकासे क्यो, 'थारो भई आयो हे, अने इकासरु के थारा पिताजी ने उके भलो-चंगो पायो हे तय्यार-जाड़्यो बचड़ो काट्यो।'

^{२८}"पण उके रीस अई अने भितरे नी जाणो चातो थो। इका पे उको पिताजी बायरे आयो अने उके मनाइवा लाग्यो। ^{२९}पण उने अपणा पिताजी के जुवाब द्यो, 'देख, हूं तमारी इतरा बरसहुंण से सेवा करी र्यो अने म्हने कदीज तमारो एक हुकम नी टाब्यो, पण तमने म्हारे कदीज एक बोकड़ी को बचड़ो तक नी द्यो, के हूं अपणा दोसहुंण का गेले खुसी मनउं। ^{३०}पण जदे तमारो यो बेटो आयो जेने तमारो आखो धन बेस्याहुंण माय उडई लाख्यो, तमने उका सरु तय्यार-जाड़्यो बचड़ो कटवाइयो।' ^{३१}अने पिताजी ने उकासे क्यो, 'म्हारा बेटा, तू सदा म्हारा गेले रे, अने जो कंई म्हारो हे, उ सगळो थारोज हे। ^{३२}पण अबे हमारे खुस अने मगन होणो चइये, क्योंके थारो यो भई मरी ग्यो थो, अबे जीवी ग्यो; अने खोवई ग्यो थो, अबे लादी ग्यो हे।

बइमान मुनीम

^{१६} फेर ईसु चेलाहुंण से बी कई र्यो थो, "कईका धणी मनख को एक मुनीम थो। उना मुनीम का बारामें धणी मनख के बताइयो थो के उ थारी सगळी धन-सम्पत्ती उजाड़ी र्यो हे। ^२उने मुनीम के बुलाडी के क्यो, 'या कसी बात हे, जो हूं थारा बारामें सुणी र्यो हूं? अपणा

मुनीम पणा को हिसाब दे, क्योंकि अवे तू मुनीम नी री सकतो।' ^३तो उना मुनीम ने मन माय बिचार्यो, 'म्हारो मालेख तो अवे म्हार से मुनीम पणो छुडई र्यो हे, तो अवे हूं कंई करूं? अने म्हारा माय इतरी ताकत हयनी के खाड़ा खोदी सकूं अने भीक मांगवा माय बी सरम आवे।' ^४तो 'हूं समजी ग्यो के हूं कंई करूंवां जेकासे के जदे मुनीम पणा से हेइयो जउं तो बाद माय लोगहुंण अपणा घरहुंण माय म्हारो आदर-मान राखे।'

^५"तो उने अपणा मालेख का हर देणदार के तेड़ी के अने पेलों से पुछ्यो, 'थार पे म्हारा मालेख को कितरो करजो हे?' ^६उने क्यो, 'सो माणी तेल।' ^७मुनीम ने उकासे क्यो, 'यो ले अपणो बंई-खातो अने बेठिके झट पचास मण लिखी दे।' ^८फेर उने दूसरा से क्यो, 'तू कितरा को करजदार हे?' उने क्यो, 'सो माणी गंड को।' मुनीम ने उकासे क्यो, 'अपणो बंई-खातो ले, अने झट अस्सी लिखी दे।'

^९"तो उका मालेख ने उना अधरमी मुनीम की तारीफ करी क्योंकि उने चालाकी से काम कर्यो। इना जग का मनख अपणा सरीका मनखहुंण से बेवार करवा माय अध्यात्मिक मनखहुंण से घणा चातर्या हे।

^{१०}हूं तमार से कूं के जगत का धन से लोगहुंण की मदद करिके अपणा सरु दोस बणई लो के जदे जगत को धन खतम हुई जाय तो परमेसर अने उका लोगहुंण, तमारो हमेस्या का निवास माय

आव-भगत करेगा। ^{१०}जो घणी रजिक बात माय बिसासी हे, उ नरा माय बी बिसासी हे, अने जो रजिक बात माय अधरमी होय उ नरी बात माय अधरमी रे! ^{११}तो अगर तम जगत का धन माय बिसासी नी र्या तो सरग को सांचो धन तमारे कुंण समळायगा? ^{१२}अगर तम परायो धन काम माय लावा सरु बिसासी नी र्या तो जो तमारो अपणो हे उके तमारे कुंण देगा?

^{१३} "कइंकोज दास दो मालेखहुंण की सेवा-चाकरी नी करी सकतो। उ एक से घिरणा अने दूसरा से परेम राखेगा नितो फेर एक से मिळ्यो रेगा अने दूसरा को काम नी करेगा। तम परमेसर अने धन दोई की सेवा-चाकरी नी करी सकता।"

परमेसर को नेम-बिधान माननो धन से जादा जरूरी

(मती ११.१२-१३; ५.३१-३२; मरकुस १०.११-१२)

^{१४}फरीसिहुंण जो धन का लोभी था, उकी ई सगळी बातहुंण सुणी र्या था अने वी ईसु के ताणा मारी र्या था। ^{१५}उने उणकासे क्यो, "तम असा मनख हो जो लोगहुंण का सामे अपणे खुद के धरमी जताडो हो, पण परमेसर तमारा हिरदा के जाणे हे। उ जो मनखहुंण माय घणो आदर-मान को हे, परमेसर की नगे माय मानको हयनी।

^{१६} "योह्न बपतिसमा देवा वाळा का बखत तक मूसा का नेम-बिधान, अने जूना नबिहुंण को परचार होतो र्यो। इका

^३ १६.६ सो माणी तेल; ३९५ लीटर।

^४ १६.१३: मती ६.२४ ^५ १६.१६: मती ११.१२-१३

बाद परमेश्वर का राज को सुब-समिचार परचार कर्यो अने हर कई को घणी तेजी से इका आड़ी खिंच्यो चलयो अई र्यो हे। ^{१७} पण मूसा का नेम-बिधान की एक टिपकी मिटवा का बजाय सरग अने धरती को टळणो सबगो हे।

^{१८} तो ईसु ने मूसा का नेम-बिधान माय से क्यो, "हर उ मनख जो अपणी घराळी के फारकती दई के दूसरी से ब्याव रचाय, ब्योबिचार करे। अने जो घराळा से छोड़ी हुई से ब्याव रचाय, तो उ बी ब्योबिचार करे हे।

धणी मनख अने लाजर

^{१९}तो ईसु ने एक बारता कई, "एक धणी मनख थो जो हमेस्या बैंगणी लतरा अने मलमल पेर्या करतो थो अने हर दन बड़ा धूमधाम अने सुक-बिलास से रेतो थो ^{२०}वइंज लाजर नामको एक गरीब मनख जेकी काया घावहुंण से भरी हुई थी। लोग उके धणी मनख का बारना पे छोड़ी जाता था, ^{२१}उना धणी मनख की थाळी से जो चूरो बेरातो थो, उणकासे बी पेट भरवा सर तरसतो थो। इका अलावा कुतरा बी अई ने उका घावहुंण चाट्या करता था।

^{२२}"असो होयो के उ गरीब मनख मरी गयो अने सरगदूतहुंण ने अई के उके इबराइम का खोळा माय पौंचई द्यो। उ धणी मनख बी मर्यो अने उके लइ-जई के गाड़ी लाख्यो। ^{२३}जदे नरक माय घणी पीड़ा माय तड़फतो होयो उने नगे उठई

अने दूरा से इबराइम के देख्यो जेका खोळा माय लाजर थो! ^{२४}तो उने हेला पाड़ी के क्यो, 'हे पिता इबराइम, म्हार पे द्या करिके लाजर के मोकली दे के उ अपणी अंगळी को नुक्को पाणी माय भिंजाळी के म्हारी जिबान के ठंडो करी दे, क्योँके हूं इनी लाय माय पड़्यो तड़फी र्यो हूं।'

^{२५}पण इबराइम ने क्यो, 'हे बेटा, रियाद कर के तू अपणा जीवन माय सगळी अच्छी चीजहुंण पई चुक्यो, अने असोज लाजर खराब चीजहुंण; पण अबे उ यां सांती पई र्यो हे अने तू पीड़ा माय तड़फी र्यो हे। ^{२६}इका अलावा हमारा अने थारा अदाइ माय एक उन्डी खंची पड़ी हे के यां से अगर कई को उना पार जाणो बी चावे तो जई नी सके, अने वां से कई को इना पार हमारा कने आणो चावे तो अई नी सके।' ^{२७}तो उने क्यो, 'हे पिता, जदे तो हूं थार से कूँ के तू उके म्हारा पिताजी का घरे मोकली दे, ^{२८}क्योँके म्हारा पांच भई हे के, उ उणके चेतावणी दई दे। कई असो नी होय के वी बी इनी पीड़ा लायक जगा माय आय।'

^{२९}"पण इबराइम बोल्हो, 'उणका कने मूसा अने नबिहुंण की पोथी हे; वी उणकीज सुणे।' ^{३०}पण उने क्यो, 'हे पिता इबराइम, असो नी! अगर मर्या माय से कई को उणका कने चलयो जाय तो वी हिरदो बदळेगा।' ^{३१}पण इबराइम ने उकासे क्यो, 'अगर

^a १६.२३ नरक; या अधोलोक; मर्याहुंण की जगा या मर्या लोगहुंण को लोक।


^f १६.१७: मती ५.१८ ^g १६.१८: मती ५.३२; १ कुरिन्थिहुंण ७.१०-११

वी मूसा अने नबिहुंण की नी सुणे तो वी उकी बी जो मर्या माय से जिन्दो हुई के उणका कने जाय, नी सुणेगा!" "

पाप की मांफी

(मती १८.६-७, २१-२२; मरकुस ९.४२)

फेर ईसु ने अपणा चेलाहुंण से **१७** क्यो, "जिणकासे लोग भटक्या करे वी बातहुंण तो होयगाज। पण धिक्कार उना मनख के, जेकी वजासे वी होय हे! ^२उका सरु यो भलो होतो के उका गळा माय घट्टी को पाटो लटकाइयो जातो अने उ समन्दर माय लाख्यो जातो,



घट्टी (LUK १७.२)

बजाय इका के उ उना नाना माय से कइंका एक के पाप करवा सरु उकसाड़े। ^३ होसियार!


"अगर थारो भई पाप करे तो उके डांट, अने अगर उ मन बदळे तो उके मांफ कर। ^४अगर उ हर दन सात कावा थारा बिरोद माय पाप करे अने साती कावा अई के थार से के, 'हूं पसतावो करूं हूं,' तो उके मांफ करजे।"

बिसास

^५तो परेरितहुंण ने परभु से क्यो, "हमारा बिसास बड़ई दे।"

^६परभु ने क्यो, "अगर तमारा माय रई का दाणा बरोबर बिसास रे तो तम इना सेतूत का झाड़ से केता, 'उखड़ी के समन्दर माय लागी जा,' तो उ तमारी बात मानी लेतो।

दास को काम



खेत में हल चलाणो (LUK १७.७)

^७"तमारा माय से कुंण असो जेको हळी हळ घेरे अने गाडरहुंण के चरातो रे, के जदे हळी खेत से आवे तो उ हळी से केवा लागे, 'भितरे अई के जिमवा बेठिजा'? ^८कई उ उकासे यो नी केगा, 'म्हारा खावा सरु कई बणा अने उजळा लतरा पेर अने जदत्तक हूं खई-पी नी लूं म्हारी सेवा करजे; बाद माय तू बी खई-पी लीजे'? ^९हुकम मानवा सरु कई उ अपणा हळी के धन्यबाद देगा? ^{१०}असीज तरा तम बी जदे उण सगळा हुकम के पाळो जो तमारे द्या गया हे, तो को, 'हम निकम्मा दास हे; हमने

तो सिरप उज कर्यो जो हमारे करनों चड़ये थो।"

परमेसर के धन्यबाद देणो

११ असो होयो के जदे ईसु यरुसलेम आड़ी जई र्यो थो तो सामरिया इलाका अने गलील का अदाइ माय से हुई के हिट्यो। १२ ज्यो ज उ कइंका गांम माय ग्यो तो दूर उब्या दस कोइया उकासे मिळ्या। १३ उणने उंची अवाज से हेला पाड़ी के क्यो, "हे ईसु स्वामी परभु, हमार पे दया करजे!"

१४^a जदे उने उणके देख्या तो क्यो, "जई के अपणे खुद के पुरोहितहुंण के दिखाडो।"^b

अने असो होयो के जाताज जाता वी सुद्ध हुई ग्या। १५ तो उणका माय से एक ने जदे देख्यो के नज हुई ग्यो हूं, तो उंची अवाज से परमेसर की बड़ई करतो होयो पाछो आयो, १६ अने ईसु के धन्यबाद देतो होयो सास्टांग परणाम कर्यो अने पग पे पड़ी ग्यो। उ सामरी जात को थो। १७ जदे ईसु ने क्यो, "कई दस का दसज सुद्ध नी होया था, तो फेर वी नो कंय्यांडी हे? १८ कई इना परदेसी का सिवाय उणका माय से हजु कइंकोज नी र्यो जो पलटी के परमेसर की इसतुती करतो?" १९ तो ईसु ने उकासे क्यो, "उठी के चल्यो जा; क्योके तने

म्हार पे बिसास कर्यो तो थारा बिसास ने थारे नज कर्यो हे।"

ईसु को आवा वाळो राज

(मती २४.२३-२८, ३७-४१)

२० जदे फरीसिहुंण ने ईसु से पुछ्यो, "परमेसर को राज कदे आयगा?" तो उने उणके जुवाब द्यो, "परमेसर को राज परगट रूप माय नी आवे। २१ अने लोग या नी केगा, 'देखो, उ यां हे!' या 'वां हे!' क्योके देखो, हूं तमारा गेले हूं तो परमेसर को राज तमारा अदाइ मायज हे।"^c

२२ उने चेलाहुंण से क्यो, "वी दन आयगा जदे हूं मनख का बेटा का दन माय से एक दन के देखवा की मन्सा करोगा, पण तम म्हारे देखी नी सकोगा। २३ वी तमार से केगा, 'वां देखो!' 'यां देखो!' तम चल्या मती जाजो अने नी उणका पाछे भागजो। २४ क्योके बिजली जसे चळकी के असमान का इकाड़ी से दूसरा आड़ी तक चळके, असोज हूं मनख को बेटो बी अपना दन माय परगटुंवां के, आखो जग म्हारे देखेगा। २५ पण पेलां यो जरूरी हे के हूं घणो दुःख झेलुं अने इनी पीड़ी का लोगहुंण से नकार्यो जउं। २६^d "जसा के जूना नबी नूह^d का दनहुंण माय होयो थो, असोज हूं मनख का बेटा का दनहुंण मायज होयगा। २७^e जदत्तक

^b १७.१४ पुरोहितहुंण के दिखाडो; लेव्य १३.९-४६; पुरोहित जांचतो थो अने घासणा करतो थो के अवे इना मनख माय कोइ को रोग हयनी। समाज माय री सकतो थो। ^c १७.२१ तमारा अदाइ मायज; या तमारा माय; या तमारा माय परगटेगा। ^d १७.२६ नबी नूह; जेका बखत माय आखी धरती के मनख का पाप की वजासे परमेसर ने पाणी से नास करी लाखी थी; सिरप नूह अने उका बेटा-बउ अने जो झाज माय पखेरु अने जनावर बची ग्या था (उत्पत्ती ६.९-८.२२)।


^f १७.१४: लेव्यव्यवस्था १४.१-३२

[†] १७.२६: उत्पत्ती ६.५-८

[†] १७.२७: उत्पत्ती ६.९-७.२४

नूह झाज माय नी चल्थो ग्यो लोगहुंण खाता-पीता अने ब्याव-सादी करता र्या। तो जळ परळय होयो अने सगळा खतम हुई ग्या। २८+ "लूत का दनहुंण माय बी असो होयो थो। वी खाणो-पीणो, लेणो-देणो करता, झाड़-पोदा लगाइता अने घर बणाता था, २९+ पण जदे लूत सदोम से हिट्यो, उना दन असमान से भस्ते अने तेजाब बरस्यो अने वी सगळा खतम हुई ग्या। ३०+जेना दन हूं मनख को बेटो परगटुंवां, उ दन बी नरू असोज रेगा।

३१+ "उना दन जो घर का अदरे रे अने समान निचचे घर माय रे उ उके लेवा सरु नी उतरे; अने असोज उ जो खेत माय रे, पाछो नी पल्टे। ३२+ लूत की घराळी के रियाद करो! ३३+ जो अपणो पराण बचाइवा की कोसिस करेगा, उ हमेस्या का जीवन के खोयगा; अने जो म्हारो चेलो हुई के अपणो पराण खोयगा, उ उके सरग माय पाछो पायगा! ३४+हूं तमार से कूं के उनी राते दो मनख खाट पे सोता रेगा; एक लई ल्यो जायगा अने दूसरो छेकी लाख्यो जायगा। ३५+दो बइरा एकज जगा पे घट्टी पीसती रेगा, एक लई ली जायगा अने दूसरी छेकी लाखी जायगा।" ३६+दो मनख खेत माय रेगा; एक लई ल्यो जायगा अने दूसरो छेक्यो जायगा।"



चील-गरदन (LUK १७.३७)

३७+तो उणने उकासे पुछ्यो, "हे परभु, यो कां होयगा?"

उने उणकासे केवाड़ा माय क्यो, "जां लास पड़ी रेगा वां चील-गरदन बी भेळी होयगा।"

पराथना करो परमेसर जुवाब देगा

ईसु ने उणके यो बताइणे सरु के १८ निरास होया बिना उणके सदा पराथना करनो चइये या मिसाल दई: २"कइंका नगर माय एक न्यावधीस रेतो थो जो नितो परमेसर से डरतो थो अने नी कइंका मनख की परवा करतो थो। ३इनाज नगर माय एक रांडी बइरा रेली थी, जो उका कने घड़ी-घड़ी अई के केती थी के, 'म्हारो न्याव करिके म्हारे बेरी से बचाइ।' ४घणा बखत तक तो उने उकी नी सुणी। पण आखर माय उने बिचार्यो,

८ १७.३२ लूत की घराळी; सदोम माय रेवा वाळा का अदरे जदे तेजाब अने भस्ते बरसी तो या देखवा सरु जसेज लूत की बइरा ने मुन्डो फेर्यो। परमेसर ने उके लूण को खम्बो बणई लाख्यो, जदके परमेसर ने हुकम द्यो थो के पाछे पलटी के मती देखजो (उत्पत्ती १९.२६)। ९ १७.३६ थोडिक यूलानी परतिहुंण माय यो पद (३६) जोड़्यो हे। (देखो मती २४.४०)।

† १७.२८-२९: उत्पत्ती १८.२०-१९.२५

† १७.२९: उत्पत्ती १८.२०-१९.२५

† १७.३१: मती २४.१७-१८; मरकुस १३.१५-१६

† १७.३२: उत्पत्ती १९.२६

† १७.३३: मती १०.३९, १६.२५; मरकुस ८.३५; लूका ९.२४; योहन १२.२५

'जदके हूं परमेसर से नी डरूं अने नी कसाज मनख की परवा करूं, ^५फेर बी इकासरु के या म्हारे तंग करी री हे, हूं इको न्याव करूंवां। कंई असो नी होय के वा घड़ी-घड़ी अई के म्हारी नाक मेंज दम करी लाखे।' "

६अने परभु ने क्यो, "सुणो इना अधरमी न्यावधीस ने कंई बोल्यो। ^७तो कंई परमेसर अपणा छांट्या होया को न्याव नी करेगा जो दन-रात उके हेला पाडे हे? कंई उ उणकी मदद करवा माय देर करेगा? ^८हूं तमार से कूं उणको न्याव झट करेगा! फेर बी हूं मनख को बेटो जदे राजो हुई के अउंवां तो कंई हूं धरती पे पराथना अने बिसास के पउंवां?"

सई तरा की पराथना करनौ

९ईसु ने उना लोगहुंण से जो इनी बात सरु अपणा अदरे भरोसो राखता था के हम धरमी हे, अने जो दूसरा के ओछा समजता था, या मिसाल दई क्यो, ^{१०}"दो जणा मन्दर माय पराथना करवा गया। उणका माय से एक फरीसी जो धरम का नेम-बिधान के सकती से पाळण करवा वाळो थो अने दूसरो कर वसुळवा वाळो।^{११}

११फरीसी उबो हुई के खुद असी पराथना करवा लाग्यो,^{१२} 'हे परमेसर, हूं थारे धन्यबाद दउं के हूं दूसरा लोगहुंण

सरीको ठग, अन्यावी अने ब्योबिचारी हयनी अने हूं इना कर वसुळवा वाळा सरीको बी हयनी। ^{१३}हूं हफता माय दो कावा बरत राखूं अने जो कंई म्हारे मिळे उको दसवों हिस्सो थारे दउं।'

१३"पण कर वसुळवा वाळो थोड़ी दूर पे उबो थो, उ परमेसर आड़ी अपणी नगे उठावा की हिम्मत बी नी करी सक्यो, पण छाती कूटतो होयो बोल्यो, 'हे परमेसर, हूं पापी मनख हूं, म्हार पे दया करजे!' ^{१४} अने ईसु ने क्यो, "हूं थार से कूं के यो मनख धरमी ठेराइयो जई के अपणा घरे ग्यो, नी के उ फरीसी। क्योके हरेक उ जो खुद के मोटो बणावे, नानो कर्यो जावेगा; अने जो खुद के नानो बणावे, मोटो कर्यो जायगा।"

ईसु नाना बाळकहुंण के आसीस दे

(मती १९.१३-१५; मरकुस १०.१३-१६)

१५लोग अपणा बाळकहुंण के बी उका कने लई र्या था के उ उणका पे आसीस सरु हात धरे, पण जदे चेलाहुंण ने देख्यो तो डाटंवा लाग्या! ^{१६}पण ईसु ने बाळकहुंण के कने बुलाड़ी के क्यो, "बाळकहुंण के म्हारा कने आवा दो! उणके मना मती करो, क्योके परमेसर को राज असाज को हे। ^{१७}हूं तमार से सांची कूं के जो कई को परमेसर का राज

^{११} १८.१० कर वसुळवा वाळो; या नाकेदार उना बखत, रोमी सरकार यहूदिहुंण पे राज करी र्या था, अने नाकेदारहुंण रोमी सरकार का सेवक था। यहूदिहुंण नाकेदारहुंण से घिरणा करता था क्योके वी मानता था के कर वसुळणो बुरई को काम हे जेके छोटा अने नीच लोग करे हे। ^{१२} १८.११ उबो हुई के खुद असी पराथना करवा लाग्यो; थोड़ाक मूळ माय असो हे उबो हुई के खुद सरु पराथना करवा लाग्यो।

^{१३} १८.१६ परमेसर को राज असाज को हे; नरम लोगहुंण जो परमेसर पे बिसास राखे वी बाळकहुंण सरीका जो अपणा मां-बाप पे बिसास राखे हे, परमेसर राजो हे जो उणके समाळे हे।

^{१४} १८.१४: मती २३.१२; लूका १४.११

के बाळक सरीको नी माने, उ कदीज उका माय जई नी सकेगा।"

जो धन पे भरोसो करे वी परमेसर का राज माय जई नी सके

(मती १९.१६-३०; मरकुस १०.१७-३१)

१८ फेर कइंका एक यहूदी हाकिम ने उकासे सवाल कर्यो, "हे भला गरु, हमेस्या को अजर-अमर जीवन पावा सरु हूं कंई करूं?"

१९ ईसु ने उकासे क्यो, "तू म्हारे भलो कायसरु के? परमेसर के छोड़ी के हजु कंई को भलो हयनी? २० पण तू परमेसर का हुकमहुंण के तो जाणेज हे, "ब्योबिचार नी करनौं, हत्या नी करनौं, चोरी नी करनौं, झुंटी गवई नी देणो, अपना मां-बाप को मान राखणो।"

२१ उने क्यो, "इणके हूं नानपणा से मानी र्यो हूं।"

२२ जदे ईसु ने यो सुण्यो तो क्यो, "थारा माय अबी एक बात की कमकोती हे; अपणो सगळो धन-सम्पती बेची के गरीब-गुरबाहुंण के बांटी लाख तो थारे सरग माय धन मिळेगा। अने अई के म्हारा पाछे चलयो-चल।" २३ पण यो सगळो सुणी के हाकिम घणो उदास होयो, क्योके उ घणो धणी थो।

२४ ईसु ने उका आडी देखी के क्यो, "धणिहुंण सरु परमेसर का राज माय जाणो कितरो अबगो हे! २५ क्योके ऊंट के सुई का बेज माय से हिटणो, कइंका धणी मनख के परमेसर का राज माय जावा से सबगो हे।"

२६ इका पे सुणवा वाळाहुंण के अचरज होयो उणने क्यो, "तो किको उध्दार हुई सके?"

२७ पण उने क्यो, "जो बातहुंण मनख सरु अबगी, वी परमेसर सरु सबगी हे।"

२८ इका पे पतरस ने क्यो, "देख हम तो अपणो घर-बार छोड़ी के थारा पाछे चली पड़्या।"

२९ उने उणकासे क्यो, "हूं तमार से सांची कूं, असो कंई को हयनी जेने अपणो घर, घराळी, भई-बेनहुंण, मां-बाप या बाळकहुंण के परमेसर का राज सरु छोड़्या हे, ३० उ इना बखत नरा गुणा जादा अने आवा वाळा जुग माय अजर-अमर जीवन पायगा।"

ईसु तीसरी बखत अपनी मोत का बारा माय केवा लाग्यो

(मती २०.१७-१९; मरकुस १०.३२-३४)

३१ तो ईसु ने बारा चेलाहुंण के इकाडी लइ-जई के उणकासे क्यो, "देखो, हम यरुसलेम आडी जई र्या, अने हूं मनख का बेटा का बारामें नबिहुंण का मिसे जो कंई लिख्यो, उ सगळो पूरण होयगा। ३२ क्योके हूं दूसरा गेर यहूदिहुंण का हात माय द्यो जउवां। अने म्हारी मसकरी करेगा, म्हारा गेले बुरो बरताव कर्यो जायगा, म्हार पे थुंक्यो जायगा। ३३ अने कोडा लगावा का बाद वी म्हारे मारी लाखेगा, अने हूं तीसरा दन पाछो जीवतो हुई जउवां।"

३४ पण इणका माय से कइंकीज बात चेलाहुंण की समज माय नी अई। तो

वा बात उणकासे गुप्त री, अने जो बात ईसु ने करी थी वी उके समजी नी सक्या।

आंदो मंगतो देखवा लाग्यो

(मती २०.२९-३४; मरकुस १०.४६-५२)

३५ असो होयो के जदे ईसु यरीहो पोंचवा पे थो तो एक आंदो मंगतो बाट का मेरे बेठ्यो, भीक मांगी र्यो थो। ३६ भीड़ का पगहुंण की चाप सुणी के, उ पुछवा लाग्यो के "यो सगळो कंई हुई र्यो हे?"

३७ उणने उके बताइयो के "ईसु नासरी जई र्यो हे।"

३८ उने हेला पाड़ी के क्यो, "हे ईसु, दाऊद की सन्तान! म्हार पे दया करजे।"

३९ लोगहुंण जो बाट माय ईसु का अगड़े-अगड़े चली र्या था उके डांटी के "चुप रेवा" की कई र्या था। पण उ हजु जोर से हेला पाड़तो र्यो, "दाऊद की सन्तान, म्हार पे दया करजे।"

४० तो ईसु ने रुकी के दूसरा मनखहुंण के क्यो "उके म्हारा कने ल्याव।" जदे ल्याया तो पुछ्यो, ४१ "हूं थारा सरु कंई करूं?"

उने क्यो, 'हे परभु, यो के हूं देखवा लागुं।"

४२ ईसु ने उकासे क्यो, "देखवा लाग। जा थारा बिसास ने जो म्हार पे हे थारे नज कर्यो हे।"

४३ उ उनीज घड़ी देखवा लाग्यो अने परमेसर की बड़ई करतो होयो ईसु का पाछे चली पड़्यो। जदे सगळा मनखहुंण

ने यो देख्यो तो उणने परमेसर की बड़ई करी।

ईसु अने जक्कई

ईसु यरीहो नगर माय से हुई १९ के जई र्यो थो। २ तो देखो वां एक मनख थो जेको नाम जक्कई थो। उ कर लेवा वाळाहुंण को मुख्यो अने धणी मनख थो। ३ उ ईसु के देखवा की कोसिस करी र्यो थो, पण भीड़ की वजासे देखी नी सकतो थो, क्योके उ बावन्यो थो। ४ तो ईसु के देखवा सरु उ अगड़े दोड़ी के गुल्तर का झाड़का पे चड़ी ग्यो, क्योके ईसु उनीज बाट से हुई के जावा वाळो थो। ५ जदे ईसु उनी जगा पे पोंच्यो तो उने अदरे देखी के उकासे क्यो, "जक्कई, झट निच्चे उतर्या, क्योके आज म्हारे थारा घरे रेणो हे।"

६ जक्कई उनीज बखत निच्चे उतर्यो अने खुस हुई के ईसु को सुवागत कर्यो। ७ जदे लोगहुंण ने यो देख्यो तो वी सगळा यो कई के बड़बड़ावा लाग्या: "उ तो एक पापी मनख को पांमणो बणवा ग्यो हे।"

८ तो जक्कई ने घर माय उबो हुई ने परभु से क्यो, "परभु देखतो, हूं अपणी आदी धन-सम्पती गरीब-गुरबाहुंण के दई दूवां, अने अगर म्हने कइका से अन्याव करिके जो कइज ल्यो हे तो उके चोगणों फेरी लाखुंवां।"

९ ईसु ने उका बारामें क्यो, "आज इना घरे उध्दार आयो हे, क्योके

इबराइम सरीको यो बी बिसासी हे।
 १०+ हूं मनख को बेटो खोयाहुंण के
 दुंडवा अने उणको उध्दार करवा आयो
 हे।"

दस मीना की मिसाल

(मती २५.१४-३०)

११जदे लोग इनी बातहुंण के सुणी
 र्या था, तो उ मिसाल दई केवा लाग्यो,
 क्योँके उ यरुसलेम कने थो अने वी
 सौँची र्या था के परमेसर को राज झट
 परगटवा पे हे। १२इकासरु उने क्यो,
 "एक धणी मनख उंचा घराणा को,
 दूर देस ग्यो के अपना सरु राज-पाट
 पई के पाछो आय। १३इकासरु उने
 अपना दसी दासहुंण के तेइया अने
 उणके दस मीना/ द्या अने उणकासे
 क्यो, 'म्हारा आवा तक इणकासे धन्दो
 करजो।' १४पण उका नगर वासी उकासे
 बेर राखता था, तो उका पाछे-पाछे
 अपना खास लोगहुंण के यो केवा सरु
 मोकल्या: 'हम नी चावां के यो मनख
 हमार पे राज करे।'

१५"असो होयो के जदे उ राज पई ने
 पाछो आयो तो उने हुकम द्यो के 'वी
 दास जिणके म्हने धन द्यो थो तेइया
 जावे, जेकासे म्हारे मालम हुई जाय के
 उणने कसो धन्दो कर्यो।' १६पेलां ने
 अई के क्यो, 'हे मालेख, थारा मीना
 ने दस मीना हजु कमाया।' १७उने
 उकासे क्यो, 'हे भला अने बिसासी
 दास, सबास! तू घणी नानी बात माय

बिसासी हिट्यो, तू दस नगरहुंण को
 हाकिम बणिजा।' १८"फेर दूसरा ने
 अई के क्यो, 'हे मालेख, थारा मीना
 ने पांच मीना हजु कमाया।' १९उने
 उकासे क्यो, 'तू पांच नगरहुंण को
 हाकिम बणिजा।'

२०"फेर एक हजु अई के केवा
 लाग्यो, 'हे मालेख, देख थारो मीनो!
 इके म्हने दस्ती माय बान्दी के राख्यो।
 २१क्योँके हूं थार से डरतो थो, इकासरु
 के तू घणो कडक मनख हे, जेके तू
 नी राखे उके तू लई ले, अने जेके तू
 नी बोय उके तू काटे हे।' २२तो राजा
 ने उकासे क्यो, 'हे मतकमेरा दास!
 थाराज सबदहुंण से हूं थारे कसुरवार
 साबित करुंवा। जदे तू जाणतो थो के
 हूं कडक मनख हूं। जेके म्हने नी धर्यो
 उके उठई लूं अने जेके नी बोयो उके
 काटूं। २३तो तने म्हारो धन ब्याजणो
 कायसरु नी दई द्यो, के जदे हूं आतो
 तो उके ब्याज समेत लई लेतो?'

२४"तो उने उणकासे जो कने उब्या
 था क्यो, 'मीनो इका से लई लो अने
 जेका कने दस हे उके दई दो' २५"पण
 उणने उकासे क्यो, 'मालेख, उका कने
 तो पेलांसेज दस हे।' २६+ "तो राजा ने
 क्यो, 'हूं तमार से कूं हरेक जेका कने
 जादा जुम्मेदारी हे, उके जादा दई द्यो
 जायगा, पण जेका कने कई जुम्मेदारी
 हयनी, उकासे वा जुम्मेदारी बी जो उका
 कने हे लई ली जायगा। २७पण म्हारा
 उना बेरिहुंण के जो नी चावे के हूं उणका

/ १९.१३ मीना; १ मीना बराबर सो दन की मजुरी हे।

* १९.१०: मती १८.११ * १९.२६: मती १३.१२; मरकुस ४.२५; लूका ८.१८

पे राज करूं यां ल्याव अने म्हारा सामे मारी लाखो!' "

एक राजा जसो ईसु यरुसलेम माय आयो

(मती २१.१-११; मरकुस ११.१-११; योहन् १२.१२-१९)

२८ इनी बातहुंण के केवा का बाद उ अगड़े-अगड़े यरुसलेम आडी चड़तो ग्यो। २९ असो होयो के जदे उ बेतफगे अने बेतनिर्याह गांम माय उनी इंगरी कने जो जेतून केवाय हे, पोंच्या तो उने चेलाहुंण माय से दोई के यो कई के मोकल्या, ३० "अपणा सामे का गांम माय चल्या जाव। वां जाताज तमारे एक गदडी को बच्चो जेका पे कई को कदी नी बेठ्यो बन्द्यो मिळेगा। उके छोडी के यां ल्याव। ३१ अगर कई को तमार से पुछे 'कायसर छोडी र्या हो?' तो कोजो, 'परभु^k के इकी जरुवत हे।' "

३२ जो चेलाहुंण मोकल्या गया था उणने जई के, जसो उने उणकासे क्यो थो वसोज मिळ्यो। ३३ ज्योज वी गदडी का बच्चा के छोड़वा लाग्या उका मालेख ने क्यो, "तम इके कायसर छोडी र्या हो?"

३४ उणने क्यो, "परभु के इकी जरुवत हे।" ३५ तो वी गदडी का बच्चा के ईसु कने ल्याया, अने चेलाहुंण ने अपणा लतरा गदडी का बच्चा पे लाखी के ईसु के उका पे बेठाइयो। ३६ जदे उ चलवा लाग्यो तो लोगहुंण अपणा लतरा बाट माय बिछाड़वा लाग्या।

३७ अबे जदे उ जेतून इंगरी की कराई माय यरुसलेम कने पोंच्यो तो चेलाहुंण की सगळी भीड़ उना सगळा सामरत का कामहुंण सरु जो उणने देख्या था बड़ी खुसी का साते उंची अवाज से परमेसर की बड़ई करवा लाग्या: ३८ "धन्य हे उ राजो जो परभु परमेसर का नाम से आवे हे! परमेसर अने लोगहुंण का माय सांती अने उंची से उंची जगा पे महेमा होय!"

३९ भीड़ माय उब्या थोड़ाक फरीसिहुंण ने उकासे क्यो, "हे गरु, अपणा चेलाहुंण के डांट!"

४० उने उणके जुवाब द्यो, "हूं तमार से कूं अगर ई छाना रेगा तो भाटाहुंण चिल्लई पड़ेगा।"

ईसु यरुसलेम नगर अने इसराइल देस सरु रोयो

४१ जदे उ यरुसलेम नगर कने पोंच्यो तो यरुसलेम नगरी के देखी के उका सरु रोयो। ४२ अने क्यो, "अगर आज का दन तू हां तूज उनी बातहुंण के जाणतो जो सांती की हे! पण अबे वी थारी आंखहुंण से छिपी गी हे। ४३ क्योँके थार पे वी दन आयगा के थारा बेरी थारा सामे मोरचो बान्देगा अने थारे चारी आडी से घेरी के कुच्ची लाखेगा। ४४ अने बेरिहुंण थारे अने थारा बाळकहुंण के धूळा माय मिळई के बराबर करी लाखेगा, अने थार पे एरण पे एरण बी नी राखेगा, क्योँके उना

^k १९.३१ परभु; या स्वामी या मालेख।

^f १९.३८: भजन संहिता ११८.२६

बखत के जेका माय परमेसर का बेटा ने थार पे किरपा करी तने नी पेचाण्यो।"

मन्दर की सफई

(मती २१.१२-१७; मरकुस ११.१५-

१९; योहन् २.१३-२२)

४५ अने उ मन्दर माय गयो अने बेपारीहुण के यो कई के बायरे हेड़वा लाग्यो: ४६ "धरम सासतर माय लिख्यो हे, 'म्हारो घर पराथना को घर केवायगा,' पण तमने उके डाकूहुण को अड़ो बणई लाख्यो हे।"

४७ उ हरदन मन्दर माय परबचन द्या करतो थो पण मुख-पुरोहित, अने सासतरी अने लोगहुण का परधान उके नास करवा की कोसिस करवा लाग्या था। ४८ पण उणके असो करवा को मोको नी मिळ्यो, क्योंकि सगळा लोग उकी बातहुण के बड़ा ध्यान दई सुणता था।

ईसु का हक पे यहूदिहुण को सवाल

(मती २१.२३-२७; मरकुस ११.२७-३३)

२० असो होयो के एक दन जदे उ मन्दर माय लोगहुण के परबचन दई र्यो थो अने सुब-समिचार परचारी र्यो थो तो मुख-पुरोहितहुण अने सासतरिहुण अने थोडाक सियाणाहुण का गेले अई के उको सामो कर्यो, २ अने उकासे क्यो, "हमारे बताइ के तू यो काम किका हक से करे हे। या उ कुण हे जेने थारे यो हक द्यो?"

३ उने उणके जुवाब द्यो, "हूं बी तमार से एक सवाल पुछूं। तम म्हारे बताइओ, ४ योहन् के बपतिसमो देवा को हक कई सरग आड़ी से मिळ्यो थो के मनख आड़ी से?"

५ तो वी माय-माय केवा लाग्या, "अगर हम कां परमेसर आड़ी से, तो उ केगा, 'तो तमने उका पे बिसास कायसर नी कर्यो?' ६ पण अगर हम कां, 'मनख आड़ी से' तो सगळा मनख भाटा मारी के हमारे मारी लाखेगा, क्योंकि उणके भरोसो हे के योहन् एक नबी थो।" ७ इका पे उणने जुवाब द्यो के "हमारे नी मालम के उके बपतिसमा देवा को हक कंय्यांड़ी से थो।

८ ईसु ने उणकासे क्यो, "हूं बी तमारे नी बतंवां के केका हक से हूं यो काम करूं।"

दाख का बगीचा का बुरा किरसाण

(मती २१.३३-४६; मरकुस १२.१-१२)

९ तो उ लोगहुण के इनी मिसाल माय केवा लाग्यो, "कइंका मनख ने अंगूर को बगीचो लगाडिके उके किरसाणहुण के बांटा पे दई के खुद घणो दूरो जातरा पे चल्यो गयो। १० फसल पादरी आवा का बखत उने किरसाणहुण कने एक दास के मोकल्यो के वी उके बगीचा की फसल माय से कई दे, पण उणने उके मार्यो-कुट्यो रीतो हात भगाड़ी द्यो। ११ इका पे उने दूसरा दास के मोकल्यो, पण उणने उके

1 २०.१० पादरी; फसल पाकणो।

2 १९.४६: यसायाह ५६.७; यरमियाह ७.११

3 १९.४७: लूका २१.३७

4 २०.९: यसायाह ५.१

बी मार्यो-कुट्यो अने माजनो उतारी के रिता हात मोकल्यो। ^{१२}असोज उने तीसरा के मोकल्यो पण उणने उके बी घायल करिके भगाड़ी लाख्यो। ^{१३}तो बगीचा का मालेख ने क्यो, 'हूँ कंई करूँ? हूँ अपणा परमिला बेटा के मोकलुंवां। कंई जाणे वी उको मान राखे!' ^{१४}पण जदे किरसाणहुंण ने उके देख्यो तो माय-माय यो कंई के एको कर्यो, 'यो तो वारिस हे'। आव, हम इके मारी लाखां के जायजाद हमारी हुई जाय।' ^{१५}तो उणने उके अंगूर का बगीचा से हेड़ी ने मारी लाख्यो।

"तो बगीचा को मालेख उणका साते कंई करेगा? ^{१६}उ अई के उना किरसाणहुंण के सजा दई के नास करेगा अने अंगूर को बगीचो दूसरा लोगहुंण के दई देगा!"

यो सुणी के उणने क्यो, "असो कदी नी होय।"

^{१७} पण ईसु ने उणका आड़ी देखी के क्यो, "तो सासतर माय यो कंई लिख्यो के,

'जेना एरण के राज कारीगरहुंण ने खारिज करी द्यो थो

उज कोणा को एरण बणी ग्यो।'

^{१८}हरेक जो उकासे भाती पड़े चूरो-चूरो हुई जायगा पण जेका पे उ पड़ेगा उके धूला सरीको पीसी लाखेगा।"

यहूदिहुंण ईसु के कर का बारामें फंसावा की कोसिस माय

(मती २२.१५-२२; मरकुस १२.१३-१७)

^{१९}उनीज घड़ी सासतरहुंण अने मुख-पुरोहितहुंण ने उके पकड़वा की कोसिस करी, क्योके वी जाणी ग्या था के "उने या मिसाल हमाराज बारामें कंई हे!" पण वी लोगहुंण से डरी ग्या। ^{२०}वी ईसु की थाग माय र्या, अने असा भेदुहुंण मोकल्या जो धरमी होवा को ढोंग करिके उकीज कइंकी बात से उके पकड़ी के उके राजपाल का हाते अने रोमी हाकिमहुंण का हक माय दई दे। ^{२१}तो भेदुहुंण ने या कंई के उकासे सवाल कर्या, "हे गरु, हम जाणां के तू ठीक बोले हे अने सई-सई सीखाडे बी हे, अने तू कइंका की बी पीछ नी ले पण परमेसर को मारग सच्यई से सीखावे। ^{२२}तो हमारे बताड़, "रोमी राजा केसर, के कर चुकाणो ठीक हे के नी?"

^{२३}पण उने उणकी चालाकी^m के जाणी के उणका से क्यो, ^{२४}"म्हारे एक रोमी कलदार सिक्कोⁿ दिखाड़ो।" तो ईसु ने पुछ्यो, "इका पे छाप अने लिख्यो केको हे?"

उणने क्यो "केसर राजा को।"

^{२५}उने उणकासे क्यो, "तो जो केसर को हे, उ केसर के दो; अने जो परमेसर को हे, उ परमेसर के दो।"

^m २०.२३ उने उणकी चालाकी; उणको बिचार थो के, अगर ईसु केतो के केसर के कर देणो ठीक हे तो यहूदिहुंण ईसु का बिरोदी हुई जाता, अने नी सुणता अने उका पाछे नी चलता। अगर उ केतो के केसर के कर देणो ठीक नी हे तो रोमी सिपई ईसु के पकड़ी लेता अने जेळ माय लाखी देता।

ⁿ २०.२४ कलदार सिक्को; करीब एक दन की मजुरी। ई लोगहुंण तो दिखावटी धारमिक था, पण सांचा धारमिक यहूदिहुंण तो रोमी सिक्का के हात बी नी लगाइता था।

^f २०.१७: भजन संहिता ११८.२२

२६तो वी लोगहुंण का सामे उके कइंकी बात माय नी पकड़ी सक्या, पण उका जुवाब सुणी के अचम्बो करिके छाना रई गया।

सवाल मोत का बाद जीवन को

(मती २२.२३-३३; मरकुस १२.१८-२७)

२७+ फेर थोडाक सदुकी जिणको केणो हे के, जी उठणो हेज नी ईसु कने आया। २८+ उणने उकासे सवाल कर्यो, "हे गरु, मूसा ने सासतर माय लिख्यो हे, 'अगर कई को मनख जेकी घराळी रे, अने उ बे-ओलाद मरी जाय, तो उको भई उकी बइरा से ब्याव करिके अपना भई सरु ओलाद पेदा करे।' २९अने असो होयो के सात भई था। पेलां भई ने ब्याव कर्यो पण उ बे-ओलाद मरी गयो। ३०अने दूसरा ने बी, उनी बइरा से ब्याव कर्यो, ३१अने तीसरा ने बी उनी बइरा के अपनी घराळी बणई, पण बे-ओलाद मरी गयो। असतरा सातीज बे-ओलाद मरी गया। ३२आखर माय वा बइरा बी मरी गी ३३इकासरु जदे जी उठणो होयगा तो वा केकी घराळी रेगा जदके सातीज ने उके अपनी-अपनी घराळी बणई ली थी?"

३४ईसु ने उणकासे क्यो, "इना जुग का लोगहुंण ब्याव-सादी करे अने करवावे हे, ३५पण वी जो उना जुग माय जावे अने मर्या माय से जी उठवा का लायक होय, वी नी तो

ब्याव-सादी करेगा अने नी करायगा। ३६नी तो वी फेर कदी मरेगा, क्योके वी धरमी जिणके परमेसर ने मोत से जीवाड़ी के सरगदूतहुंण सरीका बणाया, परमेसर की ओलाद रेगा। ३७+ पण मर्या होया तो जिवाइया जावे हे। इनी बात के मूसा बी बळती हुई झांडी का बखाण माय परगटे हे: यां उ 'परभु के इबराइम को परमेसर, इसाक को परमेसर अने याकूब को परमेसर' के हे। ३८उ मर्या होया को नी पण जीवताहुंण को परमेसर हे। क्योके सगळा उका लोग उका सरु जीवता रे हे।"

३९थोडाक सासतरिहुंण ने जुवाब द्यो, "हे गरु, तने ठीक क्यो।" ४०इका बाद कइंका के ईसु के बात माय फंसावा की हिम्मत नी हुई।

दाऊद का बेटा का बारामें सवाल

(मती २२.४१-४६; मरकुस १२.३५-३७)

४१तो ईसु ने उणकासे क्यो, "या कसी बात हे के वी के हे, के मसीह तो दाऊद को बेटो हे?" ४२+ क्योके राजा दाऊद खुद भजन संहिता की पोथी माय के हे,

'परभु परमेसर ने म्हारा परभु से क्यो;

म्हारा सुदा हाताड़ी बेट।

४३ + जदत्तक के हूं थारा बेरिहुंण के थारा पगहुंण की चोकी नी बणई दूं।'

* २०.२७: परेरितहुंण २३.८

* २०.२८: नेम-बिधान २५.५

* २०.३७: निरगमन ३.६

* २०.४२-४३: भजन संहिता ११०.१

* २०.४३: भजन संहिता ११०.१

४४ असतरा दाऊद तो मसीह के 'म्हारा परभू' के हे। तो मसीह उको बेटो कसे हुई सके?"

धोका देवा वाळा यहूदी धारमिक नेताहुंण के ईसु की चेतावणी

(मती २३.१-३६; मरकुस १२.३८-४०)

४५ जदे सगळा मनख सुणी र्या था तो उने चेलाहुंण से क्यो, ४६ "सासतरिहुंण से सावधान रो, जिणके लम्बा-लम्बा चोगा पेरिके अई-वई फरनो, हाट-बजारहुंण माय मान का गेले-गेल परणाम पाणो, पराथनाघरहुंण माय खास जगा पे बेठणो अने जिमवा का बखत आदर-मान की जगा पाणो अच्छो लागे। ४७ अने वी जो रांडी बइराहुंण का घरहुंण धोका से हड़पी जाय अने खुद के धरमी दिखाइवा सरु बड़ी-बड़ी पराथनाहुंण करे। उणके नरी सजा मिळेगा।"

रांडी बइरा की दो छदाम

(मर १२.४१-४४)

२१ ईसु ने नगे अदरे उठाड़ी ने देख्यो के धणी लोग अपणी अपणी भेंट मन्दर का खजाना माय लाखी र्या था। २ उने एक गरीब रांडी बइरा के बी तांबा की दो नानी-नानी छदाम लाखता देख्या। ३ तो उने क्यो, "हूं तमार से खास बात कूं के इनी गरीब रांडी बइरा ने सगळा से बड़ी के भेंट मन्दर का खजाना माय लाखी हे। ४ क्योके उण सगळा ने अपणी अपणी बचत माय से भेंट करी, पण इने अपणी घटी माय से अपणा जीवन

को जो सगळो कई थो, सगळो लाखी द्यो।"

ईसु ने क्यो इना जुग माय यो मन्दर खतम हुई जायगा

(मती २४.१-२; मरकुस १३.१-२)

५ जदे थोड़ा मनख मन्दर का बारामें बात करी र्या था के उ सुन्दर एरणहुंण अने 'मानता' की भेंटहुंण से कसे बणायो हे, तो उने क्यो, ६ "इनी चीजहुंण का बारामें जिणके तम देखी र्या हो, असा दन आयगा, जदके एक एरण का अदरे दूसरो एरण, बी नी रेगा, जो ढब्ढायो नी जायगा।"

अबदा अने सताव

(मती २४.३-१४; मरकुस १३.३-१३)

७ तो उणने या कई के उकासे सवाल क्यो: "हे गरु, ई बातहुंण कदे होयगा? अने जदे ई बातहुंण जो होवा वाळी हे, तो इकी सेलाणी कई रेगा?"

८ उने क्यो, "होसियार रो, के तम भरमाया नी जाव, क्योके नरा लोग म्हारा नाम से अई के केगा, 'हूं मसीहज हूं,' अने 'जुग का अंत को बखत कने अई पौंच्यो हे!' पण तम उणका पाछे चल्या मती जावजो। ९ जदे तम लड़इहुंण अने बलवाहुंण का बारामें सुणो तो डरजो मती, इनी बातहुंण के पैलां होणो जरूरी हे पण उना बखत एक दम से अंत नी होयगा।"

१० तो उ उणकासे केवा लाग्यो, "जात का बिरोद माय जात अने राज का बिरोद माय राज उठेगा। ११ जगा-जगा

धरती को कांपणो होयगा, म्हामरी अने बिखो पड़ेगा। असमान माय भयानक घटनाहुंण अने मोटी-मोटी सेलाणी नगे आयगा। ^{१२}"पण इण सगळी बातहुंण का होवा से पेलां म्हारा नाम की वजासे लोग तमारे पकड़ेगा, तमारे सताड़ेगा, यहूदी पराथनाघरहुंण माय ल्या जायगा अने जेळखाना माय लाखेगा अने राजाहुंण अने हाकिमहुंण कने ल्या जायगा। ^{१३}इका से तमारे गवई देवा को मोको मिळेगा। ^{१४}तो अपना मन माय खुद के बचाणे सरु पेलां से तय्यारी मती करजो। ^{१५}क्योंके हूं तमारे असी बोली अने असो ज्ञान दूवां के दुसमनहुंण माय से कइंकोज तमारो नी तो सामो अने नीज खण्डण करी सकेगा। ^{१६}पण तमारा मां-बाप, भई-बन्द अने दोसज धोको दर्ई के तमारे पकड़वायगा अने तमारा माय से कितरा के मरवई लाखेगा। ^{१७}म्हारा नाम की वजासे सगळा तमार से घिरणा करेगा। ^{१८}पण तमारा माथा को एक बाल बी बांको नी होयगा क्योंकि तम म्हारा गेले हमेस्या तक रोगा। ^{१९}अपणी सबुरी से तम अपना पराण के बचाडोगा।

दूसरा देसहुंण से यरुसलेम को नास

(मती २४.१५-२१; मरकुस १३.१४-१९)

^{२०}"पण जदे तम यरुसलेम के सेनाहुंण से घिर्यो होयो देखो, तो जाणी जावजो के उको उजाड़ कने हे। ^{२१}तो वी जो

यहूदा नगर माय हे, बळ्डीहुंण पे भागी जावे: जो यरुसलेम नगर माय रे, वी बायरे हिटी जाय: अने वी जो गांम माय होवे नगर आडी नी पलटे, ^{२२}क्योंके ई बादळा लेवा का असा दन रेगा, के वी सगळी बातहुंण जो लिखी पूरण हुई जायगा। ^{२३}उना दनहुंण माय जो भारीपग से, अने दूद धवाइती रे, उणका सरु हाय! क्योंकि देस माय बड़ो कळेस रेगा, अने इनी जात पे संकट रेगा। ^{२४}दुसमन का सिपईहुंण यहूदिहुंण के तरवार से काटी लाखेगा, अने जो बच्या रेगा उना सगळा के दूसरा देसहुंण माय बन्दी बणई के मोकलेगा। जदतक गेर यहूदिहुंण को बखत जो परमेसर ने द्यो पूरण नी हुई जाय तदतक यरुसलेम गेर यहूदिहुंण का पग निच्चे कुच्यो जायगा।

हूं मनख का बेटो जदे पाछो अउं, उकी सेलाणी

(मती २४.२९-३१; मरकुस १३.२४-२७)

^{२५}"सूरज चन्दरमा अने ताराहुंण माय सेलाणी नगे आयगा, अने धरती पे की सगळी जातहुंण माय संकट रेगा। अने समन्दर की गरजन अने लेरहुंण का बेदा से उणका माय घबराट रेगा। ^{२६}डर अने जगत पे घटवा वाळी बातहुंण की बाट जोता-जोता मनखहुंण का हात-पग ढीळा पड़ी जायगा, क्योंकि असमान की ताकतहुंण हलाडी जायगा। ^{२७}जदे लोगहुंण हूं मनख का बेटा के सामरत का गेले बादळाहुंण पे घणी म्हेमा का

* २१.१४-१५: लूका १२.११-१२ * २१.२२: होसे ९.७

* २१.२५: यसायाह १३.१०; यहजेकेल ३२.७; योएल २.३१; दरसन ६.१२-१३

* २१.२७: दानियल ७.१३; दरसन १.७

गेले आता होया देखेगा। ^{२८}पण जदे ई घटणाहुंण घटवा लागे तो सुदो हुई के अपणो माथो अदरे उठाजो, क्योँके तमारो उध्दार कनेज हे।"

अंजीर का झाड़ से सीख

(मती २४.३२-३५; मरकुस १३.२८-३१)

^{२९}तो उने उणके मिसाल दर्ई क्यो, "अंजीर का झाड़ अने दूसरा सगळा झाड़का के देखो। ^{३०}ज्योँज उणका माय कौपळाहुंण फुटे तो तम देखी के खुद जाणी जाव हो के अबे उनाळो कने अई ग्यो। ^{३१}असतरा तम बी, जदे यो सगळो होतो देखो, तो जाणी लीजो के परमेसर को राज कने हे।

^{३२}"हूं तमार से खास बात कूं के जदत्तक सगळी बातहुंण घटी नी जाय, इनी पीड़ी को अंत नी होयगा। ^{३३}असमान अने धरती टळी जायगा, पण म्हारो बचन कदी नी टळेगा।

होसियार रेवा की जरूत

^{३४}"होसियार रो। कई असो नी होय के तमारो हिरदो दूराचारी, दारुइयो अने जीवन की चिन्ताहुंण का बजन से दबी जावे अने म्हारा आवा को दन एकदम से तमार पे फरफुंदा की तरा अई जाय। ^{३५}क्योँके आखी धरती पे रेवा वाळा सगळा मनखहुंण पे असतरा अई जायगा। ^{३६}पण तम हर बखत होसियार हुई के पराथना माय लाग्या रो जेकासे के इनी सगळी बातहुंण से बची-हिटो

अने हूं मनख का बेटा का सामे बिसास का साते उबा होवा सरु तमारो माय सामरत रे।"

^{३७} हरदन तो उ मन्दर माय जई के परबचन देतो थो, पण सांज का बखत यरुसलेम से बायरे हिटी के आखी रात उना बळ्ढा पे जो जेतून केवाय, बिताइतो थो। ^{३८}सगळा लोग सवेरे झट उठी के उका कने मन्दर माय उकी सुणवा सरु अई जाता था।

ईसु के पकड़वाणे सरु कुचक्कर

(मती २६.१-५; मरकुस १४.१-)

२; योहान ११.४५-५३)

^{२२} अने बिना खमीरा रोटा को तेवार, जो फसह^० केवाय, अई र्यो थो। ^२अने मुख-पुरोहित अने सासतरिहुंण इनी फिराक माय लाग्या होया था, के ईसु के कसे छाने से मारी लाखां, क्योँके वी लोगहुंण से डरता था।

यहूदा इस्कुरियोती ईसु के पकड़वाणे सरु तय्यार

(मती २६.१४-१६; मरकुस १४.१०-११)

^३तो सेतान उना यहूदा माय भरायो जो इस्कुरियोती केवातो थो अने जो बारा चेला माय को एक थो। ^४उने जई के मुख-पुरोहितहुंण अने हाकिमहुंण का गेले बात-चित करी के ईसु के कसतरे उणका हात माय पकड़वई दे। ^५इका पे वी घणा खुस होया अने

^० २२.१ फसह; सबद् भण्डार माय देखो।

[†] २१.३७: लूका १९.४७ [†] २२.१: निरगमन १२.१-२७

रुप्या देवा सरु राजी हुई गया। ६ यहूदा इस्करियोती ने या बात मानी ली अने उ एक खास मोका की फिराक माय रेवा लाग्यो के भीड़ से छेटी ईसु के धोका से पकड़वई लाखे!

ईसु के फसह का भोज खावा सरु तय्यारी करनौं

(मती २६.१७-२५; मरकुस १४.१२-

२१; योहन् १३.२१-३०)

७ तो बिना खमीरा रोटो का तेवार को पेलो दन आयो। जेना दन फसह को मेमणो बली करनौं पड़तो थो। ८ ईसु ने पतरस अने योहन के यो कई के मोकल्या, "जई के हमारा सरु फसह को भोज तय्यार करो के हम उके खावां।"

९ तो उणने उकासे पुछ्यो, "तू कां चावे के हम उके तय्यार करां?"

१० उने उणकासे क्यो, "नगर माय जाताज, तमारे एक मनख मिळेगा, जो पाणी को चकल्यो ल्यो होयो रेगा। तम बी उका पाछे पाछे उना घर माय चल्या जावजो जेका माय उ जाय। ११ तम उना घर मालेख से किजो, 'गरु थार से के हे, के पांमणा रुकाइवा की जगा कां हे जां हूं अपणा चेलाहुंण का गेले फसह को भोज खउं?' १२ तो उ तमारे सजी-सजई बड़ी अटारी दिखाड़ेगा। वइंज तय्यारी करजो।"

१३ उणने जई के सगळो कंई वेसोज देख्यो जसो उने बताइयो थो अने उणने वां फसह तय्यार कर्यो।

परभु भोज

(मती २६.२६-३०; मरकुस १४.२२-

२६; १ कुरिन्थिहुंण ११.२३-२५)

१४ जदे बखत होयो तो ईसु जिमवा बेठ्यो अने परेरितहुंण बी उका गेले बेठ्या। १५ उने उणकासे क्यो, "म्हारी घणी मन्सा थी के हूं दुःख भोगवा से पेलां तमारा गेले फसह खउं। १६ क्यौंके हूं तमार से कूं के जदत्तक यो परमेसर का राज माय पूरण नी हुई जाय, हूं इके पाछो कदी नी खउंवां।"

१७ प्यालो लई के जदे उने धन्यबाद दई के क्यो, "इके लई लो अने माय-माय बांटी लो। १८ क्यौंके हूं तमार से कूं के जदत्तक परमेसर को राज नी अई जाय हूं दाखरस^p कदी नी पिउंवां।"



चेलाहुंण का गेले आखरी परभु-भोज (LUK २२.१८)

१९ फेर रोटो लई के अने धन्यबाद दई के तोइयो अने चेलाहुंण के देता होयो क्यो: "या म्हारी काया हे जो तमारा

सरु दई जाय: म्हारी रियाद माय असोज करजो।" २०+ जदे वी खई चुक्या तो वेसोज उने प्यालो लई के क्यो, "यो प्यालो जो तमारा सरु रेइयो, म्हारा लोई माय एक नवो करार हे।"

२१+ "पण देखो, जो म्हारे धोको दई के पकड़वाणे वाळो हे उको हात म्हारा साते मैज पे हे। २२+ क्योके हूं मनख को बेटो तो मार्यो जठंवां जसो के म्हारा सरु ठेराइयो हे, पण उना मनख पे धिक्कार हे के उ म्हारे धोको दई के पकड़वाय हे।"

२३+ तो वी माय-माय पुछवा लाग्या के "हमारा माय से कुंण यो काम करेगा?"

मोटो कुंण

२४+ उणका माय एक यो बिवाद उठ्यो के हमारा माय से मोटो कुंण समज्यो जाय। २५+ ईसु ने उणकासे क्यो, "गेर यहूदिहुंण का राजा उणका पे राज करे अने जिणको उणका पे हक रे, वी 'लोगहुंण की मदद करवा वाळा' केवाय हे। २६+ पण तमारा माय असो नी होय। उ जो तमारा माय सगळा से मोटो हे उ सगळा से नानो बणे। अने जो मुख्यो हे उ सेवक सरीको बणे। २७+ क्योके मोटो कुंण, जो जिमवा बेठ्यो, या उ जो सीदो

परोसे हे? कंई उ नी जो जिमवा बेठ्यो? पण हूं तमारा बीच माय परोसवा वाळा सरीको हूं।

२८+ तम वी हो जो म्हारी अजमाइसहुंण माय म्हारा गेले र्या। २९+ जसे म्हारा पिता ने म्हारे एक राज द्यो, वेसोज हूं बी तमारे दठं हूं, ३०+ के तम म्हारा राज माय म्हारा गेले खाव-प्यो अने न्याव-आसण पे बेठिके इसराइल का बारा गोटहुंण को न्याव करो।

पतरस को नटणो

(मती २६.३१-३५; मरकुस १४.२७-

३१; योहान १३.३६-३८)

३१+ "सिमोन, हे सिमोन, देख! सेतान ने तम लोगहुंण के गंड सरीको उफणवा सरु हक मांगी ल्यो हे, ३२+ पण म्हने थारा सरु पराथना करी हे के थारो बिसास डगी नी जाय। अने जदे तू म्हार पे पक्को बिसास करिके पाछो पल्टे तो अपणा भई-बेनहुंण को बिसास मजबूत करजे।"

३३+ पण पतरस ने उकासे क्यो, "परभुजी, हूं थारा गेले जेळ जावा अने मरवा सरु बी तय्यार हूं।"

३४+ फेर उने क्यो, "पतरस, हूं थार से कूं के जदतक तू इनी बात से के म्हारे

१ २२.२० थोडाक हात का लिख्या होया लेखहुंण माय ईसु का बचन १९ आयत माय या म्हारी काया हे के बाद नी आयो हे, अने २० आयत बी नी हे। २ २२.३१ उफणवा; जदे गंड पाकी जाय तो काटिके भेळा करे अने फेर उणके कुटे या दामण दई के तेज बायरा माय उफणे ताके गंड निच्चे पड़े अने सुक्तो बायरा का गेले उडी जाय।

* २२.२०: यरमियाह ३१.३१-३४ * २२.२१: भजन संहिता ४१.९

* २२.२४: मती १८.१; मरकुस ९.३४; लूका ९.४६

* २२.२५-२६: मती २०.२५-२७; मरकुस १०.४२-४४ * २२.२६: मती २३.११; मरकुस ९.३५

* २२.२७: योहान १३.१२-१५ * २२.३०: मती १९.२८

नी जाणे, आज तीन कावा तू नटी नी जाय, मुरगो बांग नी देगा।"

बटवो, झोळो अने तरवार

३५† उने उकासे क्यो, "जदे म्हने तमारे बटवा बिना, झोळा बिना अने चप्पलहुंण बिना मोकल्या था तो कंई तमारे कसी चीज की कमती पडी थी?"

उणने क्यो, "नी, कसी चीज की नी।"

३६उने उणकासे क्यो, "पण अबे जेका कने बटवो होय, गेले लई के जाय। असतरा झोळो बी लई जाय, अने जिणका कने तरवार हयनी, अपणा लतरा बेची के एक मोल लई ले। ३७† क्योँके हूं तमारे बतंत के या बात जो सासतर माय लिखी गी, वा म्हारा से हर हाल माय पूरण होयगा, याने 'उ मुलजिमहुंण का गेले गिण्यो ग्यो, 'क्योँके जो बातहुंण म्हारा बारामें करी गी पूरण होवा पे हे।"

३८उणने क्यो, "परभुजी, देखतो, यां दो तरवार हे।"

उने उणकासे क्यो, "बस, बस!"‡

ईसु जेतून परबत पे जई पराथना करे

(मती २६.३६-४६; मरकुस १४.३२-४२)

३९तो ईसु नगर से बायरे हिटी के अपणी रीति मुजब जेतून का बळडा आडी नगर का बायरे चल्थो, अने चेलाहुंण बी उका पाछे चली पड़्या।

४०जदे उ वां पौच्यो तो उने क्यो, "पराथना करो के तम अजमाइस माय नी पड़ो।"

४१उ उणकासे करीब ढेला फेंके इतरी छेटी ग्यो अने गोड़ा टेकी के पराथना करवा लाग्यो ४२"हे परमेसर पिताजी, अगर तू चावे तो इना कटोरा के म्हारा कने से सरकई दे; फेर बी म्हारी नी पण थारी मरजी पूरण होय।" ४३तो सरग से एक दूत उके नगे आयो जो उके सामरत देतो थो। ४४ईसु बेचेन हुई के पराथना करी र्यो थो, अने उको पसीनो लोई का टपका सरीको जमीन पे पडी र्यो थो।†

४५जदे उ पराथना करिके उठ्यो अने चेलाहुंण कने आयो तो उने देख्यो के वी दुःखी हुई के सोइर्यो र्या था। ४६उने उणकासे क्यो, "तम कायसरु सोइर्यो र्या हो? उठ्याव, पराथना करो के तम अजमाइस माय नी पड़ो।"

ईसु के यहूदी नेताहुंण अने मन्दर का नेपादारहुंण ने पकड़्यो

(मती २६.४७-५६; मरकुस १४.४३-

५०; योहान १८.३-११)

४७जदे ईसु बात करीज र्यो थो, तो देखो, एक भीड़ अइगी अने बारानुंण माय से एक चेलो जो यहूदा केवातो थो, उणका अगड़े अगड़े चल्थो अई र्यो थो। उ ईसु कने आयो के उको चुम्मो ले।

† २२.३८ बस, बस; ईसु की बात से चेलाहुंण डरी गया था, चेलाहुंण नी चाता था के तरवार के काम माय ले। वी नी समजी सक्था के उ असी भासा माय असा बखत माय जदके बखत कठण हे कायसरु बात करे हे (आयत ३६)। ईसु नी चातो थो के वी तरवार के काम माय ले जदे उ गिरपतार होयो थो (आयत ४९-५१)। ‡ २२.४४ थोडाक हात का लेखहुंण माय ४३-४४ आयतहुंण नी मिळे हे।

† २२.३५: मती १०.९-१०; मरकुस ६.८-९; लूका ९.३, १०.४ ‡ २२.३७: यसायाह ५३.१२

४८ पण ईसु ने उकासे क्यो, "यहूदा कई तू हूं मनख का बेटा के चुमी के धोको दर्ई के पकड़वाय हे?"

४९ जो उका ऐरे-मेरे उब्या था जदे उणने देख्यो के कई होणे जई र्यो हे। तो क्यो, "परभु जी, कई हम तरवार चलावां?" ५० उणका माय से कईका ने म्हापुरोहित का सेवक पे तरवार चलाडी के उको सुदो कान काटी लाख्यो।

५१ पण ईसु ने क्यो, "थमो, असो मती करो!" उने उको कान हात लगाडी के पाछो नज करी लाख्यो।

५२ ईसु ने मुख-पुरोहितहुंण अने मन्दर का हाकिमहुंण अने सियाणाहुंण से जो उके पकड़वा आया था क्यो, "कई तरवार अने लट्ठ लई ने म्हारे पकड़वा आया हो? जसोके हूं कई को डकेत हूं? ५३ जदे हूं हरदन मन्दर माय तमारा गेले र्यो तो तमने म्हार पे हात नी लाख्यो! पण यो बखत अने इन्दारा को हक तमारो हे।"

पतरस को नटणो के हूं ईसु के नी जाणूं

(मती २६.५७-५८, ६९-७५; मरकुस १४.५३-

५४, ६६-७२; योहन् १८.१२-१८, २५-२७)

५४ फेर वी उके बन्दी बणई के म्हापुरोहित का घरे लई चल्या। पतरस थोडोक छेटी से हुई के पाछे-पाछे चली र्यो थो। ५५ जदे वी आंगणा माय ताप लगाडी के बेठी चुक्या तो पतरस बी उणका गेले बेठी ग्यो थो। ५६ तो एक दासी ने ताप का उजाळा माय उके बेठयो देखी के उका आडी ध्यान से देखता होय क्यो, "यो बी तो उका गेलेज थो।"



पतरस को नकार्यो जाणों (LUK २२.५८)

५७ पण उने यो कई के इका से नटी ग्यो: "ऐे बई, हूं उके नी जाणूं।"

५८ थोडिक देर बाद कईका दूसरा ने उके देख्यो अने क्यो, "तू बी उणका माय से एक हे।"

पण पतरस ने क्यो, "अरे नी भई, हूं हयनी!"

५९ करीब एक घंटो बितवा का बाद एक हजु मनख जोर दर्ई के केवा लाग्यो, "पक्कोज यो मनख बी उका गेले थो, क्योके यो बी गलील को हे।"

६० पण पतरस ने क्यो, "अरे भई, हूं नी जाणूं तू कई के।"

जदे उ बात करीज र्यो थो झट मुरगा ने बांग लगाडी दी। ६१ तो परभु ने मुडी के पतरस के देख्यो अने पतरस के परभु की बात रियाद अई गी, के उने यो क्यो थो: "आज मुरगो बांग दे उका

पेलां तू तीन बखत नटेगा के हूं नी जाणूं।" ६२अने उ बायरे जई के फुटी-फुटी के रोयो।

नेपादारहुंण ने ईसु का गेले मसकरी करी अने मार्यो

(मती २६.६७-६८; मरकुस १४.६५)

६३वी सिपईहुंण जो ईसु के पकड़या होया था, उकी मसकरी करिके कुटी र्या था। ६४उणने उकी आंख ढांकी अने यो कई के उकासे पुछवा लाग्या, "भविसबाणी कर! केने थारे मार्यो?" ६५वी उकी निंदा करिके उका बिरोद माय हजु नरी बातहुंण करी र्या था।

म्हासबा माय ईसु की पेसी

(मती २६.५९-६६; मरकुस १४.५५-

६४; योहन् १८.१९-२४)

६६जदे दन उग्यो तो लोगहुंण का सियाणाहुंण की म्हासबा[॥] बुलाड़ी, जेका माय मुख-पुरोहित अने सासतरी बी था। अने सिपईहुंण ईसु के म्हासबा माय या केता होया लई गया: ६७"अगर तू मसीह हे तो हमारे बताड़।"

पण उने उणकासे क्यो, "अगर हूं कुंवां फेर बी तम बिसास नी करोगा, ६८अने अगर हूं सवाल पुछूं तो तम जुवाब नी दोगा। ६९पण अबे से हूं मनख को बेटो, सरवसक्तिमान परमेसर की सगळी सामरत का सुदा हाताड़ी बेठाइयो जंठवां।"

७०तो सगळा ने पुछ्यो, "तो तू कई परमेसर को बेटो हे?"

"उने क्यो, 'हां हूं'।"

७१उणने क्यो, "अबे हमारे अगड़े गवई की कई जरूवत? क्योके हमने खुदी उका मुन्डा से सुणी ल्यो।"

पिलातुस राजपाल का सामे ईसु

(मती २७.१-२, ११-१४; मरकुस १५.१-

५; योहन् १८.२८-३८)

२३ तो आखी म्हासबा उठी के ईसु के पिलातुस राजपाल कने लई गी। २वी यो कई के उका पे आरोप लगाइवा लाग्या: "हमने इना मनख के देसवासिहुंण के भड़कातो अने रोम का राजा केसर के तोजी देवा सरु मना करतो अने यो केतो सुण्यो के हूं खुद मसीह, याने राजो हूं।"

३पिलातुस ने उकासे पुछ्यो, "कई तू यहूदिहुंण को राजो हे?"

उने उके जुवाब द्यो, "ठीक, तू खुदज कई र्यो हे।"

४पिलातुस ने मुख-पुरोहितहुंण अने भीड़ से क्यो, "हूं इना मनख माय कई को कसूर नी पठा।"

५पण वी या कई के दबाव लाखता र्या के, "उ गलील से लई के तो आखा यहूदिया माय सीख दइ-दई के लोगहुंण के भड़कावे हे, यां तक के इनी जगा माय बी।"

हेरोदेस का सामे ईसु

६जदे पिलातुस ने यो सुण्यो तो पुछ्यो, "कई यो मनख गलील को हे?" ७जदे

[॥] २२.६६ म्हासबा; यहूदी परजा का सियाणाहुंण की सबा, इबराणी भासा माय जेके सनहेन्द्रयोन के हे।

उने जाण्यो के उ हेरोदेस का राज को रेवा वाळो हे, तो उने उके हेरोदेस राजा कने मोकल्यो। हेरोदेस सासक खुद बी उना बखत यरुसलेम नगर माय थो ८ जदे हेरोदेस सासक ने ईसु के देख्यो तो घणो खुस होयो क्योके घणा लम्बा बखत से उके देखणो चातो थो। उ उका बारामें सुण्या करतो थो अने उकासे कइंका चमत्कार देखवा की आस करी र्यो थो। ९ उने ईसु से नरा सवाल पुछ्या पण ईसु ने कइंका को जुवाब नी द्यो। १० मुख-पुरोहित अने सासतरी वां उबा हुई के घणा जोर दई के आरोप लगाडी र्या था। ११ तो हेरोदेस सासक ने सिपईहुंण समेत ईसु की मजाक उडई अने उका साते बुरो बरताव करवा का बाद उके चटकदार लतरो पेरायो अने पाछो पिलातुस राजपाल कने मोकली द्यो। १२ उणाज दन से हेरोदेस अने पिलातुस माय-माय दोस बणी ग्या। इका से पेलां उणका माय दुसमनी थी।

ईसु सरु फेसलो

(मती २७.१५-२६; मरकुस १५.६-

१५; योहन १८.३९-१९.१६)

१३ पिलातुस ने मुख-पुरोहितहुंण सासकहुंण अने लोगहुंण के तेइया, १४ अने उने क्यो, "तम म्हारा कने इना मनख के बलवो करवा वाळो अने भइकाणे वाळा की कई के लाया हो। देखो तमारा सामे इना मनख के जांचवा पे म्हने इका माय उनी बातहुंण को कई को कसूर नी पायो

जेको तम दोष लगाडी र्या हो। १५ अने नी हेरोदेस ने, क्योके उने इके हमारा कने पाछो मोकल्यो हे। अबे देखो, इने मोत की सजा सरीको कई काम नी कर्यो। १६ तो हूं इके पिटवई के छोडी लाखुंवां।" १७ (तेवार का दन पिलातुस के उणका सरु एक मुलजिम छोड़णो जरूरी थो।) १

१८ पण वी एक साते चिल्लाडी उठ्या, "इना मनख के मारी लाख अने हमारा सरु बरअब्बा के छोडी दे।" १९ यो बरअब्बा उज थो जो नगर माय बलवो करावा अने हत्या का कसूर सरु जेळखाना माय लाख्यो थो।

२० पिलातुस ने ईसु के छोड़वा की मन्सा से लोगहुंण के फेर समजायो, २१ पण वी यो केता होया चिल्लाता र्या: "उके कुरूस पे चड़ाव, कुरूस पे।"

२२ तो उने तीसरी कावा उणकासे क्यो, "कायसरु? इना मनख ने कई बुरई करी? म्हने इका माय मोत की सजा लायक कई कसूर नी पायो। तो हूं उके कोड़ा लगवई के छोडी लाखुंवां।"

२३ पण वी उंची अवाज से चिल्लाडी-चिल्लाडी के के पाछे पडी ग्या के उ कुरूस पे लटकाइयो जाय अने उणका चिल्लाइवा को असर बड़वा लाग्यो। २४ तो पिलातुस ने फेसलो कर्यो के उणकी मरजी पूरण करी जाय। २५ तो उने उना मनख के जो दंगा अने हत्या का कसूर की वजासे बन्दी बणायो थो उणकी मांग मुजब छोडी लाख्यो: पण ईसु के उणकी मरजी पे छोडी लाख्यो।

१ २३.१६ थोडाक हात का लेखहुंण माय १७ आयत मिळे हे (देखो मरकुस १५.६)।

कुरुस पे लटकाइयो जाणो

(मती २७.३२-४४; मरकुस १५.२१-

३२; योहान १९.१७-२७)

२६जदे वी ईसु के लइ-जई र्या था तो उणने गांम आडी से आता होया सिमोन नामका एक कुरेनी नगर का रेवा वाळा के पकड़्यो अने कुरुस उका कांधा पे धरी के, के उ कुरुस के ईसु का पाछे-पाछे लई चले।

२७उका पाछे लोगहुंण की बड़ीमेक भीड़ चली अइरी थी अने उणका माय बइराहुंण बी थी जो ईसु सरु रोई अने कळिपरी थी। २८पण ईसु ने उणका आडी फरिके क्यो, "यरुसलेम की बेटिहुंण, म्हारा सरु मती रोव, पण अपणा अने अपणा बाळकहुंण सरु रोव। २९क्योंके देखो असा दन अई र्या जदके लोग केगा 'धन्य वी बांझ अने वी कोख जिणने जन्म्यो हयनी अने वी स्तन जिणने कदी दूद नी पिवाइयो' ३०+ तो

'वी परबतहुंण से केवा लागेगा,


"हमार पे हिटी पडो," अने

बळ्डीहुंण से केगा, "हमारे

ढांकी लो।" +

३१क्योंके अगर वी लिल्ला झाड़ का गेले असो करे हे, तो सुक्या का गेले कजा कई नी होयगा?"

३२सिपईहुंण ने दूसरा दोई डाकूहुंण के बी जो कसुरवार था, उका गेले मोत की सजा देवा सरु लइ-जई र्या था।



ईसु का अगल-बगल दो डाकू कुरुस पे (LUK २३.३२)

३३जदे वी उनी जगा पे जो कपाळ की जगा केवाय पोंच्या तो वां उणने ईसु के अने उका गेले दो डाकूहुंण के बी कुरुस पे टांग्या एक के सुदा हाताड़ी अने दूसरा के डाबा हाताड़ी। ३४+ पण ईसु ने क्यो, "हे परमेसर पिता, इणके मांफ कर, क्योंके ई नी जाणे के कई करी र्या हे।" अने उणने चिट्ठिहुंण लाखी के उका लतरा माय-माय बांटी ल्या।

३५+ लोग कने उबी के देखी र्या था: यां तक के हाकिमहुंण बी या कई के उके ताणा दई र्या था, "इने दूसरा लोगहुंण के बचाइया। अगर यो परमेसर को मसीह याने उको छांट्यो होयो हे तो अपने खुद के बचाडे!"

३६+ सिपईहुंण बी उका कने अई के मजाक उड़ावा, अने सिरको पिवाड़ी के ३७केवा लाग्या, "अगर तू यहूदिहुंण को राजो हे तो अपने खुद के बचाड़।"

+ २३.३०: होसे १०.८; दरसन ६.१६

+ २३.३४: भजन संहिता २२.१८

+ २३.३५: भजन संहिता २२.७

+ २३.३६: भजन संहिता ६९.२१

३८ अने उका अदरे यो आरोप-पत्तर बी लगाइयो थो, "यो यहूदिहंण को राजो हे।"

३९ जो वां लटकाइया गया था उणका माय से एक कुकरमी यो कई के कोसी र्यो थो: "कई तू मसीह हयनी? तो फेर अपने खुद के अने हमारे बचाइ"

४० पण दूसरा ने उके डांटी के क्यो, "कई तू परमेसर से बी नी डरे? तू बी तो इना फेसला का मुजब सजा पई र्यो। ४१ हमारा गेले तो सांची माय न्याव होयो अने हम अपणी करनी को ठीक फळ भुगती र्या हे। पण इना मनख ने कई कसूर नी कर्यो।" ४२ तो उने ईसु से क्यो, "हे परभु ईसु, जदे तू अपना राज माय आवे तो म्हारे रियाद करजे।"

४३ ईसु ने उकासे क्यो, "हूं थार से सांची कूं के आजज तू म्हारा गेले सरग-लोक माय रेगा।"

ईसु ने कुरूस पे पराण छोइया

(मती २७.४५-५६; मरकुस १५.३३-

४१; योहन १९.२८-३०)

४४^{*} अबे यो दफोर्या का करीब बारा बजे को बखत थो अने तीन बज्या दन तक आखा देस माय इन्दारो छायो र्यो। ४५ क्योके सूरज को उजाळो जातो र्यो। अने यरुसलेम मन्दर माय को परदो अदाइ से फाटी ग्यो। ४६^{*} ईसु ने उंची अवाज से हेला पाडी के क्यो, "हे परमेसर पिता, हूं अपणी आतमा थारा हात माय दई र्यो हूं।" या कई के उने पराण छोड़ी लाख्यो।

४७ जदे सुबेदार ने यो सगळो देख्यो तो उ या कई के परमेसर की बडई करवा लाग्यो: "सांची माय यो मनख निरदोस थो।"

४८ तो आखो हुजुम जो तीन मनखहुंण की मोत देखवा सरु भेळो होयो थो जो कई होयो उके जदे देखी ल्यो, तो अपणी छाती कूटता होया पाछा जावा लाग्या। ४९^{*} उका सगळा जाण-पेचाण वाळा अने वी बडराहुंण जो गलील से उका गेले अई थी, थोडिक दूरी पे उबी हुई के यो सगळो देखी री थी।

ईसु की लोथ के गाइयो जाणो

(मती २७.५७-६१; मरकुस १५.४२-

४७; योहन १९.३८-४२)

५०-५१ अने, यूसफ नामको एक मनख जो यहूदिया का नगर अरमतियाह को रेवा वाळो थो सुदो अने धरमी मनख थो अने परमेसर का राज की बाट जोई र्यो थो। उ म्हासबा को एक सदस्य, पण उणकी योजना अने काम सरु राजी नी थो। ५२ यूसफ ने पिलातुस कने जई के ईसु की लोथ मांगी ली। ५३ तो उने ईसु की लोथ के उतारी के मलमल का लतरा माय लपेटी अने एक कबर माय धरी जो सिल्ला माय कोरी के बणई थी, जेका माय कदी कइंका की लोथ नी धरी थी। ५४ उ यहूदिहंण को तय्यारी को दन थो अने सबत् को दन सुरु होवा वाळो थो।

५५ उनी बडराहुंण ने, जो गलील से ईसु का गेले अई थी, पाछे पाछे जई के उनी कबर के देखी अने यो बी देख्यो के उकी

* २३.४५: निरगमन २६.३१-३३

* २३.४६: भजन संहिता ३१.५

* २३.४९: लूका ८.२-३

लोथ कसे धरी हे। ^{५६} तो वी पाछी वइंज अई के जां रुकी थी सुगन वाळा मुसाला अने अतर तय्यार कर्या।

फेर सबद् का दन हुकम का मुजब उणने अराम कर्यो।

ईसु मर्या माय से जी उठ्यायो

(मती २८.१-१०; मरकुस १६.१-८; योहान २०.१-१०)

सबद् बितवा पे दितवारें हफ्ता **२४** का पैलां दन पो फाटतांज वी बइराहुंण उना सुगन वाळा मुसालाहुंण के जो उणने तय्यार कर्या था लई के कबर पे अई। ^१उणके बड़ी सिल्ला, कबर पे से सरकी नगे अई। ^२पण जदे वी भितरे गयी तो उणके परभु ईसु की लोथ नी लादी। ^३असो होयो के जदे वी अचरज करीज री थी तो देखो, दो मनख चळकण्यां लतरा पेर्या उणका कने अई उब्या। ^४तो बइराहुंण डरी हुई अने जमीन आड़ी मुन्डो नमाड़ी के उबी थी तो उना मनखहुंण ने उणकासे क्यो, "तम जीवता के मर्या माय कायसरु दुंडो हो? ^५ उ यां नी हे पण जीवतो हुई गयो। रियाद करो के जदे उ गलील मायज थो तो उने तमार से यो क्यो थो: ^६ "हूं मनख को बेटो जरूरीज पापी मनखहुंण का हात माय करी द्यो जउंवां, कुरुस पे लटकाइयो जउंवां अने तीसरा दन जीवतो हुई जउंवां।"

^८तो उणने उकी बातहुंण रियाद करी, ^९अने कबर से पाछी अई के सगळी बात ग्यारा चेलाहुंण के अने सगळा के सुणई।

^{१०}जिणने ई बातहुंण, परेरितहुंण के बतई, वी मरियम मगदलीनी, योअन्ना अने याकूब की मेतारी मरियम अने उणका गेले दूसरी बइराहुंण वी थी। ^{११}पण ई बातहुंण परेरितहुंण के गप सरीकी लागी। अने उणने बइराहुंण को बिसास नी कर्यो। ^{१२}पण पतरस उठ्यो अने दोइयो दोइयो कबर पे गयो जदे उने नमिके भितरे देख्यो तो उके सिरप मलमल को लतरो नगे आयो, अने इनी घटणा पे अचरज करतो होयो उ अपणा घरे चलयो गयो।^{१३}



पतरस ईसु की कबर पे (LUK २४.१२)

इम्माउस की बाट पे दो चेलाहुंण के ईसु को दरसन

(मर १६.१२-१३)

^{१३}अने देखो, उणाज दन उणका माय से दो जणा इम्माउस नाम का गांम आड़ी जई र्या था जो यरुसलेम से करीब छः कोस^x छेटी थो। ^{१४}वी इनी सगळी घटणाहुंण का बारामें माय-माय बात

^{१३} २४.१२ थोड़ाक हात का लिख्या होया लेखहुंण माय १२ वीं आयत नी मिळे हे । ^x २४.१३ छः कोस; या ११ किलो मीटर ।

[†] २३.५६: निरगमन २०.१०; नेम-बिधान ५.१४

[†] २४.६-७: मती १६.२१, १७.२२-२३, २०.१८-१९; मरकुस ८.३१, ९.३१, १०.३३-३४; लूका ९.२२, १८.३१-३३

करता जई र्या था। १५पण असो होयो के जदे वी माय-माय बात करी र्या था तो ईसु खुद वां अई के उणका गेले-गेल चलवा लाग्यो, १६पण उणकी आंखहुंण असी बन्द करी लाखी थी के ईसु के ओळखी नी सक्या। १७उने उणकासे क्यो, "तम चलता चलता माय-माय कई बातहुंण करी र्या हो?"



**इम्माउस का रस्ता पे ईसु अने
दो मनख (LUK २४.२७)**

अने वी उदास हुई के उबा रई गया। १८उणका माय से एक ने, जेको नाम किलयोपास थो, उके जुवाब द्यो, "कई तूज एखलो असो मनख यरुसलेम माय आयो होयो हे के इनी सगळी बातहुंण से जो इना दनहुंण माय घटी अण्जाण्या हे?"

१९उने उणकासे क्यो, "कां की बातहुंण?"

उणने उकासे क्यो, "ईसु नासरी का बारामें, जो परमेसर अने सगळा मनखहुंण की नगे माय काम अने बचन माय सामरती नबी थो। २०पण हमारा मुख-पुरोहितहुंण अने हाकिमहुंण ने उके

पकड़वाई के मोत की सजा का लायक ठेराइयो अने उके कुरुस पे टांग्यो। २१पण हम तो या आसा करी र्या था के उज मनख इसराइल के छुटकारो देवा वाळो हे। इनी बातहुंण का अलावा इनी घटनाहुंण के घट्या आज तीसरो दन हुई चुक्यो हे। २२पण हमारा गेले की थोड़िक बइराहुंण ने बी हमारे अचरज माय लाखी द्यो। जदे वी सवरे माय कबर पे गयी, २३अने उकी लोथ नी लादी, तो यो केता हुई अई के 'हमने सरगदूतहुंण को बी दरसन कर्यो जिणने क्यो के उ जीवतो हे।' २४जो हमारा गेले का चेला था उणका माय से थोड़ाक कबर पे गया अने जेनी बात के बइराहुंण ने जसी कई थी वसीज मिळी। पण, उणने ईसु के नी देख्यो।"

२५तो ईसु ने उणकासे क्यो, "अरे कमअकल्याहुंण, जो बात नबिहुंण ने कई उनी सगळी बातहुंण पे बिसास करवा माय मतिबन्द लोगहुंण। २६मसीह सरु कई यो जरूरी नी थो के यो सगळो दुःख भोगे अने परमेसर की म्हेमा माय जई पोंचे?" २७तो उने मूसा से सुरु करिके सगळा नबिहुंण अने आखा धरम सासत्तर माय से अपणा बारामें कई गी बातहुंण को अरथ उणके समजई द्यो।

२८जदे वी उना गांम कने पौंच्या जां जई र्या था, तो उने असो कर्यो जसेके उ अगड़े जाणो चई र्यो। २९पण उणने जोर दई के क्यो, "हमारा गेले रुकी जा, क्योके सांज हुई चली हे अने दन करीब-करीब अथणी चुक्यो हे।" तो उ उणका गेले रुकवा सरु भितरे ग्यो। ३०तो असो होयो के जदे ईसु उणका गेले जिमवा बेठ्यो तो उने रौटा लई के धन्यवाद

द्वयो, अने तोड़ी के उणके देवा लाग्यो।
^{३१}तो उणकी आंखहुंण खुली गी अने
 उणने उके ओळखी ल्यो, पण उ उणकी
 नगे से लोप हुई ग्यो। ^{३२}वी एक दूसरा
 से केवा लाग्या, "जदे उ बाट माय हमार
 से बातहुंण करी र्यो अने हमारे पवित्तर
 सासत्तर को मतलब समजई र्यो थो, तो
 कई हमारा हिरदा उतेजणा से नी भरई
 गया था?"

^{३३}उणाज बखत वी उठी के यरुसलेम
 पाछा गया अने ग्याराहुंण अने उणका
 सातिहुंण के भेळा पई के ^{३४}उणने क्यो,
 "परभु सांचीज जी उठ्यो, अने सिमोन
 के नगे आयो।"

^{३५}अने दोई चेला इम्माउस बाट की
 माईथी के अने या के रोटा तोड़ता बखत
 वी ईसु के कसे ओळखी गया था बताइवा
 लाग्या।

बन्द कोठड़ी माय चेलाहुंण के ईसु ने दरसन द्यो

(मती २८.१६-२०; मरकुस १६.१४-१८;

योहन् २०.१९-२३ परेरितहुंण १.६-८)

^{३६}जदे वी ई बातहुंण कर्या जई र्या
 था, ईसु उणका अदाइ माय अई के उबो
 हुई ग्यो, अने उणकासे क्यो, "तमारे
 सांती मिळे।"

^{३७}पण वी चोंकी गया अने डरी गया।
 उणने बिचार्यो के हम कइंका भूत के
 देखी र्या हे। ^{३८}ईसु ने उणकासे क्यो,
 "तम कायसरु घबराव? तमारा हिरदाहुंण
 माय सक कायसरु उठे हे? ^{३९}म्हारा हात

अने म्हारा पगहुंण के देखो के हूं खुदज
 हूं। म्हारी काया के हात लगाडी ने देखो,
 क्योँके आतमा के हाइ-मांस नी होय,
 जसाके तम म्हारा माय देखो हो!"

^{४०}जदे उ यो कई चुक्यो तो उने
 अपणा हात अने पग उणके दिखाइया।^{४१}
^{४१}जदे वी खुसी का मारे अबे बी बिसास
 नी करी सक्या अने चेलाहुंण के अचरज
 हुई र्यो थो। तो ईसु ने उणकासे क्यो,
 "कई तमारा कने यां थोड़ो खावा सरु
 हे?" ^{४२}तो उणने उके सेंकी हुई मच्छी
 को एक गांगडो द्यो। ^{४३}अने उने उके
 लई के उणका सामे खायो।

^{४४}तो उने उणकासे क्यो, "ई म्हारी वी
 बातहुंण हे, जिणके म्हने तमारा गेले रई
 के करी, के उनी सगळी बातहुंण के जो
 मूसा का नेम-बिधान माय, नबिहुंण, अने
 भजनहुंण की पोथी माय, म्हारा बारामें
 लिखी गी थी पूरण होणो जरूरी हे।"

^{४५}उने उणके अक्कल दई के वी
 पवित्तर सासत्तर के समजे। ^{४६}अने उने
 क्यो, "यो लिख्यो के मसीह दुःख भोगेगा
 अने तीसरा दन मर्या माय से जीवतो
 हुई जायगा। ^{४७}अने यरुसलेम से सुरु
 करिके सगळी जातहुंण माय उका नाम
 से पापहुंण की मांफी सरु मन बदळवा
 को परचार कर्यो जायगा। ^{४८}तम इनी
 सगळी बातहुंण का गवा हो। ^{४९}देखो,
 जो करार म्हारा पिता ने कर्यो हे, हूं उके
 तमार पे उतारुंवां पण जदत्तक तम सरग
 की सामरत से भर्या-पुर्या नी हुई जाव,
 इना नगर माय रुक्या री जो।"

^१ २४.४० थोडाक हात का लिख्या होया लेख माय ४० आयत नी मिळे हे ।

^१ २४.४९: परेरितहुंण १.४



ईसु असमान पे चड़िग्यो
(LUK २४.५०)

**ईसु सरग पे चेलाहुंण का देखता-देखता
चल्यो ग्यो**

(मर १६.१९-२०; परेरितहुंण १.९-११)

५०† जदे उ उणके बेतनिय्याह तक बायरे लई ग्यो अने उने अपणा हात अदरे उठई के उणके आसीस दई। ५१जदके उ आसीस दई र्यो थो तो उणकासे इकाड़ी होयो अने उके सरग पे उठई ल्यो। ५२तो उणने ईसु के सास्टांग परणाम कर्यो अने वी घणी खुसी का साते यरुसलेम नगर पाछा अई ग्या ५३अने रोज-रोज मन्दर माय जई के परमेसर की बड़ई करता र्या।

† २४.५०-५१: परेरितहुंण १.९-११